

**NATIONAL ASSEMBLY OF
SEYCHELLES**

Wednesday 20th July, 2022

The Assembly met at 9.02am

National Anthem

Moment of Reflection

Mr Speaker is the Chair

MR SPEAKER

Bonzour tou Manm Onorab. Bonzour nou *staff* ki asiste nou, e nou piblik a lekout. Byenveni pou nou travay pour sa lazournen. Nou pe kontinyen *Order Paper* avek Mosyon e annord. Nou annan Mosyon depoze par Onorab Waven William. Onorab mon a envit prezant ou Mosyon.

HON WAVEN WILLIAM

Mersi Mr Speaker. Mersi tou bann dimoun ki pe ekoute. Mr Speaker Mosyon ki mon'n anmennen i lir *comme swivan*: -

Swivan bann problem ki bann sant orfelen pe fer fas avek, par egzanp Vilaz Prezidan, Lasanble i demann Gouvernman pou revwar polisi, stratezi e pou amann Lalwa Zanfan pou fasilite en swen pli konpreansiv dan pei.

MR SPEAKER

Mersi Onorab. Mon a demande ki ou Mosyon i ganny segonde avan ou adrese. Mon a ganny segonnman? Onorab Esparon.

HON REGINA ESPARON

Mersi Mr Speaker. Mon le segonn sa Mosyon.

MR SPEAKER

Mersi. Onorab William. Ou a adres ou Mosyon silvouple.

HON WAVEN WILLIAM

Mr Speaker, avan mon al lo mon diskour mon ti a kontan remerci Bondye e demann son gidans, pandan en moman ki sa Lasanble pe diskite lo sa Mosyon.

En Mosyon ki kapab pour serten paret pa enportan, me Mr Speaker letan nou regard Vilaz Prezidan, i pa zis en konsern distrik Port Glaud. I pa zis en konsern larezyon, me i en konsern Sesel. Akoz tou sa bann zanfan i pa sorti zis Port Glaud, me i sorti dan plizyer distrik dan Sesel.

Mr Speaker mon apresye keston ki Onorab Aglae ti anmennen yer, ki ankor demontre son konsern. Mr Speaker, mon remercie osi bann Manm Lasanble lo kote LDS, ki ansanm ek mwan nou'n

dan *recess*. Nou'n kapab zwenn ek diferan parti, lazans Gouvernman. E nou'n zwenn avek Lekol Anse Boileau Segonder, ladministrasyon.

Nou'n zwenn avek bann lezot *stakeholders*. Par egzanp Servis Sosyal, pou nou koman Manm Parlman sey konpran enn pti pe, sityasyon kwa ki pe ganny fer, vizavi sa vilaz pou adres bann problemn.

Mr Speaker ozordi, i en moman menm si Minis in vin dan Lasanble pou li dir avek Lasanble, avek pep Seselwa, kwa ki pe ganny fer atraver son Minister, sa pa anpes, Lasanble osi ki annan en rol ase enportan dan pei, pou osi donn son pwennvi. An menm tan, vin avek bann sizesyon an menm tan, konsyantiz e sansibiliz bann diferan akter dan sosyete, ki annan pou fer avek bann zanfan.

Elevaz bann zanfan sirtou, bann ki ganny abandonnen Mr Speaker, kot Vilaz Prezidan. E dan bann lezot fwaye ki nou konnen. Mr Speaker i bon osi ki mon remerisi, tou bann akter konsernen ki pe sey zot mye pou kapab *deal* avek problemn ki Vilaz pe fer fas avek. Nou rekonnnet bann mankman ki annan.

Mon oule osi, felisit sa bann travayer laba Mr Speaker,

menm si mazorite zot, zot napa bann sertifika ouswa, in pas dan en formasyon. Me zot in pran en lanplwa laba avek bi pou ede.

Mr Speaker, mon osi felisite e ankouraz nouvo Gouvernman pou lapros ki pe pran, pou sey apros sa problemn. Mr Speaker sa problemn, i pa en problemn ki la ozordi konmsi i pe tir nou latansyon. I en problemn ki la, e i pou la avek nou.

Me nou koman en sosyete, tou bann akter dan governans, menm dan sekter prive Mr Speaker, nou pou bezwen zwenn ansanm pou nou kapab sey adres sa problemn.

Mr Speaker, mon pou koz lo bann sityasyon aktyel la ki vilaz pe fer fas avek. Mr Speaker nou okouran ki i annan 29 zanfan laba. 4 parmi sa 29 zot bann vre orfelen. E dan sa 25, 20 ladan Mr Speaker i sorti dan bann fanmir ki afekte ek drog ek lalkol, kot zanfan in ganny abandonnen, e kot Servis Sosyal in bezwen antre, pou kapab tir zanfan. Anpes zot ganny asize anpes zot ganny afekte e met zot lo Vilaz.

Mr Speaker ozordi, nou konnen poudir serten sa bann zanfan, zot pe lekol dan lekol Segonder Anse Boileau. E nou konpran ki i annan bann

problenm ki leve laba. Mr Speaker, mon lenformasyon ki tou le semenn i annan zanfan lo Vilaz ki sove.

I annan ki ale pou trwa semenn, apre trwa semenn retournen. Mr Speaker, i annan ki pe ganny akse ek lalkol avek drog. E bann diferan akter parey mon dir zot pe seye solman ou vwar poudir bann problenm i kontinyen.

Par egzanp bomaten la, mon aprann poudir i annan 3 ki lo *bus stop*. Zot lo *bus stop* me zot pa'n pran bis pou al lekòl. Mr Speaker zot pou la e si person, pa vreman konn zot e avans devan pour sey vwar kwa ki kapab ganny fer, sa bann zanfan pou sorti Port Glaud, zot pou desann anvil, zot pou al diferan landrwa. E i annan Mr Speaker ki komans vole.

Dapre lenformasyon ki mon annan, Mr Speaker i annan menm ki pe - akòz serten bann *staff*, ki zot konnen pe pran aksyon disiplinè, i annan bann zanfan ki al vole kot bann *staff* osi. Zot konnen ki bor sa bann *staff* i reste, zot pe al vole.

Mr Speaker i vin en konsèrn akòz sa bann zanfan, nou pa kapab abandonn zot. Mr Speaker i bon nou sey met nou, dan sityasyon sa bann zanfan. Ki letan ou santi poudir ou paran in abandonn ou. E ouswa

ou dan en fanmir ki annan bann problenm anti-sosyal. E ou ganny retire dan ou fwaye, Mr Speaker.

Ou kapab mazinè kwa ki pase, dan lespri sa zanfan. Letan i dan sa fwaye, e akòz parfwa i fer zot reazir dan sa fason. Me Mr Speaker, pa akòz zot pe fer sa, zot pe reazir koumsa, ki zot bezwen ganny abandonnen, ouswa negligè.

Mr Speaker, mon osi vwar poudir paran ki bezwen lasistans, ki bezwen led, kot sa bann zanfan i sorti. Mr Speaker parey mon dir la i pa lemoman pou zwe *the blame game*. Me sa Lasanble, atraver sa Mosyon pe anvi sansibiliz bann zenn, ki demen pe anvi fer en zanfan, bann paran ki petet ozordi pa pe tro pran sa responsabilite, pou zot reflesir en pe.

Mr Speaker, pou bann zanfan osi ki pe lekòl ki annan en lavenir devan zot, pou zot pa tonm dan bann sityasyon, ki demen i pou kout zot. Me an menm tan kout sosyete Mr Speaker. Mr Speaker si ou pran bann problenm ozordi nou pe fer fas avek ki pa ti nesèser, me akòz nou pa'n met ledwa lo la depi o komansman, Mr Speaker ozordi in deborde e i pe kout pei bokou. I pe kout pei bokou e annan menm tan pei avek pe

ressours napa kapasite pou founi bann sant nesaser.

Mr Speaker ki demande ozordi ki annan pou nou kapab *deal* avek problem ki nou fer fas avek.

Mr Speaker, mon anvi dir ki ozordi, sa Lasanble pe koz lo sa Mosyon, sa Lasanble, pa anvi, person deor dan bann antite Gouvernman, vwar nou konmsi pe *invade* zot balizaz. Sa Lasanble pe anvi ede.

Sa Lasanble pe anvi aport serten solisyon e sipor e ankouraz bann ki pe fer zot mye pou kapab rezourd bann problem.

Mr Speaker, mon okouran ki dan bann diskisyon ki nou annan, i annan en Komite Entersektoral ki'n ganny met an plas. Ki sipoze pe vwar – e pe vwar tou sa bann problem.

Me kekyon ki demande, ki mon poze, se eski zot pe vreman adres problem dan son sours? Eski nou pe vreman enkli tou bann akter nesaser, e enportan pou kapab *deal* avek bann problem?

Mr Speaker mon osi, i annan zanfan sorti dan distrik Grande Anse Mahé ki laba, ki mon okouran. Mr Speaker, mon anvi ede, koman en Manm Parlman. Mon anvi ki kominote i osi angaze pou donn koudmen. Me se atraver

diskisyon met problem devan, an menm tan fer lezot konpran pou dir be regarde, nou pa pe zis la pou vin blanmen, nou anvi koste pou donn koudmen.

Mr Speaker alor par lefe ki mon konnen poudir plizyer Manm i anvi koz lo la, mwan mon anvi propoze ki enn:-

Ki Vilaz ouswa *Management*, *NCC* i a per, ouswa vwar sa problem ki zot pe fer fas avek koman zis zot konsern. Me pour *être* ankouraze pou rod bann sipor nesaser. Mon konnen poudir zot ganny en Bidze avek Gouvernman.

E koman Lasanble ki nou anvi, ede nou ti a kontan zot met serten bann keksoz devan nou pou nou kapab anmenn devan, letan nou komans diskite lo Bidze. Si zot santi poudir, i annan sa nesosite.

Mr Speaker i annan en sant reform, ki en bon pe letan nou'n tann koz lo la, anba ansyen Gouvernman. Me nou konnen poudir i annan plizyer bann sit, ki'n ganny selekte. Me finalman akoz bann diferan konsern pa'n ganny fer.

Me pli gro konsern, se finansman. E la nou konpran poudir i annan en teren Montagne Posée ki zot pe mazine fer en sant konpreansiv. Mr Speaker, mon

demande ki Gouvernman i pran sa koman en priyorite. Parmi, mon konnen poudir i annan en ta lezot priyorite. Me Mr Speaker i en proze ki en bon pe letan nou pe koz lo la, me solman, i pa'n zanmen materyalize.

E mon demande ki nouvo Gouvernman - e mon konnen poudir, sa de Minis ki annan pou fer avek zanfan, lafanmir zot pou pouse pou zot kapab fer sir ki sa proze i ganny realize.

E Mr Speaker si i vin devan Lasanble, mon konnen poudir Lasanble osi pou donn sipor. Akoz i en nesesite, Mr Speaker. I en nesesite akoz parey mon n dir pli boner i annan en ta problem nou'n pa'n met ledwa lo la boner. Nou pa'n atak li dan sours. E ozordi problem i n deborde ki pe kout nou en ta resours.

Ki petet pa ti nesaser, akoz i annan pe resours. I annan ta priyorite, me ler ou servi byen ou resours e konn atak ou bann priyorite, ou vreman sorti byen.

Mr Speaker avek sa de mo mon pou aret la. E mon pou demann tou bann Manm, pou donn sipor sa Mosyon. E pour koz lo la, pou nou kapab sansibiliz bann diferan akter deor. Koumsa ki nou tou nou ava zwenn ansanm pou nou kapab sey *tackle* sa problem.

Alor Mr Speaker mon pou aret la. Mersi bokou, pou tou bann ki'n ekout mwan. E mon *welcome* zot bann sizesyon e zot bann komanter lo sa Mosyon. Mersi.

MR SPEAKER

Mersi Onorab. Eski Onorab Esparon, i anvi adrese la?

HON REGINA ESPARON

Wi Mr Speaker.

MR SPEAKER

Onorab ou annan laparol.

HON REGINA ESPARON

Mersi Mr Speaker. Bonzour tou dimoun a lekout. sa Mosyon anmennen par Onorab William, ki mon'n segonde, ki mon pe donn mon sipor, i enn ki pe demann Gouvernman, pou regard bann problem, ki bann Sant Orfelen pe fer fas avek.

E la in sit Vilaz Prezidan, koman en legzanp, e mon le fer remarke ki zis yer Minis Lafanmir fek reponn kestyon lo sa size Vilaz Prezidan, e en parti enportan sa kestyon ki ti ganny anmennen par Onorab Aglae Manm Elekte pou Port Glaud ki Minis ti reponn yer, sete pou rode ki mannyer pou etabli bann pli bon relasyon ant vilaz e lezot *stakeholders*.

E NCC anvi ki Vilaz Prezidan i tonm anba li ti la pou eklersi bann dout. E zisteman Mr Speaker, ozordi sa Mosyon i tonm byen, akoz i pou donn nou Lasanble, en *scope* pli larz, pou diskrit sa size, e ansanm petet vin avek bann solisyon.

E i bon fer resorti ki apard Vilaz Prezidan, nou osi annan lezot fwaye orfelen parey La Solitud La Misère, fwaye De Nazareth, Anse Etoile, Ste Elizabeth La Rivière Anglaise, e osi *Sisters of Charity* Anse Etoile, ki pe ofer preski menm servis.

E mon konnen ki sa bann landrwa ki pe ganny dirize par bann leser, i annan serten nivo disiplin. Mon pa konnen si akoz dan serten ka sa bann zanfan, i ganny pran parfwa menm ptipti, a laz 7 zour maternite parey fek leka, kot Ste Elizabeth, resaman.

E mon konnen ki fwaye Nazareth, sa bann garson osi, i annan serten disiplin. E Mosyon pe osi demande ki bann Lalwa ki annan pou fer ek proteksyon zanfan, i ganny revize pou fasilite sa swen konpreansiv, letan nou pe donn proteksyon sa bann zanfan.

Mr Speaker, ozordi letan nou pe koz lo sa bann diferan lenstitisyon e son lankadremman, nou osi bezwen

koz lo responsabilite paran anver sa zanfan, ki ganny anvoy dan sa bann lenstitisyon.

Parski i annan paran ki annan plis ki en zanfan dan sa bann fwaye. Ler ou annan ziska 5 a 6 zanfan dan en fwaye, oli ou responsabilite? Eski atraver Minister Lafanmir, sa size responsabilite sa paran biolojik ki ankor vivan i ganny pran kont, letan ki nou pe plan lavenir e swen sa zanfan?

Oubyen nou met zot laba an atandan ki nou ganny en rekour, pou rod solisyon, me par kont i annan ki laba lo permanan. E lo kote kontribisyon ki li osi konman sa paran i kapab fer pou sa zanfan? Eski sa osi i ganny regarde?

Wi Gouvernman, i pran sa zanfan ek sa paran pou diferan rezon, parey Onorab William in fer resorti, pou son proteksyon, be ou sa enn ki'n deza annan plis ki en zanfan laba, eski ou pou kontinyen zis fer ankor? Avek bi ki Vilaz Prezidan oubyen fwaye a okipe? Ki kalite program *counselling* ou edikatif ki annan pou li sa paran?

Mr Speaker akoz la sa lapse ledikasyon pou vreman enportan, pou responsabilite sa paran. E mon osi santi ki lo nivo Gouvernman, bann Lazans

konsernen i bezwen annan bon kordinasyon antre zot, san mont lo lipye kanmarad, pou vwar de pre, kwa ki pe vreman pase dan sa bann fwaye ou lenstitisyon.

E osi pou ede zot sirmont okenn defi ki zot pe rankontre. Parski Mr Speaker, i pa sifi pou dir nou pe donn sa bann lenstitisyon en Bidze, si dan la pratik zot pa pe byen zer sa Bidze. La osi i pou devwar sa Minister, ou sa lebra ki sa responsabilite i tonm anba la, pou osi regarde ki mannyer i kapab *empower* sa bann zofisye, sirtou bann ki pe ansarz sa Bidze, koman en legzanp.

Si problem i lo nivo disiplin, la osi latansyon i bezwen vize ver rezourd sa problem disiplin, e adres sa en ki sa ponm gate, e non pa, met tou dan menm sak. Me nou dwatet pe osi *praise* sa ki pe fer byen e servi zot koman bann *role model*, pou *boost up* moral lezot.

E parey loter Mosyon in fer resorti, problem disiplin, parmi zanfan Vilaz Prezidan i en konsern, ki bezwen ganny adrese irzan, avan i vin pli grav.

Mr Speaker avek sa de mo, mon pou donn mon sipor sa Mosyon anmennen par Onorab William. Mersi.

MR SPEAKER

Mersi Onorab. Mon ava apel Onorab Michel Roucou pou son ladres.

HON MICHEL ROUCOU

Mersi Mr Speaker. Bonzour tou mon bann koleg Onorab. en bonzour spesyal zabitan Mont Fleuri e osi bann zanfan lo Vilaz Prezidan e tou bann *staff*. Mr Speaker, mon osi mon pou pran menm lapros parey loter Mosyon Onorab William.

Kot mon pou remerisi sa enn ki pli o ki tou. Li menm li ki vwar tou Mr Speaker, li menm li ki tann tou. Mon dir li mersi, pou sa lafors sa kouraz ki in donn bann ki'n travay kot Vilaz Prezidan, e in donn gidans bann ki'n ede pou soulaz bann zanfan ki laba.

Mr Speaker, mon osi mon pou donn mon de mo lo la. An grandisan mon papa ti en zabitan Port Glaud, e mon fanmir lo kote mon papa i zabitan Port Glaud. E mwan mon'n ganny sans pou mwan lekol Port Glaud, ziskan P3. Avan ki mon ti bouz Mont Fleuri.

E ler mon'n lekol Port Glaud mon'n ganny sans pou mwan lekol osi ek bann zanfan ki ti reste lo Vilaz Prezidan, mon kapab mazin enn Jonathan

Scholastique ki ti lekol laba, ki ti reste laba i ti lekol ansanm ek mwan.

Kot la ansanm Mr Speaker, koman bann zanfan nou'n ganny sans pou nou konn bann ki ti lekol laba. Mwan mon Mosyon ozordi akoz mon santi koman enn parmi bann *leader* dan pei ki nou'n negligiz enn pti pe, pou nou zwen en rol nou osi pou ed sa Vilaz.

Pa bokou letan pase lo nouvel ler mon ti pe gete, mon ti vwar Prezidan pe fer en vizit, laba ansanm avek son madanm, Madanm Ramkalawan, kot pou mwan mon ti vremen soulaze ler mon ti vwar en tel lapros Mr Speaker.

E mon osi mon pou *extend* mon lanmen, pou mwan dir ek Onorab William poudir ler i annan bann tel vizit, bann tel diskisyon. Envit mwan mon osi, envit mwan Mr Speaker akoz i annan zanfan ki sorti dan mon distrik Mont Fleuri, ki ti pe reste lo Vilaz Prezidan.

E osi i *still* annan zanfan ki ankor laba malgre ki annan ki mon konnen ki'n sorti, e ozordi zot in bouze ek zot lavi.

Mr Speaker Onorab William in fer sorti poudir i annan 29 zanfan, laba ki zot in ganny met laba pour nenport ki rezon, ki sityasyon lavi ki zot

paran in tonm ladan, swa lalkol swa drog.

E osi i annan 4 zanfan ki bann orfelen ki laba. Dan lepase nou'n tann sitan bokou, bokou ganny dir lo sa vilaz an term bann sityasyon ki pe ganny deroule laba. Swa zanfan, swa lo kote *staff* li menm.

Me selman nou pa pou al ladan, me selman mon santi poudir nou tou Seselwa, nou tou Seselwa ozordi, nou tou nou bezwen zwe en rol dan bann orfelen li menm li.

E osi petet si nou vwazen, ouswa en zanmi ki li in pran sa responsabilite, pour li kapab ankadre en zanfan ki napa en fanmir, pour diriz li lo en bon semen, ouswa pou donn li en *shelter* li menm li, tou Seselwa annou met lanmen ansanm pou nou kapab antre pou donn lanmen ede.

Akoz mon dir sa Mr Speaker? Mwan dan mon distrik mon'n *witness* kot i annan paran kot malerezman zot in *passed away*. E zot zanfan in bezwen *end up*, kot en lot Manm fanmir. Mon konnen poudir i pa fasil, akoz mon annan ki mon'n koz avek dan mon distrik. Ki mon'n zwenn, ki'n eksplik mwan akoz sa zanfan li menm li i pe pas dan en serten transformasyon.

I napa son paran, ki petet i pa pe ganny sa lanmour - mon pa poudir lanmour dan en fason mal - ki sa, petet sa gardyen ki pe get li la ki pa pe donn li petet i pa pe ganny sa lafeksyon. Ou konnen nou'n, nou tou nou'n grandi ek nou paran nou konnen mannyer i ete. Be selman Seselwa an antye nou bezwen santi nou, nou konsernen. I pa en problemm zis Gouvernman li menm li.

I en problemm nou tou, akoz demen nou menm nou, nou pa konnen ki pou arive avek nou. E kot nou zanfan pou *end up*.

E nou, nou menm nou, nou bezwen vini pour nou kapab ed sa bann zanfan. Parey Onorab William in dir se, ki bomaten menm la i tande poudir i annan en group zanfan Vilaz Prezidan ki zot ti ankor anba *bus stop*, zot pa'n al lekol.

Nou tou nou bezwen vin en gardyen, pou sa bann zanfan, pou nou kapab gid zot. Mon pa konn vreman, ki splander problemm laba. Be selman sa ki mon konnen poudir se ki i annan en group travayer, ki pe sey zot mye. Zis parey mon'n annan en zenn garson ki mon konnen ki pe travay laba, ki en zenn Stan Finesse, ki en zabitan mon

distrik. Ki mon vreman *proud* pour sa louvraz, ki i pe fer ansanm avek son bann koleg laba pou zot seye.

Nou konnen poudir i pa sitan fasil, Mr Speaker. Akoz mon osi tou mon annan zanfan. E an agrandisman nou konnen poudir zanfan, i komans antre dan bann staz devlopman. Kot la ou bezwen fer sir koman en paran, ou bezwen met en lizye lo zot, fer sir poudir ou pe gid zot dan en bon semen ki zot pe pran zot ledikasyon serye. Zot letid serye Mr Speaker.

E mwan mon anvi donn mon sipor, mon *full* sipor Onorab Aglae akoz i tonm dan son distrik. E li ki konn enn pti pe plis ki pase laba. E yer nou ti vwar i ti anmenn en kestyon lo la, kot i ti pe demann enn pti pe sipor. E mwan mon pou donn mon sipor, koman en zanfan ki mon annan en gran fanmir dan sa distrik, kot Onorab Aglae i ete.

Mr Speaker dan detrwa lannen pase, mon ti ganny sans pou mwan vizit orfelen kot bann garson i ete Anse Etoile. Mon ti al laba akoz mon ti al ek en zanmi. Akoz i ti bann rafal Desanm, e bann zanfan zot ti pe al partisip dan en aktivite, pou zot al sante.

E nou, nou ti al laba pou nou koup seve sa bann garson.

Ou ti vwar Mr Speaker, bann zoli zanfan ki pe byen ganny okipe laba. E mon tir sapo ek sa lekip laba, dan sa landrwa Mr Speaker. E mwan mon anvi ki petet Onorab William ek ou lekip, mon'n aprann poudir i annan en group zot ki tanzantan zot zwenn pou zot diskrit sa, sa bann size koumsa.

Petet *extend* sa lenvitasyon, pou bann larestan Onorab ki ti voudre zwenn avek ou lekip. Pou nou gete ki mannyer nou kapab ede. Akoz parey mon'n dir lo komansman, sa i pa zis en problemm Gouvernman, ouswa Vilaz Prezidan, nou tou Sesel an antye. Akoz sansan demen, i bann zanfan ki pou vin pran larelev pei. Kot zot i kapab annan ladan ki pou kapab vin bann *leader*, ouswa pou pran nou plas.

E osi Mr Speaker, avan mon *wrap-up*, petet mon anvi anvoy en mesaz kler pou bann paran la deor. Ou konnen parfwa nou aksyon ki nou fer i afekte nou bann zanfan. Sanmenm sa ki nou vwar zot souvandfwa zot reakte dan en fason ki zot fer.

Akoz petet zot pa pe gannyen, e sa gidans ki zot merite, ouswa zot pa pe ganny sa latansyon, sa lafeksyon ki zot bezwen. E nou bann paran

nou bezwen pran nou rol vreman serye. Mon get sa kantite paran Mr Speaker ki sorti dan diferan distrik pou zot pas en lazournen dan kan drog Corgate Estate.

Nou bezwen arete, e sa letan la i en *calling* pou zot arete. Annou vin devan pou nou zanfan, i menm annan paran ki pran zanfan pou zot anmenn zot dan bann tel landrwa koumsa. I pa zoli. Enn ler ou vwar i pase dan pous Mr Speaker.

Be eski sa demen ki pou lev nou pei, pou anmenn nou pei devan? Bann ki dan lalkol zot osi, nou bezwen pran nou responsabilite pli serye. Nou bezwen fer sir poudir se ki nou koman sa paran nou'n ganny en responsabilite. Pou nou zwe nou rol. Annou arete akoz zanfan pe tonm dan bann latitud *anti-social*.

Pe tonm dan bann vilen pratik ou kapab dir. E sa tousala kote i al devide, dan bann lekol, dan bann kominote. E zanfan ozordi nou tann diferan keksoz lo zot. Mr Speaker, mwan mon pou donn mon sipor sa Mosyon. E menm parey mon'n dir lo komansman mwan anvi mon osi mon partisipe pou gete ki rol. Ki mwan mon kapab zwe.

Akoz mon rekonnèt poudir i annan zanfan, sorti dan mon distrik ki zot ganny mete laba. E osi petet nou ava demande, ki i annan bann paran ki pe petet si zot sant i zot tousel, ki zot, zot pe ede pou zot anmas en zanfan ki petet son paran, swa in tonm dan serten problem sosyal, ouswa ki pe viv dan serten landrwa kot bann orfelen i ete, pou zot vin devan, si zot bezwen led.

Zot pa kapab asiz dan en kwen nou tousel, kot nou panse poudir tou dimoun i pou mazine kwa ki zot pe pas ladan.

Mr Speaker mon pou fini lanmenm la, mon a dir mersi Onorab William ki mon'n loportinite pou mwan osi partisipe dan sa Mosyon.

E mon pou donn mon sipor, ki nou a kapab - nou konnen poudir pa tou keksoz ki pou ganny rezourd la. Nou a kapab sey rod serten solisyon, pou nou kapab ed bann dimoun ki pe travay avek sa bann zanfan, dan bann orfelen lo Vilaz Prezidan, pou nou kapab sey bouz kek aksyon devan. Mersi.

MR SPEAKER

Mersi. Mersi Onorab, prezan mon donn laparol Onorab Egbert Aglae.

HON EGBERT AGLAE

Mersi Mr Speaker. Bonzour Manm Onorab e tou dimoun ki a lekout. Mr Speaker Mosyon ki devan nou pe met, lanfaz lo plizoumwèn lo en lenstitisyon ki trouve dan mon distrik Port Glaud zeografikman.

E ki son responsabilite, i elarzi. I pa neserman, responsabilite Lotorite Distrik Port Glaud. Me ki dekoule anver bann lezot Minister tel ki Lafanmir e Minister Sosyal.

Mr Speaker avan mon komanse, mon ti a kontan dir mersi pou tou bann travayer ki pe travay dan sa lenstitisyon, ki pe aport swen e *care*, pou sa bann zanfan.

E osi en gran mersi pou tou bann *past village managers* ki'n pase la. Parey nou annan manman, madanm Gamatis. Nou annan Mr Jules Hoareau, nou annan Mr Toussaint, e bann ki'n swiv ankor, la ozordi, sa ki la, mon dir zot mersi pou zot devouman ki zot in donner e i annan ki ankor pe donner.

Mr Speaker nesans sa lenstitisyon an 1987, ti mark en lot *milestone* mon kapab dir dan responsabilite Gouvernman, aköz a sa bann letan avan, se plito bann lenstitisyon relizyez ki ti pe *care* pou bann zanfan,

ki nou konsider koman bann *orphans*.

E sa letan vizyon Gouvernman, e sa se atraver Prezidan Rene, se pou annan en lenstitisyon ki ava osi anmas bann zanfan, ki a risk. E ki zot napa sa *love and care* ki en fanmir ti pe *provide* zot. E osi bann ki'n pas atraver bann difikilte ki'n perdi paran. E ki zot annan en labri pou zot kapab reste. E en *orphan* i ganny konsidere koman en lenstitisyon ki donn *care* e ledikasyon lo bann *orphans*.

E i annan en dikton ki dir, e sa ti ganny site dan enn bann inogirasyon ki ti ganny fer apre serten renovasyon par Vis-Prezidan li menm. Ki sit koumsa ti dir, "*the love and care of the protection of our children, is one's life great responsibilities for children are a life greatest gift.*"

Mr Speaker, Mosyon ki devan nou, se pou kapab vwar en pe larealite ozordi, kot i konsern zerans Vilaz. E rod fason ki mannyer nou kapab adres, mwan mon pa poudir problem. Mon poudir bann *modern day challenges*, ki fer fas avek ozordi gras a sa lemond global.

Ki nou bann zenn pe grandi ladan, ki nou bann zanfan i grandi ladan. Avek sa

lespri ouver ki ozordi ki zot annan avek bann lavansman teknolozi ki egziste. E a nou laporte, ozordi kot nouvel i sirkil sitan vitman. E kot bann lenformasyon ki swa pozitiv, parey nou vwar ozordi. I fasil ariv devan la porte nou bann zenn. E sa li menm li Mr Speaker i annan son lefe ki bon, me osi i annan son bann lefe negatif.

Mr Speaker, lenportans sa lenstitisyon in enn ki'n annan diferan lopinyon lo la. I annan ki pa ti neseserman, krwar ki nou merit kontinyen annan en tel lenstitisyon parey, e ki tou paran i bezwen pran son responsabilite kot ler ou'n met nesans en zanfan, se ou responsabilite pou ou nourri, fer grandi, donn li ledikasyon e donn li lasante.

Me i pa tou letan, ki sa semen ki ou ti a swete, ouswa sa vizyon ki ou ti ava anvi vwar, i vin en realite. I pou annan bann baryer dan semen, i pou annan bann evantyalite ki kapab briz sa bann kalite rev ki en paran i kapab annan pou son zanfan.

E sa i vin dan bann diferan konteks. E mon pa tro anvi la dan sa bann detay. Me pli gro konteks se bann sityasyon lavi, e malez sosyal ki kapab pas atraver. Ki kapab

kree serten separasyon, en zanfan ek son paran. E lanmenm ler ki nou vwar poudir, letan tou bann fason fer bann *means* a dispozisyon Leta, bann negosyasyon, bann negosyasyon i epwize.

E napa lot opsyon, kot nou pou fer avek sa zanfan e se la kot i *end up* dan sa Vilaz. E osi i annan bann lenstans kot, pou sekirite sa zanfan, atraver lenstitisyon sosyal, zot vwar serten nesesite pour retir sa zanfan, dan sa lankadremman ki ete ozordi, pou re soumet li dan en lot *setting*. Sa pou son prop sekirite, akoz Lalwa, i kler lo proteksyon zanfan.

E Mr Speaker, nou merit dan en fason, dir mersi ki nou annan bann tel lenstitisyon akoz plizyer pei an egzistan, zot osi zot posed bann lenstitisyon parey.

E si nou ti tir li dan sa *equation*, i ti pou annan en lot problem dan lanmen Gouvernman ozordi, atraver Departman Sosyal, se ki ou fer, letan ou annan bann sityasyon kot ou bezwen pran en zanfan, en zanfan i anba *neglect*. En zanfan son lavi i an danze. E nou konnen poudir si nou kontinyen ekspoz li dan bann diferan sikonstans negativ, i pa pou vin e bon prodwi lavenir, pou pei demen.

E se sa ki mwan mon pe regarde nesesite son legzistans. Apre nou kapab koz lo ki mannyer nou kapab amelyor son servis, regard son ladministrasyon. E osi petet *rebrand* sa limaz Vilaz Prezidan dan li menm. E sa mon ti a swete ki kapab arive.

E ler mwan mon'n dir poudir, Vilaz Prezidan napa en gro problem li. Mon konnen ki mon pe dir. Vilaz Prezidan i annan bann *challenges* bann *modern challenges*, ki i pe fer fas avek. E se sa ki nou bezwen pe komans regarde kwa sa bann *challenges*, kote i sorti? Ki mannyer nou pou *deal* avek? E lekel, sa ki enportan se lekel ki pou dil avek?

E ler ou pe get konpozisyon vilaz, i annan son konpozisyon administrativ, nou annan son konponan sipor ki atraver son bann Lazans NCC, e Minister li menm. Nou annan sa konponan program ki nou bezwen met tou ansanm koman en mayon. E osi bann sipor eksteryer ki i kapab resevwar avek bann diferan *partners* ki deza ed vilaz.

E Mr Speaker pandan mon bann letan ki mon'n Port Glaud, depi 2011 an montan, mon'n aport soutyen vilaz, dan bann diferan domenn mon kapab dir. Vilaz in travay akote

lekol, akote Ladministrasyon Distrik, e osi akote bann biznes ki'n dan distrik. Akoz detanzaot laport i ganny tape ver zot pou kapab donn sipor.

E lesansyel pou nou se, fer Vilaz vin en *home*. Pou tou sa bann zanfan ki la, ozordi. Ozordi i annan apepre en 30tenn. Son kapasite i sipoze apepre 60. E ti annan en letan, ki ti pres ariv lo son la limit. Ki montre poudir in annan serten zefor travay ki'n ganny fer, pour ki zanfan, pa neserman antre dan Vilaz koman en premye opsyon. Me ki i ava *the last resort*.

E pour mwan Mr Speaker, letan mon pe get ladministrasyon vilaz, bann *staff* ki travay, mon krwar ki zot pe fer en travay avek zot leker si zot ankor la ozordi. E i annan ki'n la depi *donkey years*, parey nou dir. E zot in vwar diferan transformasyon ki'n arive dan sa Vilaz.

E si ozordi, nou vwar nou zot pe fer avek bann *modern day challenge*, se ki zot in vwar zot dan bann sityasyon kot, bann diferan eleman in antre dan sa vilaz, ki pe koz sa. Mwan mon pa pou la pou montre ledwa lo person, ouswa pou blanm zanfan, akoz bann zanfan ki dan Vilaz, zot sorti dan bann diferan *setting* sosyal.

E sakenn in vin avek, son karakter pou li, kot i sorti.

E si nou pa pe anmenn sa onivo *care*, par bann dimoun kalifye, zot pa pou kapab, met sa bann keksoz anba kontrol, e donn sa *second option* sa bann zanfan, sa dezyenm opsyon pou zot reganny en lavi, parey zot sipoze dan en fanmir, pou zot kapab vin en bon sitwayen demen; vin en bon etidyan, e *excel* dan zot lavi. Sa ki nou, nou ti a kontan vwar.

E in arive, e mon salye bann ki'n kit vilaz a laz 18an, ki'n reisir dan zot lavi. I annan ki pe fer son prop biznes, i annan ki'n fer son fanmir. Me pa tou ki mon'n kapab dir, in kapab reisi gras, akoz i annan serten *aftercare option*, ki manke, ki ler en dimoun i sorti dan Vilaz.

E sa ti en pti diskisyon dan sizyenm Lasanble, ki ler nou ti koz lo la. E taler an konklizyon mon pous enn pti gin petet ki opsyon ki nou kapab anmennen apre *the life after the village*, ou kapab dir.

Lot eleman ki mon krwar i enportan se program ki Vilaz i bezwen ankadre li ladan pou li kapab donn zanfan ase, ase pa lokipasyon. Me annan keksoz pou zot fer an apartenans. Akoz si mon ti dan lakour, petet mon ti annan serten liberte, sa

zanfan ti pou annan pou li kapab fer serten aktivite dan li menm.

E nou bezwen regard Vilaz dan sa konteks koman en gran fanmir, en gran lakaz, ki annan bann diferan manman e bann diferan papa ki pe regard zot ki pe pran sa dezyenm responsabilite. Aparad ki sa ki zot annan ozordi pou *care* pou sa bann zanafan, parey zot prop zanafan. Se sa lideal, se sa prensip ki ti ganny etabli o komansman. E se sa prensip ki si nou'n *deviate*, nou bezwen retourn lo la, pou sa bann zanafan.

E ler nou koz program, program i vin avek resours byensir e yer mon ti demann Minis pou kapab osi, regarde ki mannyer nou kapab donn enn pti pe resours an plis, Vilaz. Akoz zanafan pa dan prizon, zanafan i bezwen kapab sorti.

E mwan mon kontan sirtou dan Dimans, ler mon vwar zanafan pe monte, pe al Legliz Port Glaud, mon vwar zot enn dernyen lot, pe al Legliz e mon vwar zot sanze e byen ganny okipe. Sa bout ki la mon felisite mon dir, sa bann zanafan lo kote lizyenn i en nivo ki akseptab. E mon konnen poudir bann manman ek bann papa Vilaz, pe fer zot travay.

Me lot eleman ki mon krwar ki lo size program se, ki mannyer parfwa nou bezwen retir Vilaz, retir bann zanafan dan vilaz pou zot osi get enn pti pe eksteryer, fer bann vizit, fer bann *joint programme*, bann ekskirsyon ki i nesese pou zot osi pa santi zot anfermen dan en fason.

E se sa parfwa ki loter ki serten i vwar zot bezwen sove, petet dan en sans pou sey al zwenn enn zot pros. Ouswa i mank son vye zanmi laba. Me selman nou konpran poudir ki Vilaz i annan be ler ki li osi, i akey bann viziter pou vin gete. E sa ki anvi vwar son - petet son zanmi, i kapab fer bann laplikasyon atraver sa lenstitisyon. E paran osi i mars parey.

So resours i enportan pou zot pa gannyen, e mwan mon sizere ki letan Bidze i vini, i bezwen annan en konponan, ki kapab dir be sa nou pe gete ozordi. Parey ti annan bann resours ki ti ganny donner, avek bann mouvman lazene SNYC. E ozordi mannyer zot pe fonksyonnen zot pa bezwen sa kantite resours. Annou sey *divert* en pe sa bann resours, met a dispozisyon, pou program Vilaz.

E mon konnen poudir i annan bann bon ankadrer ki la,

ki pe sey zot mye. Me zot bezwen al tap laport, mandyan pou zot kapab devlop sa bann program. Lot laspe mon krwar ki, nou pou bezwen touse se lafason ki sekirite Vilaz i ete, ozordi.

E Vilaz li son lentansyon, se kreasyon se ler i ti ganny fer se pa vin en prizon kot zot bezwen anferm zot tou - ankadre *behind the wall*, parey in dir. Non pa ti sa lentansyon. E se sa vilaz son larsitektir ozordi, i enn ase ouver. Me ki bezwen annan en sekirite ki atase avek.

E ler mon'n komanse mon ti tous bann malez defi ki ozordi i egziste modernite. Nou konnen lespri i ouver ozordi, zanfann lespri i ouver. E zot regard en kantite keksoz atraver nou sistenm teknolozi enformatik. E zot kapab ganny bann diferan nide, pour zot kapab sey fer serten keksoz, ki pa neserman dan norm ek regilasyon sa Vilaz li menm.

E la kot mon krwar nou bezwen, met en pe plis lanfaz pou nou aret tande ki atraver *advert*, tel ou tel zanfann i manke, tel kantite letan. Ouswa nou tande poudir, en zanfann in sorti in al kot *neighbor* dan kominote, in kas lakaz in vole.

E mwan mon enn ki'n sibir en aksyon par en zanfann

Vilaz. Ler mon'n aprann, poudir en zanfann Vilaz ki'n pran sa keksoz. E pou mwan bann keksoz koumsa i trakas mwan, i trakas mwan, akoz i pa sipoze pe arive sa kalite pratik.

Zanfann i ganny okipe, i ganny son manze, i ganny bann donasyon detanzaot, e si i annan bann mankman ki zanfann petet ozordi i santi - par egzann en *issue* ki mon krwar nou devret pe adrese, se sa laspe teknolozi lo nivo Vilaz, ki mannyer petet nou fer zanfann, vin ganny akse enn pti gin.

Mon krwar i ava annan en diskisyon ki bezwen ganny fer dan sa laliny, pou kapab anmenn nou sipor dan sa. E ler nou pe koze la ozordi, mon konnen petet i kapab annan bann biznessmenn, i kapab annan bann lenstitisyon, ki pare petet pou vin devan annou fer sa zes e nou ava soulaz en pe sa bann zanfann.

Lot size ki mon ti a kontan aborde Mr Speaker, se *the branding and the image of Vilaz* li menm. Eski ozordi, mon krwar a sa letan ler ti ouver ti apel Vilaz Prezidan, eski la nou santi poudir, nou merit pe gard sa non koman Vilaz Prezidan? Eski akoz en konotasyon ki sonnen par deryer se, letan Prezidan Rene ki ti annan sa vizyon pou kree sa *orphanage*, e

se son madanm, madanm Geva Rene ki ti patronn sa Vilaz.

E pour nou ozordi avek revolisyon apre sa kantite letan, plis ki trant ekek lannen ki Vilaz i an egzistans. Nenport ki, ki pou vini petet en etranze, ou dir li *this is the President's Village*, definitivman i atas en konotasyon avek Prezidan Larepublik.

E prezan eski, Prezidan Larepublik li i annan menm vizyon, kot i konsern sa Vilaz? Akoz kestyon, e i ti annan komantr ki ti ganny fer. So eski i pa en moman letan...

MR SPEAKER

Sorry eskiz mwan. I annan en Onorab ki'n dan konversasyon sanses, ki'n enteronp mwan parfwa. Mon ti a osi dir ki i en mank respe, pou sa Manm ki pe koze. E mon ti a demann li pou arete silvouple. Mersi Onorab kontinyen.

HON EGBERT AGLAE

Mersi Mr Speaker. Nou pe koz lo en size enportan, kot nou pe met bann sizesyon enportan, e nou pa - Mon pa pe met okenn politik dan sa konversasyon ki pe ganny fer. E ki mon swete ki sa Manm ki pe fer sa kalite komantr...

MR SPEAKER

Onorab mon'n *deal* avek sa kontinyen avek ou *speech* silvouple.

HON EGBERT AGLAE

Mersi Mr Speaker. Pour mwan Mr Speaker eski pa moman letan petet regarde enn pti gin pa nou tou ki partaz menm vizyon kot i konsern sa Vilaz.

E dernyen pwen ki mon pou touse se laspe ledikasyon, ki atase avek Vilaz. E bokou lenstitisyon sirtou, nou annan Lekol Port Glaud, nou annan lekol Grand Anse e lekol Anse Boileau koman sa *secondary* rezyonal, i akey bokou nou bann zanfan. E in annan bokou konsern ki'n ganny met devan, atraver Lenstitisyon Skoler, kot i konsern serten konportman bann zanfan.

E a en pwen osi in annan serten lekol, ki ti pe komans - mon pa pe dir refize pou pran sa bann zanfan - me osi ti pe komans mazin met en kota lo lakantite zanfan a en pwen, ki zot ti ava kontan pran sorti dan Vilaz. Akoz zot dir ou, poudir sa bann zanfan bokou zot, zot akademikman *challenging*.

Zot annan en *attention lifespan* ki vremen kourt, baze lo zot kot zot pe sorti dan li menm. E zot osi, a lafen lannen ler rezilta, zot kestyonn *the average mark*, i dir ou, be nou

ti kapab fer pli byen. Nou *average* in desann, se akoz serten group zanfan ki sorti dan Vilaz Prezidan ki'n dan zot lenstitisyon.

E sa i en realite, ki mwan mon'n vwar, ki mwan mon'n antann dan mon zorey. Mon pa pe koz manti. E pour mwan, mon krwar i merit annan bann konversasyon direk. Akoz ozordi, parey definisyon *orphanage* se pou *provide care and education*. I annan en laspe ki mon krwar Minister Ledikasyon i bezwen, zwe en rol enportan, dan zesyon bann *orphanage*.

Pou vwar ki kalite, ledikasyon *after*, ler mon pe dir apre lekol ki bann zanfan i swiv. Akoz zanfan i sipoze ler i sorti dan en lenstitisyon apre ler. I kapab annan *homework*. E menm i annan zanfan ki pou swiv atraver zot paran pou fer *extra class*.

Now eski lo vilaz, nou kapab dir nou satisfè avèk apre ler ki ledikasyon ki zanfan i gannye, eski i annan sa kantite letan ki pe ganny donner ek sa bann zanfan? Pour zot kapab *recap* sa ki zot pe perdi, ouswa sa ki zot in perdi letan zot ti dan sa, sityasyon kot zot sorti?

E pour mwan sa i enportan ki, dan program Vilaz i merit annan sa bout

edikasyonnel. Kot i ava annan en dimoun, ki sorti avèk Minister Ledikasyon, kot i ava annan sa responsabilite pour *oversight*, pou kit en lizye lo ki kalite. E eski pe ganny fer pou sa bann zanfan.

E mwan pou mwan Mr Speaker sa i bann rekomandasyon ki i enportan ki nou konsidere osi. Akoz si nou anvi zanfan, sorti byen apre ki zot sorti dan vilaz. Sa bann konponan enportan, i merit ganny adrese e i ganny *deal* avèk.

MR SPEAKER

Onorab ou pe apros 30minit e mon a envit ou. Mersi.

HON EGBERT AGLAE

E pou terminen Mr Speaker, poudir ki pa tou zanfan Vilaz ki'n bann zanfan, bann zanfan ki ozordi i annan bann konportman ki pa neserman dan norm. I annan bokou ki egzampler, i annan bokou ki kreativ, i annan bokou ki partisipe, e i annan bokou ki pe fer byen dan zot ledikasyon. E mon santi ki, nou kapab koman bann Manm *MNA*, Onorab aport soutyen kot nou kapab, e regard sa lenstitisyon avèk en lot kote lizye.

Akoz ozordi i sa zanfan, demen i kapab enn nou zanfan

ouswa enn zanfan nou pros, ki kapab *end up* dan en lenstitisyon parey. E avek sa Mr Speaker, mon pare pou donn sipor Mosyon. Mersi.

MR SPEAKER

Mersi Onorab. Mon a donn laparol Onorab Sandy Arissol.

HON SANDY ARISSOL

Mersi Mr Speaker, bonzour tou dimoun a lekout espesyalman bann zanfan. Mr Speaker i annan en keksoz ki La *Génesé* i fer provizyon avek *Génesé* i premye liv dan Labib, i koz lo de personnaz. Dan *Génesé* i dir ek ou o komansman *Dieu* ti kree *l'homme* a son *image*.

Dezyenmman i dir ek ou letan *Dieu* i get dan zarden i vwar *l'homme* li tousel, alor i met zot dormi, i pran en bout avek zonm, i kree sa ki nou apel fanm. Ozordi sanmenm sa bann fanm i la.

Apré i pran zonm avek fanm i beni zot, e i dir ek zot en keksoz, '*Féconds devenez nombreux remplissez la terre.*' Savedir, se pour sa rezon nou la ozordi. Sa i vin sa trwazyenm personnaz ki nou pe koz lo la se bann zanfan. Savedir zanfan depi kreasyon, zanfan in enn keksoz enportan dan lavi en zonm avek en fanm.

Akoz mon dir sa, parske letan en fanm ek en zonm zot antre dan zot letan pou zot divorce, premye keksoz ki zot lager Ankour, "rann mwan mon zanfan. Donn mwan mon zanfan, mon zanfan ki pou reste ek mwan, mwan ki pou okip mon zanfan." Apré ki rod later ek lakaz.

Napa en moman pli enportan dan lavi en koup, se letan son zanfan i ne. Se la kot i poste portre. I komans rode lekel ki pou vin paren, lekel ki pou vin marenn. La i komans rod non sa non-pa ale.

Mon a donn non mon papa, mon a donn non son desandans. Parske zanfan i en keksoz *la joie* dan lavi en koup. Letan nou, zanfan i *graduate*, tou paran i kontan. Manman i kontan, papa i kontan, son frer, son ser i kontan nou poste portre, nou dir ki Degre in gannyen, konbyen boulon lo son zepol pou annan.

Kote in al pran son boulon, kan i pe desann e apré nou pet *champagne*. Mr Speaker nou pe koz lo zanfan, zanfan i reste en trezor dan lavi zot paran.

Me par kont sa i en kote zwa de viv serten zanfan. Parey mwan mon'n gannyen avek mon paran Nancy ek Jean Baptiste Arissol, kot zot

anmenn nou, koman zot bann zanfan, zot ou'n soutenir nou koman en fanmir. E la byento le 22 Novanm zot pou selebre 45an laniverser maryaz e zot ankor ansanm. Pli kontan ki *jamais*, e zot ankor kontan zot bann zanfan.

Mr Speaker sa i en kote lavi en fanmir. Me eski tou zanfan dan lemonn, oubyen dan Sesel i doue, pou annan sa kalite lavi, ki plizyer nou in annan? Savedir Mr Speaker, pou li reste avek son papa, avek son manman ziska i osi ariv son laz mazer pour li komans parkour lavi. Non pa nou tou ki doue Mr Speaker.

E Sesel i en legzanp, si ozordi nou pe koz lo en Mosyon ki annan pou fer avek bann zanfan ki pe reste dan en Lorfelina, se parske sa rezon. E Onorab William in vwar son devwar avek tou bann lezot Manm Lasanble, ki ti atase avek sa dosye, pou anmenn en Mosyon, zisteman pou nou kapab revwar ki mannyer nou soutenir sa lenstitisyon. Enkli bann zanfan, ki reste dan sa landrwa ki nou pe koz lo la ki'n spesifye lo *Order Paper* spesifikman se Vilaz Prezidan, Mr Speaker.

E Mosyon pe demann, pe koz lo Vilaz Prezidan i pe demann Gouvernman pou

revwar bann Polisi. An relasyon ek stratezi pou annan Lalwa, pou amann Lalwa Zanfan pou fasilite en swen konpreansiv dan nou pei.

Vilaz Prezidan, letan ti ganny konstri dan lespri pou mwan, mon mazine ti ganny konstrir avek en bi pou annan en lakour, pou bann zanfan ki pa neserman ti annan en lakour.

Me eski ozordi i ankor leka? Eski ozordi bann zanfan ki pe reste, oubyen viv Vilaz Prezidan i bann zanfan ki neserman napa en lakour? Mon pa tro krwar i leka. Me par kont i annan bann zanfan ki reste Vilaz Prezidan ki wi, i napa en lakour, swa in perdi son paran. Alor in ganny proteze atraver Leta. Met li dan en lenstitisyon pou donn li son bann bezwen neser.

Me par kont mon kapab konpran poudir si en Mosyon in ariv dan Lasanble, pe demande pou reviz Polisi, petet i annan zanfan, ki pe ganny mete Vilaz Prezidan pou lezot rezon par egzanp.

Par egzanp mon kapab sit en rezon, si en zanfan pe ganny problemn disiplin, oubyen son paran pa kapab deal avek li. Vilaz Prezidan kekfwa i sa landrwa, ki sa zanfan ki Servis Sosyal, oubyen lezot Lazans i

santi sa zanfan, i pli byen laba pour li reste.

Me par kont eski i vin en problemn? I vin en problemn parske, si Sandy Arissol, ti deza annan en lakour i ti deza annan serten lenfliyans deor, e i vini, i vini i zwen sa bon zanfan dimoun ki Onorab William ki anndan dan *home*, eski i annan en lenfliyans la?

Mon mazine, sa i bann keksoz ki nou kapab tande, oubyen bann keksoz ki nou kapab koz lo la. Ozordi atraver sa Mosyon. Me selman Mr Speaker, mon krwar i enportan pou nou osi apresye bann travay ki pe ganny fer ek bann zanfan.

Parey i ganny mansyonnen par plizyer bann Manm ki'n koz avan mwan, nou bezwen osi rekonnet poudir nou annan bann endividi dan Lasanble, ki'n vini ki'n pran bann zanfan. Parey nou ti dir lontan, ou annan ou zanfan sonnyen.

Lontan dan lakour, kot bann dimoun aze, toultan ti annan en zanfan ki nou ti apel zot, sa mon frer sonnyen, sa mon ser sonnyen. Parske lontan ti napa Vilaz Prezidan.

Alor letan en lakour ti annan en problemn, se en tantin ki ti anmas ou. En tonton ki ti responsab ou. Ou gran frer

ki ti okip ou. Me lavites ki lemonn pe ale, ozordi sa fer ki'n sanze. Tou dimoun, i bizi dan son prop lemonn.

Alor Leta i bezwen vwar li, poudir li i bezwen responsab bann zanfan, ki byen ganny proteze ki pa pe ganny proteze ankadre zot. E fer sir, ki zot osi zot ganny en akomodasyon ki an sekirite, ki ideal pour zot kapab grandi.

Me par kont Mr Speaker, nou osi annan dan lasosyete deor bann dimoun parey mon dir, ki souvandfwa, in pran bann zanfan in met reste kot li koman son zanfan. Ziska ler i ganny son laz mazer. E in bouze dan son lavi.

Mon osi annan legzanp kler, kot nou annan bann frer ki son manman oubyen son papa ti'n tonbe dan lasosyete. Me li in reste koman sa frer, ki'n soutenir lafanmir, kot letan son pti frer ti ganny pran avek li, met Vilaz Prezidan. Li ozordi letan in matir dan lavi i travay, in ganny son landrwa reste Mr Speaker, in fer sir in retournen in al pran son pti frer dan fwaye. In anmenn avek li.

Se sa ki nou, nou bezwen promovwar ozordi atraver sa deba. Pour ki bann zenn, ki'n byen arive dan lavi, si ou annan en frer, si ou annan en kouzen, si ou annan en kouzen en

fanmir pre ou osi ou bezwen kapab kalkile, ki mannyer lasosyete in ed ou pou benefisyè ozordi. Pou ariv kot ou ete, me osi kapab anvoy ou lanmen pou gete ki mannyer ou kapab anmas ou kouzen, ou kouzen oubyen ou pti ser, ou pti fer ki li in ganny mete akote. Pou ed li pou gid li dan sa travay, dan sa lavi parey nou tou nou ti a kontan viv.

E mwan mon konnen Mr Speaker, poudir letan mon koze poudir i annan plizyer legzanp deor. E sa bann dimoun ki'n ede avek sa, zot in fer li trankilman san medya, san pibliye. Parske sa sete zot swa pou asiste bann zanfan ki bezwen sa swen. E pou donn Mosyon sipor, Mosyon Onorab William ki mon krwar i en bon Mosyon, parske letan nou sitan pe mazin tou lezot keksoz dan lavi. Manm Lasanble nou bizi avek distrik, nou bizi avek Prozedlwa ki Gouvernman i anmennen;-

E ozordi mon kontan poudir i annan en Mosyon ki'n ganny anmennen pou nou mazin osi sa bann pti dimoun dan lasosyete, ki parfwa ki ganny neglize, par premyerman zot paran.

E osi lasosyete i responsab zot. Alor mon santi poudir Mosyon ki pe anmennen par

Onorab William, pe demann pa zis nou Lasanble Nasyonal i pe demann Gouvernman pou premyerman revwar Polisi.

E mon krwar letan nou, nou pe koz lo sa Mosyon moralman bann dimoun ki pe ekoute, zot osi zot bezwen kapab demann avek zot lekor. Ki mwan mon kapab fer avek koman en lendividi, pou bann zanfan ki reste dan bann fwaye.

Parey Onorab Regina Esparon in mansyonnen. Mosyon pe fer referans avek Vilaz Prezidan. Me nou annan plizyer fwaye, ozordi dan pei. Me sa bann fwaye, i ganny zis enn pti piblisite zis pandan letan Nwel. Letan i annan en donasyon ki pe ganny donner e medya i traverse.

Tou dimoun i konnen poudir, lala i annan enn pti donasyon ki'n ganny donner. Me pandan lannen, i enportan pou nou kontinyen, mazin zot rode ki mannyer nou kapab ed zot. Rode kwa ki nou kapab fer pou zot. E pour osi soutenir sa bann dimoun, ki travay avek sa bann zanfan.

Nou tou ki'n travay dan Ledikasyon, nou konnen poudir travay avek zanfan, en lot dimoun Mr Speaker, i pa neserman en keksoz fasil.

E mon kapab konpran zisteman bann dimoun ki okip

bann fwaye, zot kapab pe gannyen ek bann zanfan ki pa pou zot. Me zot fer li avek lanmour, bokou senserite zisteman pou nou kapab ankadre nou bann zanfan ki ozordi in vwar zot dan en difikilte lavi. Kot zot paran pa kapab soutenir zot, me zot bezwen ganny pran e ganny mete dan en landrwa kot zot en pe pli sekirite.

Me mon ti a kontan osi Mr Speaker, dir ek bann paran ki pe ekout nou ki annan son zanfan, pou kek rezon dan Vilaz Prezidan oubyen dan lezot fwaye. Tou dimoun i tonbe dan lavi. So letan nou tonbe dan lavi, nou bezwen rebran, nou bezwen leve, pour nou get pli devan, pou nou gete ki mannyer nou kapab soutenir nou lavi.

Ozordi dan nou lavi i annan kantite led, ki nou kapab gannyen zis parfwa nou bezwen tap laport, rode pou nou kapab ganny asiste. Annou pa reste nou tousel. Koze vin devan, rode kote ou kapab ganny sa led, pour ki ou kapab ganny ede, pour ou kapab ed en lot dimoun. Mon kontan servi sa legzanp.

Letan ou dan avyon, toultan i annan sa bann *advert* ki fer. Atas ou sentir, fer sir ou *luggage* in ganny mete byen anler, anba *seat*.

Apré i annan se enn ki dir, si zanmen mask i tonbe anler pou ou ganny loksizenn, fer sir ou met sa ki pou ou avan, epi ou asiste sa vye dimoun oubyen sa zanfan o bor ou. Alor mon pe lans en lapel, pou nou tou ki bezwen led, bann paran ki'n tonbe dan lavi. Rode led, tap laport, gete ki mannyer ou kapab ganny ede, pour ki osi ou a ganny sipor, ou a ganny kouraz, pou ou kapab al ed ou zanfan ki pe viv dan en fwaye pou li sorti pou li ganny en semen, e pour li kapab li osi soutenir son fanmir.

Letan nou lo Polisi Mr Speaker. Mon ti a kontan osi ki Gouvernman i revwar, Polisi an relasyon ek letan bann zanfan, i ganny 18an. Bann zanfan ki reste dan bann fwaye, souvandfwa letan zot ganny 18an ki arive avek zot? Zanmen zot in deza konnen lekel zot manman, oubyen zot papa, swa in mor, zanmen zot in deza reste avek en tantin, avek en kouzen ek en kouzen.

Be ler mon ganny 18an, ki arive avek mwan? kote mon ale? Mon krwar tousala i bann Polisi ki nou kapab balanse, koman en Gouvernman e koman en Lasanble nou bezwen donn sipor sa Mosyon. Onorab William zisteman, pour ki bann zanfan zot a kapab viv dan

demer ki nou tou nou ti a kontan, pour zot progresse dan lavi. Pou nou ganny bann sitwayen ki for, responsab pour ki nou pei i kontinyen bouz de lavan Mr Speaker.

Avek sa detrwa mo, mon ti a kontan prezant mon sipor pou Mosyon Onorab William. Mersi bokou pou zot ki'n ekoute.

MR SPEAKER

Mersi Onorab, mon a pas laparol Onorab Georges Romain.

HON GEORGES ROMAIN

Mersi Mr Speaker. Bonzour tou koleg Onorab, e en bonzour spesyal pou tou bann zanfan ki dan fwaye. Mr Speaker, sa Mosyon ki devan nou, pe demann nou pou regard en pe lo bann Polisi e stratezi ki pe afekte bann zanfan ki dan fwaye dan Sesel.

E pour mwan sa Mosyon i en keksoz ki nou bezwen, donn latansyon lo la. Akoz nou pe koz lo zanfan ki'n perdi enn ouswa tou lede paran, e ki zot merit bokou plis sipor dan staz ki zot pe grandi e devlope. Zot sityasyon i pli difisil, ki en zanfan ki pe viv ek son paran e ki pe reste kot son lakour.

Mr Speaker, nou koman en pei nou bezwen fer sir, ki sa bann zanfan ki pe viv dan sa

bann fwaye i annan en sistenm ki protez zot. E ki esey donn zot menm lanmour, menm striktir e menm sipor parey en lakour normal. Nou bezwen realize ki bann zanfan dan sa bann lenstitisyon. I bann zanfan ki pli vilnerab, ki lezot.

Akoz zot in pas dan bann sityasyon ki difisil dan zot lavi pou ariv kot zot ete, e i pa'n fasil pou zot. I annan zanfan ki ozordi, zot dan sa bann orfelen, Orfelina. Menm si zot paran i ankor vivan, me akoz serten problem nou vwar ki zanfan i bezwen separe avek zot zanfan, ki pa kapab okip zot zanfan. Tou sa bann lenstans, i bann sityasyon ki anmenn deboulir dan lavi, en zanfan.

Mr Speaker e se sa, ki fer en zanfan vilnerab e si napa bann bon Polisi pou ankadre sipor ki zot gannyen, nou kapab vwar pli gran problem leve avek sa bann zanfan, dan lefitir. Mr Speaker, mon salye zefor ki bann *staff* dan bann fwaye pe fer ozordi, pou donn sa servis avek bann zanfan. E nou konnen ki i pa fasil pou zot e ki zot pe met bokou zefor dan zot travay.

Me Mr Speaker, mank resours i enn, bann difikilte ki sa bann fwaye pe fer fas avek. Si napa ase travayer dan sa fwaye se sa bann zanfan ankor,

ki pou ganny afekte. Napa ase lizye lo zot, e se la nou ki vwar bann zanfan i komans mank disiplin, e komans annan move konportman ki afekte latmosfer sa bann zanfan.

Lezot zanfan i komans osi swiv dan sa bann move konportman, e se sa la ki kontrol i perdi Mr Speaker. E enn bann keksoz ki nou bezwen fer sir, se pou nou pa rod zis plis travayer. Me osi met lanfaz dan travayer ki kalifye, ou menm sa ki annan potansyel pou aprann dan sa metye.

Mr Speaker pa nenport ki endividi ki kapab, travay avek sa bann zanfan dan en tel sityasyon. Akoz zot bezwen konpran sa bann difikilte, emosyonnel e troma ki en zanfan in pas ladan. E alor, en dimoun ki vin travay avek zot ti bezwen enn ki ganny serten formasyon de baz pou travay, ek zanfan. E se la kot nou bezwen promouvwar sa bann loportinite lantrennman dan sa sektor.

Mr Speaker, enn bann problem ki osi souleve avek sa bann zanfan, se mank sekirite pou asire ki zot landrwa i ganny proteze. Me pou osi protez, travayer ki rankontre difikilte, pou gard disiplin dan zot lakour. Nou vwar ki zot bann landrwa i merit ganny byen

sekirite pour ki zanfan pa kapab kit lakour san lotorizasyon.

Sa i en problem ki pe ganny rankontre ozordi. E i devret ganny adrese ase vitman, Mr Speaker. Si en zanfan in ariv dan sa lemonn, i touzour responsabilite en paran pou asire ki son zanfan i ganny tou son sipor nesaser, pou li grandi e devlope.

Me ler en zanfan i perdi son paran, se la kot nou bezwen annan en *safety net* pou sa zanfan, pou ede protez li. Me annou pa zis depan lo en Gouvernman, sa zanfan i osi annan fanmir ki kapab ede, pou soutenir li oubyen pou sonny li, oubyen menm pou asiste li si i pe reste dan en fwaye.

Mr Speaker e la mon enplor bann Manm fanmir pou esey donn en koudmen. Pou ofer sa lasistans, kot zot kapab. Se en kominote osi, ki bezwen esey donn sa lanvironnman ideal pour sa zanfan. E la Mr Speaker, mon osi fer lapel avek sektor prive ou menm bann lezot lasosyasyon non-gouvernmental ki kapab antre dan serten partenarya avek sa bann fwaye pou ede avek bann lezot aktivite, ki kapab detann sa bann zanfan. E gard zot lo en bon semen.

Petet nou bezwen regard dan devlopman bann program, kot nou ankouraz bann fanmir pou formelman enterakte avek sa bann zanfan dan fwaye.

I annan bann group volonter par egzanp, ki kapab donn sipor sa bann zanfan, ou menm organiz aktivite sosyal pou zot. Mon konnen ki annan serten fanmir ki pran enn de sa bann zanfan dan *weekend*, pou pas letan avek zot. E i enn menm annan ki'n finalman adopte sa bann zanfan. E esey donn sa zanfan en lavi en pe pli normal.

Sa se ki enportan, a lafen dizour Mr Speaker, pou kapab reentegre sa bann zanfan, dan en lakour e dan zot kominote. Alor Mr Speaker, mon pou donn mon sipor pour sa Mosyon. Mersi Mr Speaker.

MR SPEAKER

Mersi Onorab. Mon a donn laparol Onorab Naddy Zialor.

HON NADDY ZIALOR

Mersi Mr Speaker. Bonzour Onorab, bonzour tou dimoun ki a lekout. Bomaten i annan en Mosyon devan, ki mon krwar i en loportinite, pou nou ankor enn fwa koman bann dirizan, ede dan direksyon desizyon ki

nou pran koman en pei. E koman en Gouvernman.

E sa Mosyon, i en moman pou nou asize parey nou pe fer la, donn nide ansanm pour nou anmenn, anmenn nou bann Polisi e stratezi azour avek larealite ozordi Mr Speaker. E la mon ti a kontan dir en keksoz, napa en zanfan ki demann son nesans, e letan en zanfan i vin o monn i pa konn son desten, i ne, i grandi, i vin en adilt.

E pli tar i osi vin en adilt e pli tar i osi, i fer zanfan. E parey Onorab ki'n koze avan mwan, i annan zanfan ki ne, dan en lanvironnman konpreansiv, pozitiv avek tou bann letap lavi, ki ganny mete a son dispozisyon.

Me par kont pa tou zanfan, ki ganny sans pas dan sa leksperyans ki mazorite zanfan i pas ladan. E la mon mazin bann zanfan, ki dan bann sant parey Mosyon i dir. Dan bann sant orfelen ki zot, zot lavi i pa neserman sa lavi ki ti ekspekte. Zot ti pou pas atraver, koman en zanfan. E i enportan, i enportan ki nou annan sa bann diskisyon, i enportan ki nou osi zet en regard ver zot.

Onorab, Arissol atraver ou Mr Speaker in tous en keksoz ki primordyal, e in dir ki dan lepase nou'n annan bann frer

sonnyen, bann ser sonnyen ki granmanman adopte, ki gran papa in adopte ki nou'n grandi ansanm. In vin parti nou lavi, e parfwa nou donn zot sa leksperyans, kot pli tar, zot annan serten gratitid anver sa manman ek sa papa ki'n fer zot grandi.

E mon santi, e la nou pe koz Vilaz Prezidan, laba osi i annan bann manman, bann papa, ki ekip bann zanfan ziska laz adilt. E mon santi, ki moman arive osi, pou nou montre nou lapresyasyon anver zot. E dir zot mersi, pou sa travay ki zot fer. I pa en travay, me i en vokasyon, ki zot fer li mon prezimen avek bokou lanmour.

Mr Speaker, Mosyon pe demande ki nou revwar Polisi, stratezi e Lalwa i ganny amande pour ki i annan en swen pli konpreansiv dan pei, vizavi bann diferan orfelen. *Orphan* bann landrwa ki nou *cater* pou bann zanfan.

E la mon anvi nou retourn an aryer, i osi swiv en seri Mosyon ki'n pas isi atraver nou Lasanble, mon vwar sa i pe may ek kanmarad. Parski i annan Mosyon par egzantp, ki'n ganny anmennen atraver Onorab Esparon, atraver Onorab Desheila Bastienne, e osi atraver Onorab Doyace Porice,

ki'n koz lo byennet bann zanfan, ki'n koz enn pti pe dan laliny stratezi.

E la mon mazine ki, enn bann travay ki Gouvernman pou bezwen fer, se petet regarde ki mannyer tou sa bann diskisyon, ki nou'n diskite i kapab asize etal lo latab e vwar ki nou fer pour lefitir.

Sa zanfan ki viv dan Vilaz Prezidan, i al lekol, i retourn kot Vilaz Prezidan, i partisip dan bann spor lwazir, i al dan segonder. Probableman i partisip dan spor. Me apre i retourn kot Vilaz Prezidan, i al dan pos-segonder.

Son lakour son lakaz, se sa vilaz li menm. Alors mon swete ki atraver sa Mosyon, nou ava pe elarzi enn pti git, nou fason panse premyerman vizavi bann Orfelina, bann orfelen bann vilaz, vizavi Vilaz Prezidan li menm, kot sa bann zanfan i reste.

E la letan nou pe koz Polisi, mon mazin enn pti pe dan laliny parey Onorab Arissol ti pe dir. Sa frer sonnyen, mon mazin bann Polisi adopsyon, ki annan Sesel, ki fason nou kapab ankouraz. Parske lontan enn bann, mannyer mon konpran enn bann kondisyon se ki fodre i annan sa, mwayen konservativ kot fodre en koup ki'n marye.

Me plizanpli nou pe viv dan en lemonn ki pli modern, ki pli dinamik, kot ou annan petet bann paran tousel, ki li i annan tou fasilite, ki li petet i anvi pran sa zanfan e elve li, e fer li grandi pou donn li sa lanvironnman *conducive*.

E mon swete ki dan sa laliny osi, nou a pe vwar enn pti git ki direksyon ki nou pran. Mon mazin letan nou pe koz lekòl, Onorab atraver o - Onorab Aglae in dir ki annan serten lekòl ki ti pe mazin donn kota vizavi sa bann zanfan letan pou pran zot dan bann lekòl.

E la petet, i vin lo kote *mindset*, petet Vilaz i merit vin enn pti pe pli ouver, vizavi i annan bann en koleg lekòl. Ki li i dan son *setting* familyal. Me i adopte en zanmi ki kot Vilaz, ki i ava pe viv en lavi kotidyen kot petet zot aprann ansanm. Zot pas *weekend* ansanm, mon pa konnen si annan a ler aktyel. Me sa osi i ava pe ede vizavi, revwar Polisi Mr Speaker.

E mon krwar sa ki enportan la, se ki i annan en dezir kardinal pou nou enplimant en lespri *inclusion*. En lespri kot nou anvi kot nou zenerasyon lavenir i annan en sanzman direksyonpanse, en sanzman direksyon fason fer.

E la mon ankor mazin bann paran, e Onorab Esparon

in met bokou lanfaz lo la. Bann paran ki zot deza annan en serten *background* ki pa neserman - mon pa poudir pa akseptab me zot pe pas dan zot difikilte e zot vwar ki zot annan en zanfan, de zanfan, trwa zanfan, kat zanfan. E Gouvernman i vwar li oblize, pran sa bann zanfan e met zot dan en fwaye.

E mon krwar dan sa loptik, i annan travay ki nou bezwen osi fer direktman avek bann paran, pou donn zot sa sipor, sa ledikasyon, vizavi petet *parenting*, vizavi pou amelyor zot stati, stati sosyal. Me sa ki pli enportan, mon krwar i ava en loportinite pour nou dir ek bann paran ki annan en zanfan. Dan nenport ki orfelen, orfelina pou zot pa bezwen abandonn zot zanfan.

Pou zot tanzantan dan *weekend*, osi letan ki mwayen i permet ale e rann enn pti vizit, kit sa *bond* paran zanfan anver zot. Mon krwar i ava en loportinite osi, pou nou revwar enn pti git bann fasilite ki annan kot vilaz. Enn bann pwen ki mon koleg ki'n koze, mon bann koleg ki'n koze in touse. Sa laspe teknolozi, sa laspe *setting* parske i zot lakour, *setting* en lakour.

Sa laspe fer li pli *conducive*, pli *friendly* anver sa

bann zanfan. Mon pa konnen si yer nou'n aprann ki annan en separasyon ant fiy ek garson. Mon swete ki annan en separasyon ant *teenagers*, e bann ki dan staz *early childhood*. Ki zot kapab vreman annan balans. Parske parfwa, parey in dir sa bann zanfan zot in deza vin avek zot bann *issues*.

Me letan ki ou pe melanz tou ansanm, sa osi i annan serten laspe negativ, ki kapab apre retourn ver sosyete.

Mr Speaker mon pou aport mon sipor sa Mosyon. Mon pou osi lans lapel avek nou ki otour sa latab, pour nou osi pa zis donn sipor, pour zis lev nou lanmen donn sipor anver Mosyon. Me osi regarde koman dirizan, ki manner petet fizikman, nou kapab aport nou soutyen anver sa lenstitisyon.

E petet osi pour ede dan *mentoring* zanfan ki lo vilaz. I ava en loportinite osi pou nou fer sir, sa bann ankadrer ki la, zot osi pe ganny bann *proper training* e *empowerment* lo ki manner pou vreman annan pli bon zesyon sa lenstitisyon li menm.

Alors san tarde, sa ki mon dir bokou mon pe osi donn mon sipor pou sa Mosyon. Mersi Mr Speaker.

MR SPEAKER

Mersi Onorab, nou a pran poz la e nou a rebran deba 11er. Mersi.

(BREAK)

MR DEPUTY SPEAKER

Bonzour tou Manm Onorab e byenveni pou kontinyasyon nou travay ozordi. E nou deba lo Mosyon prezante par Onorab Waven William. Prosen entervenans se Onorab Audrey Vidot.

HON AUDREY VIDOT

Mersi Mr Speaker, bonzour Mr Speaker. Bonzour tou Manm Onorab. bonzour tou dimoun ki a lekout. En bonzour spesyal pou bann zanfan e travayer dan bann fwaye.

Mr Speaker parey pli boner mon koleg Onorab Zialor in fer resorti, se pa en zanfan ki demann son nesans. Me pe enport sironstans nesans en zanfan, sa zanfan i reste inosan. E i en benediksyon. Nou rekonnet e tris pou vwar, ki pa tou zanfan ki ganny sa loportinite, pou ganny akeyir dan lebra son paran avek lanmour, lafeksyon, e ganny sa proteksyon ki i merite.

Nou osi rekonnet ki Sesel, aköz nou bann defi sosyal, nou'n vwar bokou paran tousel.

I annan paran ki'n kapab pran swe avek zot zanfan. Pe enport bann diferan defi lavi, e mon sezi sa loportinite pour felisit sa bann manman e papa tousel ki'n fer bann bon travay. Pou zot kapab donn sa lanmour, sa lafeksyon, sa letan zot zanfan.

E ki'n kapab ankadre zot dan sa sosyete ki nou pe viv ladan ozordi. Me osi mon le anvoy en mesaz, ozordi bomaten pou bann paran. Spesyalman bann manman, bann papa, ki'n rezet zot zanfan. Ki pa pe donn zot sa lanmour, sa lafeksyon, ki i merite ozordi.

Dan lavi nou konnen, napa personn ki perfe, me i pa zanmen tro tar pour sanz zot lavi. E apresye sa kado ki Bondye i donn zot, e sa se en zanfan. Akoz pa tou dimoun ki ganny sa loportinite en paran, pou vin en paran.

Mr Speaker, Mosyon ki devan nou Lasanble pe demann Gouvernman, pou revwar Polisi, stratezi, pou anmenn Lalwa zanfan, fasilite e swen konpreansiv dan nou pei. Alors mon pou partaz bann pwen swivan, parey lezot mon bann koleg in fer depi bomaten.

Gouvernman i bezwen rekonnet, sityasyon lavi ozordi, e merit en tel vilaz. Vwar lenportans, akoz i bezwen

annan en fwaye. Se atraver sa ki pou ed zot kapab, vwar bann Polisi e stratezi, ki merit ganny formen. Pour ki nou annan nou en fwaye, baze lo en zanfan ki napa en Lakour, ki napa en fanmir e kot sosyete, kominote, nou rod fason ansanm avek sipor Gouvernman e lezot.

Pour nou vwar ki mannyer nou kapab, ankadre en lakour en landrwa kot sa zanfan i kapab ganny sa lanmour ek lafeksyon ki i bezwen.

Mr Speaker letan Mosyon pe demann Gouvernman, pou anmenn Lalwa pou amann Lalwa kot i konsern Drwa Zanfan, e proteksyon zanfan, i bezwen osi annan bann program prevansyon, pou bann zanfan konn son drwa e son responsabilite. Pour ki sa bann sezour ki i fer dan vilaz, orfelen, bann travayer dan vilaz osi bezwen ganny okipe, byen bann lankadremman, pou zot kapab okip sa bann zanfan, pou kapab ed sa bann zanfan.

Ozordi nou annan bann zanfan, ki a tre zenn az, parey loter Mosyon in fer resorti ki zot pe angaz zot dan bann aktivite anti-sosyal. Ki swa bann sibstans, me osi nou annan nou bann zenn, ki pe angaz zot dan bann relasyon seksyel. E nou konnen, menm si parfwa i

tabou pou nou koz lo la, pou en pti pei.

Me nou konnen poudir zanfan antre zanfan, i annan relasyon seksyel. E bann landrwa, zanfan pa pe ganny sa lanmour, sa lafeksyon paran, sa gidans, an plis. E la kot nou vwar kot sa bann defi i arive. E nou bezwen fer otan posib, pour ki nou bann zanfan i ganny byen ankadre, byen proteze pour ki zot konpran, ki konsekans bann tel aksyon. Ler zot angaz zot dan sa bann aktivite.

Alors i enportan ki bann travayer i byen ganny okipe, e ganny sipor ki swa atraver resours imen, ki swa atraver bann lankadreman program ki pou ed zot kapab ed sa bann zanfan dan Vilaz. Pour ki zot vin sa sitwayen demen ki nou tou nou ti ava voudre vwar.

Mon pou siporte ki merit annan en striktir ki kapab ed nou bann zanfan, ki swa ganny adopte, lakour kot manm fanmir sa zanfan. Oubyen kantmenm en lot dimoun ki li i napa en zanfan, me i ti ava voudre annan en zanfan pour li donn sa lanmour ek lafeksyon.

E enportan ki striktir ki la, i permet sa, i permet pour ki sa zanfan i kapab ganny en opsyon pou li ale. Me pa zis pas son restan lanfans dan en fwaye.

Me par kont nou konpran, ki i annan zanfan ozordi, ki'n arive lepase osi kot i annan en zanfan in pas tou dilon son lanfans, dan en fwaye.

Me i enportan ankor pour ki okenn striktir, oubyen okenn revizyon Polisi. I fer provizyon, pour ki sa zanfan ler i sorti dan sa fwaye omwen, parey i annan bann Manm in fer resorti, ki i annan bann lankadreman pour ki sa zanfan ki'n vin en adilt e i pa'n ganny ankadre dan en lakour formel, me i bezwen antann en landrwa kot i kapab ganny akse, pour li annan en lozman, e osi byen en travay.

Pour ki li osi kapab prepar li pour li adapte dan sosyete ozordi. E baze lo leksperyans dan mon distrik mon annan zanfan ki pa'n neserman kapab ganny sa loportinite. Me nou ti ava swete lefitir, e prezan sa i ganny adrese pour ki nou kapab ed sa bann zanfan, e ed kominote.

Akoz ler en zanfan i sorti dan en fwaye, i al dan kominote nou bezwen rod fason ki mannyer nou kapab ed li kontinyen pour li kapab, etabli li konfortab dan en kominote. Pour ki osi i ede, pou vin enn parey mon'n dir sa bann bon sitwayen dan distrik, pour ki i ed lezot.

E pour ki ler li i pou pare demen pou form son prop fanmir, i kapab ofer le meyer pou son fanmir kontrerman petet ki li in mank serten sa loportinite. Mr Speaker bokou pwen in ganny fer resorti, lo responsabilite paran e sosyete pou donn sipor bann orfelen.

E mwan mon pa pou al dan bann repetisyon, me par kont mon le met lanfaz, met lanfaz, pour ki sa bann mesaz i ganny resevwar byen. E parey mon koleg Onorab Esparon, in dir lo komansman, se ki nou annan plizyer osi lezot fwaye. Nou bezwen rod fason ki okenn revizyon ki ganny fer atraver Gouvernman, i bezwen fer sir i dekoul pa zis pou fwaye, Vilaz Prezidan me osi pour tou lezot fwaye.

Pour ki napa en zanfan ki reste dan en orfelen, ki ganny kit deryer, pour ki ler i annan en program ki pou ankadre zot, pou prepar zot pou entegre dan sosyete, sa i ganny fer tou nivo.

Mr Speaker mon pou termin mon lentervansyon par met lanfaz lo lezot lazans ki kapab aport sipor nesese pou bann paran. Nou konnen ozordi, nou annan bokou paran ki in vwar li dan serten defi ki i pa kapab okip son zanfan. Ki

ozordi son zanfan i reste dan en fwaye.

Me i bezwen annan bann swivi, bann swivi pou vwar ki mannyer otan posib nou ed sa paran re-debout for lo son lipye. Repran son zanfan, e donn son zanfan son swen e sipor ki merite. Nou konnen poudir i pa en latas ki fasil, bokou fwa Departman Sosyal in rankontre bokou difikilte. Me nou pa kapab les lebra tonbe. Nou bezwen travay ansanm.

Me travay an izolasyon pa neserman pou ed nou ed nou pou nou kapab ed sa bann paran. Nou bezwen travay an lekip, ansanm pou nou vwar ki mannyer nou kapab donn sa gidans e sipor sa paran, pour ki i kontinyelman kapab debout for e refer son lavi.

E an menm tan, anmenn son zanfan pou li kapab donn son zanfan son lanmour ek lafeksyon ki i merite. E lo sa not mon poudir ki, okenn moman ki nou annan, nou pe koz lo sipor donn nou zanfan dan byennet nou zanfan, mwan mon napa okenn problem ek sa e mon pou aport mon sipor. Mersi Mr Speaker.

MR DEPUTY SPEAKER

Mersi Onorab Vidot. Mon pas laparol aprezan avek Onorab Adelaide.

HON FRANCOIS ADELAIDE

Mersi Mr Speaker. Bonzour tou dimoun a lekout. Mr Speaker dabor i fer mon en plezir pou mon kapab dir de mo lo Mosyon mon koleg Onorab William.

Vi ki mon ti enn parmi sa *MNA* ki ti solider avek li. E siport li pou nou al petet rod en pe leklersisman lo, sa safwasi ti Vilaz Prezidan.

E bann lezot keksoz ki bann etidyan ki laba pe fer *be it* kot lekol ouswa dan Vilaz li menm.

Mr Speaker, pou mon ler mon pe get sa Mosyon, i pe demande pou revwar Polisi e amann Lalwa pou fasilite swen.

Savedir i pe dir nou poudir ler i pe dir sa bann Lalwa, savedir i deza annan Lalwa ki nou kapab petet nou kapab servi.

Me petet si petet nou kapab modifye li en pe. E i ava fer ki nou bann zanfan Seselwa sirtou bann ki mwen fortinen, ava ganny en pli meyer lavi.

Mr Speaker, parey tou bann dimoun in dir, napa okenn person ki'n demann son nesans. E si in ariv lo later i bezwen annan en bi.

Akoz napa person ki ne ki napa en semen ki'n trase pou li. Me solman nou pa konn son destinasyon.

Me solman ler i vivan nou pou bezwen donn li tou sa swen. Tou sa lanmour. Tou sa sipor pou li kapab atenn son bi.

Mon pran legzanp lo mon menm. Mon pa ti en tro bon piti. Me selman mon'n ganny bokou sans dan mon lavi. E mon'n ganny bann dimoun ki'n kapab gid mwan.

E ozordi mon fyer mon pe reprezant mon distrik Baie Lazare. E bokou ban dimoun ki ti perdi lespwar lo mon ozordi mon konnen zot fyer.

E mon remerci zot pou sa. Be an dizan sa mon krwar nou bezwen kapab kontinyen siport bann lezot.

I annan *future* Prezidan pe monte. *Future* Minis si zot pa ganny sa dezyenm sans menm sa trwazyenm sans.

E ki sosyete i ferm lizye lo zot. Byen sir nou pou kapab pe anpes zot. E nou pe kapab anpes promot zot pou zot pran zot responsabilite. Ki zot pou annan dan lavenir.

Mr Speaker, Lasanble nou'n fer en bout. Zot ava rapel dan *Civil Code* kot nou ti tir sa bout napa okenn piti lezitim. Napa okenn piti batar.

Okenn zanfan lezitim, okenn zanfan batar. Me sa i parmi bann keksoz ki nou Lasanble nou'n ede. Petet pou nou kapab tir sa diferans. E

aret klasifye zanfán. Akoz napa personn parey mon pe dir ki demann son nesans.

Dabor mon le dir osi en gran mersi pou tou ban dimoun ki pe travay Vilaz Prezidan aköz dan Mosyon in sit Vilaz Prezidan.

E tou bann lezot dimoun an zeneral ki pe travay kot bann fwaye. Mon konnen i pa en travay fasil. Me zot lanmour avek zot devosyon sirman i pe fer sir ki zot pe kapab *attend* zot lobzektif pou ed sa bann zanfán.

Mr Speaker i enportan ki an mezir nou pe travay ek bann zanfán. Tou kou mon mazin parol Prezidan. I dir ler ou pe fer en travay, fer li koman en biznes. *Run* li koman en biznes.

E sa parol i annan en gran sans ladan. Pou travay ek zanfán parey nou dir i pa fasil. Me ou konnen ler ou'n decide pou ou fer en biznes, pou ou *run* en biznes.

Ou bezwen fer sir ou pran tou swen. Tou prekosyon nesaser. Ou met tou lanmour pou ki ou kapab vreman achieve sa ki ou anvi *achieve*.

En lot ti pwèn ki mon bann koleg in tous lo la Mr Speaker. E mon krwar ki Gouvernman nou devret kapab komans konsidere, ti pas dan en sityasyon dan Distrik Baie-

Lazare ler malerezman ti annan en lensidan tris ki ti arive.

Mr Speaker mon ti santi mon rekonforte par sa detrwa dimoun. Detrwa madanm, detrwa fanmir ki ti *call*, aköz ti *involve* zanfán ladan.

Zot ti *call*, zot pe gete ki bann soutyen zot kapab anmennen. Menm zot ti demann mon si napa bann zanfán ki petet zot kapab konsider adopte.

E deswit dan mon nide, mon ti ganny sa lenpresyon ki Sesel dimoun ler i annan maler zot vreman solider. E mon konnen pou dir avan zot in solider.

E dan bann letan ki mon ti war mon difisil pe rode ki mannyer pou kapab rod ban solisyon pou ed sa bann dimoun. Mon ti konstata ki sa lespri solider pa ankor sorti dan Seselwa.

E Seselwa i ankor solider. E zot ti demann mwan pou adopte sa bann zanfán. Malerezman nou pa ti kapab. Be solman mon konnen poudir petet sa i ava en opsyon ki Gouvernman petet i ava konsidere pou komans rod bann dimoun ki petet ti ava kontan vin bann paran adoptif.

Travay ek zot. E pou ki si demen i arive ki i annan bann zanfán ki bezwen ganny adopte.

Zot ava'n fini annan tou sa bagaz pou zot kapab adopte sa bann zanfan.

Mr Speaker dan mon rankont avek diferan Departman *be it* Minister Zafer Sosyal, Lafanmir, i bon note, nou pa pe montre ledwa lo personn, be i bon note poudir dan sa bann Departman i bezwen annan travay ki bezwen ganny fer.

Ou konnen nou pe travay ek zanfan. Nou pa kapab les zanfan santi si i annan bann tirayman antre bann Departman, antre bann Minister.

Nou la pou nou kapab rod byennet nou bann zanfan. E mon krwar nou krwayans personnel. Nou pozisyon pa devret vin en baryer pou nou kapab kontinyen ed sa bann zanfan.

Mwan mon'n remarke pou dir petet i kapab annan tro bokou Lazans. Ki sa i mon lopinyon. Mon kapab mal. Be solman ler mon'n ekoute, mon war poudir i annan bann mars lo lipye kanmarad.

E sa ki i fer, i fer annan ban retar ler nou pe *process* tou bann keksoz ki pou fer avek sa byennet zanfan.

Mon krwar ki Gouvernman i devret kapab imedyatman. Zot koman tonm

dakor ansanm. Lekel ki pou fer, lekel ki pou fer sa.

Mon konnen zot annan *guideline*. Me solman ti ava bon enn ki pli konpreansiv. Pou ki sa zanfan pa sa dimoun ki perdi.

Mr Speaker, kot vilaz Prezidan parey nou konnen pou dir i en *residential home*. Me i annan bann lezot dimoun ki lezot marmay ki petet pe ganny *admit* laba.

E sa i fer ki i annan en pe bann problem konportman. E ou konnen en zanfan i reste en zanfan. E napa en zanfan ki ne pa bon.

I ganny ekspoze avek lavi. e petet i swazir dan son linosans, dan son linyorans e linosans, lekel ki i pou sivre. Me i pa vedir ki i byen.

I bezwen plis gidans ankor pou li kapab *at least* grandi pou vin en adilt. Me solman nou bezwen si nou anvi vremen, nou anvi ki sa program i marse, nou bezwen konnen kan en dimoun i admit Vilaz Prezidan, ouswa kan i pou admit dan en lot sant pou li kapab ganny en led.

Tel ki petet bann problem disiplin. E mon krwar ki Gouvernman avek tou bann *stakeholders* ki bezwen ed kanmarad. In plis ki ler Sesel. Nou'n fatige koze. Nou bezwen

en sant pou nou bann zanfan pou redres zot. En sant disiplinèr.

So, mon konnen poudir Minis in garanti nou poudir sa proze i an mars. Mon pou dir Minis nou pou donn li tou sipor neser ki zot pou bezwen. Pou zot *at least* kapab met sa program an mars.

E menm kre sa landrwa pou ki sa bann marmay i ava ganny admet laba. E sa i ava travay lo zot, pou fer zot redres zot. E anmenn zot ankor lo semen lavi pou zot vin prodiktiv dan nou pei.

Mr Speaker, mon panse ki sa Gouvernman pa devret fer li tousel. Parey nou ti tann Mrs Umardji dir poudir sa travay i pa en travay ki zis aköz ou deside al rod en *job*, ou al travay ek sa bann marmay. Non.

Sa travay i en travay ki vreman, ki i demande. I pa zis en *job*, i en vokasyon. I en vokasyon ki sak dimoun ki deside pou al travay laba kot Vilaz Prezidan i bezwen annan pou li travay avek zanfan.

Parey nou pe dir, i annan zanfan ki'n vin la dan Lasanble i koz ek nou, i dir nou pa tou kou nou adilt enpoz lo zanfan.

Me plito ekout nou bann zanfan. Petet si i annan bann zanfan laba ki parey i pe dir, i pa anvi l lekol li. I anvi fer en

travay, i anvi komans adopte en metye. Me ou pe fors li pou li reste lo sez lekol.

Byensir i pou disturb dan lekol. I pou donn tou sa ki ou pa anvi gannyen. E byensir definitivman i pou perdi konsantrasyon. E menm Miss, e menm son bann ankadre pou perdi konsantrasyon.

So i enportan ki nou ekout sa bann zanfan. Kot ki annan plas parey zot pe dir, ki annan bann travay ki sa bann zanfan i kontan, donn sa bann zanfan sans pou zot kapab al fer sa bann travay.

Mr Speaker, aköz mon pa'n ne gran mwan. Mon ti ne en zanfan. Mon osi boner mon pa ti tro, tor kontan lekol.

Me solman apre ler i ariv 21an, 22an ou komans madanm komans anvoy ou bann pti let d'amour. Ki manner ou pou lir ou pa konn lekol? So ou bezwen ale retourn ankor lekol pou ou aprann. Aköz sanson petet ou bann dalon i ava lir pou ou e ou konnen ki arive.

So nou pa zanmen kapab perdi lespwar lo nou bann zanfan. Si i pa oule aprann boner, Pa fors li. I enportan ki nou gid li. Me solman i bezwen annan bann seans ki nou kapab petet fer li pas atraver.

E ki li menm li, i ava rekonnèt poudir lekòl i enportan. E si *fail* boner petet pli tar i ava kapab rekipere Mr Speaker.

I annan en *statement* tou kou mon kontan ler mon bann dimoun i koz ek mwan, mon kontan dir zot. Akoz mon'n aprann sa e mon kontan servi sa dikton.

“Don’t let schooling interfere with your education.” Mr Speaker, sa i en *statement* ki serye. E nou, nou krwar ler nou al lekòl nou petet, i sa bon landrwa ki nou ganny tou keksoz. Me non. Ledikasyon i dan lavi an zeneral.

So Onorab William, mersi pou sa Mosyon. In montre poudir sa vizit ki mon'n ale avek ou. E avek bann lezot koleg, i pa'n an ven.

E bann dimoun in trouve osi. menm kot lekòl. Mon'n bliye pou remersi Lekòl Anse Boileau avek zot *Management*. Ki zot in resevwar nou byen. E zot ti donn n ou bokou bann dokimanter.

E nou'n ganny bokou diskisyon. E i enportan pou mon dir zot mersi. E zot pou trouve poudir zot pa zis vini pou vin gat zot letan. Me nou'n fer *something* ki vreman *fruitful*. Nou'n anmenn sa Mosyon dan

en fason pou nou ed zot. Akoz i nou zanfan.

Parey mon pe dir demen nou kapab vin Prezidan, dokter, Minis. E se nou menm nou ki pou fyer ler nou pou war bann akonplisman sa bann zanfan.

So nou pou bezwen ekout sa bann zanfan. Donn zot sans. E gid zot, pou ki zot ava vin bann sitwayen responsab. Ki pei i ava bezwen, i ava kont lo zot. E pei i ava benefisye son bann *investment* lo sa bann zanfan.

So, *all in all* Onorab William mersi pou sa Mosyon. Mon krwar i enn ki vreman, en Mosyon ki bon. E mon pou donn ou tou mon sipor. Mersi bokou.

MR DEPUTY SPEAKER

Mersi Onorab Adelaide. Mon pou n aprezan pas laparol avek Onorab Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour tou Manm Onorab. E bonzour tou dimoun ki pe ekoute.

Mr Speaker, souvandfwa dan Lasanble Nasyon e menm dan lasosyete, dan Gouvernman, dan lasosyete, nou refer lo nou zanfan, nou lavenir. E mon krwar nou tou la anndan nou ava dakor.

E mon krwar lamazorite dimoun osi, si pa tou dimoun i ava dakor ek mwan ki poudir sa i en *statement* ki korek. E i en *statement* ki malgre en pti *statement*. Me i en *statement* ki dir bokou.

Nou bezwen aksepte. Nou bezwen konpran ki lavi i fer ki i bezwen annan renouvelman. E ki bezwen annan la relev ki ganny pran.

E nou koman bann dimoun ki pli gran, menm bann ki pli aze ki mwan, bann ki pli aze ki nou la. Nou osi prepar pou la relev. E nou prepar lazenes, zanfan pou la relev.

Ler nou dir sa Mr Speaker, nou dir sa akoz nou anvi parey mon dir la relev. Me selman nou anvi osi kontinyasyon dan keksoz ki nou fer. Ki swa dan lakour. Ki swa dan travay, ki swa dan lasosyete. Nou anvi kontinyasyon.

Be pou nou kapab ganny sa Mr Speaker, nou bezwen annan nou bann zanfan ki ganny byen ankadre. Ki ganny byen *taken care of*. E ki kapab vin sa adilt. Sa model ki pran larelev.

Mosyon Mr Speaker ozordi bomaten, in koz lo revwar Polisi. Demann Gouvernman pou revwar bann Polisi e stratezi an ski konsern zanfan dan bann fwaye.

Dabor mon ti ava kontan ler mon komanse dir mersi. Remersye tou sa bann fwaye ki nou annan ozordi dan Sesel.

Ki swa *President's Village*, Fwaye Gouvernman. Ki swa bann fwaye ki pe ganny operate par, sirtou Lanmisyon Katolik.

E osi tou bann dimoun ki pe travay dir dan sa bann fwaye. Pou antretenir sa bann fwaye. Pou antretenir bann zanfan.

Bann ki dan en fason ou en lot pe siport sa bann fwaye. Ki swa avek zot bann sipor moral. Zot bann sipor prezans. Me osi bann sipor resours finansyel ki mon asire bann fwaye i apresye bokou.

An se moman la Mr Speaker koman mon dir sa. Mon ti ava kontan osi petet remersye Onorab Aglae. Akoz mon konnen i en dimoun ki touzour reste angaze avek fwaye ki tonm dan son distrik Port Glaud.

Mon konn sa. Mon'n fer en pti pe travay ek Onorab Aglae pandan, lo en nivo politik. Me solman bann letan ki mon'n dan Distrik Port Glaud mon'n war son langazman anver sa fwaye.

Malgre yer ler i ti anmenn son kestyon, ti annan serten *attempt* pou fer konmsi i pa'n enterese avek serten demars.

Be mwan mon konnen ki kantite langazman i annan ek sa fwaye.

Mr Speaker, an dizan sa, i enportan nou koz en pti pe lo responsabilite Gouvernman anver bann fwaye.

Pa zis bann fwaye, me sirtou bann zanfan ki viv dan bann fwaye. Mon parkour petet en pti pe dan mon bann landrwa travay. Mon'n travay avek Lazans Proteksyon Sosyal parey zot konnen. E in annan lenstans kot mon'n annan bann enteraksyon avek bann fwaye, Servis Sosyal.

E osi mon konnen ki poudir atraver Bidze Gouvernman tou le lannen. I annan serten sonm larzan ki ganny met akote. Anba Lalwa par egzanp pou bann Orfelen. I annan en *orphan benefit*. I annan laranzman ki ti ganny fer administrativman. Mon pa konnen si i ankor egziste.

Par egzanp pou sa ki nou apel *semi-orphans*. I annan serten larzan ki Gouvernman i met dan Bidze ankor ki al anver sa bann lenstitisyon. Sa bann landrwa zot menm.

E mon rapel en diskisyon ki mon ti annan avek Monsenyer oparavan letan mon ti ankor pe travay laba.

Kot zot ti vin solisit led Gouvernman pou revwar en pti

pe larzan ki Gouvernman i asiste bann fwaye. Sirtou bann ki anba kontrol Lanmisyon Katolik.

So Gouvernman li menm i annan bann sipor ki in la a longer di tan. Ki'n siport bann fwaye. E ki par sa zot pe siport bann zanfan ki dan sa bann fwaye.

Mr Speaker, be i annan fwaye pa akoz nou anvi annan fwaye. Nou annan fwaye akoz i annan en nesesite pou annan fwaye.

Alors ki bann faktor ki fer ki nou annan bann fwaye. Ki bann faktor ki fer ki nou annan bann orfelen ki pe viv dan sa bann fwaye, i annan diferan rezim Mr Speaker. Diferan rezon.

Taler i annan statistik ki'n dir. Par egzanp dan fwaye Vilaz Prezidan. I annan lefe 4 orfelen. 4 ki vremen orfelen ki'n perdi zot paran.

Me lamazorite dan tou bann fwaye, lamazorite se sa ki mwan mon term li koman bann orfelen sosyal.

Dan sans kot zot bann zanfan ki swa ganny neglize. Swa viv dan bann lanvironnman ki pa adekwa, ki pa normal pou zanfan grandi ladan. Swa zot ganny abize.

E diferan lezot faktor ki fer ki zot bezwen bouz dan sa bann

fwaye. Souvandfwa parey mon'n dir faktor sosyal ouswa menm faktor ekonomik.

Alors Mr Speaker, i annan en nesesite pou nou kapab dres sa Mosyon byen, pou nou kapab war en fason ki mannier nou bouz de lavan, i annan en nesesite - mon dakor ki i annan en nesesite pou nou annan en lapros kordinen dan lafason ki nou fer keksoz.

Mon pa pe dir napa en lapros kordinen. Petet mon devret servi sa mo en lapros en pe pli kordinen dan lafason ki nou fer keksoz.

Dan lafason ki nou, nou fer bann Polisi ek bann stratezi dan bann diferan Minister, Departman, Lazans Gouvernman, pou ki nou ava kapab amelyor fonksyonman bann Orfelina.

E amelyor, an rezilta amelyor lavi sa bann zanfan bann orfelen ki viv dan sa bann Orfelina. E pour kwa pa, e la mon krwar se sa ki devret nou target.

Redwir e menm ariv dan en sityasyon. Petet mon'n pe viv dan en lemonn en pe imaziner. Me pou kwa pa ariv dan en sityasyon kot nou napa nesesite pou annan sa kantite fwaye.

Ouswa pou annan fwaye Sesel. E ler mon dir revwar bann Polisi bann lapros. Mon

pe koz sirtou lo bann stratezi lafanmir. Polisi lafanmir stratezi. Bann Polisi e stratezi sosyal nou pei. Bann Polisi stratezi lord ek lape dan nou pei. E osi bann Polisi stratezi avek konsern par egzanp drog avek lalkol. *Teenage pregnancy*.

Annefe tou bann Polisi, tou bann lorganizasyon, bann lenstans ki annan pou fer ki dil avek bann *issues*, bann malez sosyal ki enpakte lasosyete. Akoz evantuelman Mr Speaker, son rezilta i bokou fwa i fini lo zanfan. E zanfan i *end up* dan en lenstitisyon kot petet i pa devret arive.

Mon dir sa Mr Speaker, akoz parey yer ler Minis ti vini mon ti dir Minis, Minis pou Lafanmir si i pare pou *lead* sa diskisyon avek son koleg Minis Sosyal pou petet revwar Polisi.

Yer nou ti pe koz lo bann dimoun aze ki antre dan bann *Homes*. E ki mannier serten Polisi dan en lot Departman, en lot Minister petet i afekte ki mannier li koman son Minister. Son bann Polisi son bann Minister i *operate*.

So ler mon koz lo lapros kordinen mon koz lo tou bann Minister i *in psyche* ek kanmarad.

E ler nou fer bann desizyon, bann Polisi nou fer sir nou teste li avek pou

kanmarad. E pou gete ki manner zot marye. Ki manner zot *dovetail* ek kanmarad.

E ki manner nou kapab fer li vin pli efektiv, pli efikas pou benefis tou sa bann Lazans, tou sa bann Lotorite ki dil avek sa sityasyon. Konmsi nou pa anvwar en sityasyon kot ler en lannen gos i fer enn, i afekte lanmen drwat apre nou pa kapab kordinen. E nou war ki poudir zanfan i vin *at the receiving end of* sa bann problemn.

E lasosyete i bezwen al depans sepa konbyen plis milyon ankor pou kapab zis soutenir en sityasyon ki nou ti kapab *avoid*. Par egzanp si nou ti rod bann fason pou mentenir plis lord ek lape dan fanmir. Kot napa separasyon, napa kase, napa vyolans.

Kot zanfan i bezwen kit lakaz. Si nou ti kapab revwar pete nou bann stratezi an term *teenage pregnancy* kot nou war less zanfan ki pa ankor pare pou fer zanfan, i ganny zanfan.

E ler sityasyon kot zanfan i bezwen ganny adopte dan bann fwaye. Si nou ti kapab vwar petet nou bann stratezi ki manner nou met zefor ansanm.

Lafanmir, Departman Sosyal pou kapab *incentivize* bann fanmir, bann diferan

lorganizasyon dan lakominote, pou donn sipor, sipor sosyal bann diferan fanmir ki dan difikilte.

Pou kapab ede ki nou pa war ankor sa bann problemn dan lafanmir, ki *end up* afekte zanfan. Evantyelman ariv dan bann fwaye.

Mr Speaker, pou nou kapab fer sa. Wi i byen i annan bann Polisi avek bann stratezi. Me mon krwar zis polisi ek stratezi i pa ase. Nou bezwen kapab osi annan bann lankadremman legal. E la mon pe dir petet nou bezwen osi vwar, nou salye bokou bann zefor ki'n ganny fer dan lepase.

E mon konnen i annan en kantite dimoun ki dedye zot lavi, dedye zot letan dan sa domenn. I pa en domenn fasil. I en travay ki souvandfwa ou war ou pe travay *odd hours*.

E bann *social worker* i ava *testify* sa. Bann dimoun ki dan bann NGOs ki dil ek sa bann size koumsa, i kapab testifye sa. I kapab dir ou i pa en louvraz fasil.

Me eski nou kapab annan bann lankadremman? Lankadremman legal pou fasilite lavi sa bann dimoun, e fasilite petet langazman bann NGOs ki travay dan sa bann domenn?

Nou bezwen osi Mr Speaker. Nou dakor ki

Gouvernman an priyorite Gouvernman i bezwen kapab investir. Met larzan e met resours dan sa domenn.

Me nou bezwen osi dakor ki poudir lakominote i bezwen ede. Dabor i annan bann Manm ki'n koz lo donn letan. Donn kouraz. Donn nou letan. Donn nou lekspertiz dan sa domenn. Lakominote osi i bezwen ede. Sekter prive osi i bezwen kapab antre ladan, ede. Soulaz en pti pe sa fordo ki lo Gouvernman.

Par egzanj dan bann lezot pei, i annan bann Fondasyon ki ganny *set up* spesifikman pou ganny larzan. Pou anmas larzan avek bann *philanthropies*, bann donater.

Ki egzaktaman pran zot larzan met dan bann lenstans koumsa. E petet Sesel osi nou devret war ki mannyer nou *set up* bann lankadremman legal. Pou ki bann Fondasyon i kapab vin donn en koudmen Gouvernman.

Donn en koudmen sekter prive pou kapab dil ek sa bann sityasyon. Pa zis dan fwaye. Me dil ek bann sityasyon sosyal. Bann sityasyon parey mon'n koz lo la *teenage pregnancy*, lord ek lape, drog ek lalkol. Ki souvan fwa bann *root cause*, bann problem ki nou pe war ki evantyelman i afekte bann zanfan.

E Mr Speaker, an dizan sa mon konnen i annan ki en kantite dimoun dan sosyete petet pa ase. Me i annan en kantite dimoun dan sosyete ki donn zot kouraz, ki donn zot lanmen pou fer sa marse.

Onorab Roucou boner in koz lo dimoun ki al koup seve par egzanj dan bann Orfelina. Mon konn en dimoun ki tanzantan i al dan bann Orfelina pou fer sa.

I al par egzanj Vilaz prezidan pou ede avek sa bann keksoz. So, mon ti ava kontan war plis. Mon ti ava kontan ki nou, nou osi nou kapab ankouraze pou war plis sa bann aksyon koumsa. E pou ede ed sa bann dimoun ki pe fer sa travay.

Mr Speaker mon'n koz en pti pe lo Lalwa. Souvan fwa par egzanj dan Lasanble Nasyonal nou koz lo bann *model law*. Bann Lalwa model ki bann pei i annan. Petet nou devret, petet si i annan serten komite dan Lasanble ki son manda i bord en pti pe avek sa ki nou pe diskite ozordi.

Petet komite i devret an priyorite konmsi lans en travay, gete ki mannyer nou kapab idantifye bann *modern law*, propoz avek Lasanble Nasyonal.

Devan Lasanble Nasyonal nou ava debat lo la. Nou ava

kapab aprouve. E met devan Gouvernman ki nou ava kapab bouz de lavan avek sa bann zafer ki nou pa tou kou pe anmenn Mosyon, pe anmenn kestyon. Me nou pa neserman war keksoz pe bouz parey nou ti ava anvi.

Mr Speaker, an dizan sa mon santi ki i annan merit pou sa - pou en tel entervansyon. En tel Mosyon. Mon santi ki lasosyete i kapab fer plis.

Lasosyete i devret fer plis pou ed bann Lorfelina. Pou met an plas bann Polisi, bann stratezi pou dil avek bann lakoz ki ozordi nou pe war zanfan pe vin orfelen.

E met an plas bann Polisi, Stratezi e Lalwa pou anpes sa arrive. Pou fer sir ki - parey mon'n dir boner mon pa konnen si mon pe viv dan en monn en pe fitir sa, me solman si napa nesosite pou annan Lorfelina Sesel. Nou pa bezwen lorfelina e ki nou kapab dan en fason ou en lot lakominote i dil avek sa bann sityasyon.

Avek sa Mr Speaker mon ava dir ou mersi. E mon pou siport sa Mosyon Mr Speaker. Mersi.

MR DEPUTY SPEAKER

Mersi Onorab Cosgrow. Mon ava prezan pas laparol avek Onorab Bistoquet.

HON ROSIE BISTOQUET

Mersi Mr Speaker. Bonzour Mr Speaker. Bonzour tou Onorab. Mr Speaker mon pa pou dir tro bokou lo sa Mosyon. Me selman mon pou anmenn mon pti kontribisyon.

E mon byen kontan ki Onorab William in anmenn sa Mosyon. Sirtou kot i konsern pou revwar bann Polisi, stratezi pou anmenn en Lalwa pou bann zanfan. Pou fasilite bann swen konpreansib dan nou pei ki petet lontan ti'n ler pou nou pei revwar.

Akoz malgre tou, ler mon'n repas dan bann literatir Sesel, mon pa'n vwar okenn Polisi ouswa Lalwa ki relye direkteman avek bann lenstitisyon kot bann orfelen. Kot bann orfelen i reste, ouswa bann Polisi ouswa bann Lalwa. Be selman i annan enn de bann bout travay ki'n ganny fer ki'n ganny met ansanm.

E mon dapre letan mon'n fer bann resers, mon trouve ki sa gidans i sorti anba *CRC - Convention of the Rights of the Child*.

Ki ti ganny devlope par departman Servis Sosyal. Ki ti ganny adopte an 1995. Lanfaz ti ganny mete lo devlopman e proteksyon bann zanfan isi Sesel. Bann lenstitisyon ou

fwaye Vilaz Prezidan ti ouver an 1987. E la nou'n ariv nou apepre 35an.

I vedir i annan bann zanfan ki deza annan 35an ki'n pas atraver sa lenstitisyon. E zot in fer fas avek sa bann menm sityasyon kot nou pe diskite ozordi.

Petet sa letan sityasyon sosyal pa ti parey konmela. Sirtou kot nou'n trouve dapre loter sa Mosyon, kot nou'n plizoumwèn i pa bann orfelen ki parey nou ganny dekrir par Nasyon Ini.

En orfelen i ganny dekrir par Nasyon Ini koman bann zanfan, ki'n perdi 2 zot paran, pa 1, 2 zot paran.

Nou isi sesel nou'n adopte sa semi-orfelen akòz i annan ki'n perdi 1 paran, pou nou kapab donn zot sa sipor.

E nou'n trouve poudir sityasyon ki loter Mosyon in anmennen Mr Speaker. I sirtou bann orfelen sosyal. Zot annan en kantite problem sosyal sorti dan nou sosyete.

Sirtou sityasyon drog dan nou pei. Sityasyon lalkol. Lansentman anba laz. Sityasyon ekonomik kot i annan bann paran ouswa bann manman, papa pa pe travay. Zot pa dan lanplwa osi. Nou annan osi ki nou annan *single parent families*. Bann *single*

parent families i plizoumwèn nou trouv plis manman ki pe travay.

E zot kit zanfan kot lakaz ler zot sorti lekòl zanfan i vin zot tousel kot lakaz, napa sipervizyon.

E osi nou trouve kot i annan vyolans domestik. E sityasyon lozman kot i annan en kantite fanmir ki reste ansanm. Ki a lafen dizour i annan labi lo serten zanfan ou dan lafanmir.

Nou'n annan osi trafik imen. *HIV, SIDA*. E lasante reprodiktiv parey mon koleg avan mwan in koz lo la. Bann lansentman anba laz. Kot nou'n trouve isi Sesel i ase o.

Resaman osi mon bann ser koleg nou'n trouve poudir nou ti annan nou ti annan sa defi *COVID-19* kot nou trouve poudir nou bann zanfan in reste dan lakour en bon pe letan dan zot parkour ledikasyon. Akòz ti napa lekòl.

Sa in anmèn plis vilnerabilite san zot prezans zot paran, ouswa sipervizyon zot paran. E Mr Speaker, ozordi la nou dan ventyenm syek 2022. E nou santi poudir syek in sanze, nou pe war nou avek bann diferan problem. Diferan defi. Alor nou bezwen war nouvo solisyon pou sa bann nouvo problem.

Mr Speaker, avan ler mon kontinyen mon lentervansyon, mon ti ava kontan felisit *NCC* ki mon santi zot pe fer en gran travay kot i konsern mannye ouswa zer sa Lorfelina. Sirtou *President's Village*. Ki mon konnen i pa en keksoz fasil.

De nwit o zour akoz i en lenstitisyon Gouvernman. Kot zot pe ganny par egzanp sipor avek bann lezot dimoun dan kominote, pou kapab fer de bout zwenm ansanm.

E osi mon pou siport, fer sir siport osi bann *staff* ki pe travay kot sa lenstitisyon. Ki avek zot sipor zot gidans, sa bann zanfan in kapab dan en larout kot zot santi zot ganny sa proteksyon.

E mon pou osi felisit bann misyonner. Sirtou sa 4, lezot 4 lenstitisyon ki lezot mon bann koleg in koz lo la. Ki zot pe fer en bon travay malgre tou bann defi ki egziste.

Mr Speaker, nou konnen poudir sa bann zanfan parey loter Mosyon in dir, sa 29 zanfan, zot sorti dan diferan fanmir. Zot annan diferan *background* avek diferan problem, ki'n anmenn zot dan sa fwaye e kot zot pe viv ansanm koman en fanmir.

Mr Speaker i pa fasil pou en zanfan. Akoz napa en zanfan ki pa mank son Manman ouswa

son papa. Ouswa son frer. Ouswa son ser. E sirtou son paran.

E i osi i mank son kominote kot i ti pe viv. Akoz sa nouvo landrwa i en nouvo landrwa pou li. E i pa fasil pou li adopte ozordi pou demen.

Me akoz son sityasyon sosyal ouswa sityasyon non dezirab, sa zanfan in ganny retire avek son fanmir pou viv dan sa lenstitisyon kot in trouv li ozordi.

Mr Speaker, bi sa lenstitisyon ti ganny mete la pou asire ki zot ganny parey mon'n dir oparavan, ki bann zanfan i ganny sa sipor nesaser, pou asire ki bann zanfan i ganny reentegre dan lasosyete.

So 35an pase nou pe koz bann zanfan pou ganny reentegre dan lasosyete. E mon krwar petet i annan serten travay ki nou kapab fer lo la.

E ki nou'n trouve pandan sa 35an pase? Ler sa bann zanfan in ariv 18an, malgre ki mannyer sityasyon i ete - akoz zot in ariv zot laz mazer, zot in war zot pe sorti dan sa lenstitisyon. E zot in sorti pou antre dan en landrwa kot parey nou dir '*dans les nuages*'.

Kot zot in abitye fer keksoz dan en serten fason dan en serten landrwa. E prezan zot in war zot, zot in sorti. Be selman

i pa fasil pou zot akoz menm si menm zot paran, ouswa fanmir, ouswa lasosyete pa kapab reentegre zot, kot ti devret ete.

Dezyenmman Mr Speaker, petet sa ki mon pe mazine osi, se ki avan ti annan bann fanmir ki ti petet bann *real family* parey nou dir. Ki ti pran enn de sa bann zanfan petet dan *weekend* ouswa dan koze piblik.

Pou kapab sey fer zot konmsi ar sa larout pou zot kapab reentegre dan sa, *the real family situation*.

Be selman sa program mon pa krwar i ankor pe fonksyon parey i ti devret fonksyonnen. E petet sa i en fason osi ki nou kapab revwar sa program pou ki sa zanfan ki kapab ganny reentegre. I kapab viv en lavi petet pa permanan, me tanporer avek en *real family*.

En lot keksoz petet Mr Speaker. Se ki mon krwar petet i devret annan en serten revizyon lo bann Polisi kot i konsern lasante reprodiktiv.

Akoz mon konnen i annan parey nou tou nou okouran i annan bann manman - i annan bann fanmir ki annan 1, 2, 3, 4, 5 zanfan, menm 6 zanfan Vilaz Prezidan.

E menm i annan ki mon konnen pe al ganny son setyenm osi, mon pa konnen si

pou al laba. E mon krwar nou devret revwar sa Polisi Lasante Reprodiktiv.

Pou fer sir ki sa manman osi i pran son responsabilite. Akoz i pa kapab fer zanfan apre ek letan pou kapab pran sa responsabilite i en problem.

En lot keksoz ankor Mr Speaker, i annan sa problem adopsyon. Ki kot pou petet i devret ganny revwar kriter. Kot bann zanfan i kapab ganny re adopte.

Mr Speaker, dan en letid ki ti ganny fer an 2011 par Departman Servis Sosyal, Rezilta ti montre ki definisyon fanmir Seselwa in sanze.

Kot nou ti war oparavan lafanmir ti ganny war koman en koup ki'n marye avek zanfan. Me dapre sa letid, 61poursan bann partisipan dan sa letid, ti idantifye diferan kategori lafanmir. E zot pa ti war maryaz koman en sel larout pou formasyon en fanmir.

Alors si i plis 61poursan in trouve poudir i annan sa problem kot adopsyon. Dapre Lalwa adopsyon fodre en fanmir in marye pou kapab adopte en zanfan.

Mon krwar osi nou kapab petet revwar sa Lalwa, pou bann zanfan ki petet i ti ava kapab, i ti ava anvi, ouswa ki

bann manman ki ti ava kontan zot zanfan i ganny adopte.

E i ava fer li en pti pe pli fasil pou zot zanfan viv dan en kominote ,ouswa dan en fanmir kot zot ti ava kontan.

En lot mon koleg ankor in revwar. Nou devret petet revwar osi Polisi kot i konsern *extended family*. Lontan parey Onorab Zialor ti dir, mwan mon rapel kot mwan mon ti reste i annan nou bann fanmir ki ti adopte - pa adopte ofisyelman. Be selman i ti dir ou sa tantin entel. Sa mon zanfan adopte.

Ki nou dir sa bann *extended family*. Sirtou bann fanmir ki ti ava kontan pran zanfan pou okipe ouswa pou sonnyen. Pou donn li sa sipervizyon. Pou donn li sa direksyon. Pou donn li sa gidans.

E petet Minister konsernen i devret revwar sa Polisi kot en manman ouswa en fanmir, ouswa en koup, ouswa en ser, ouswa en frer, ki ti ava kontan pran enn sa bann zanfan pou okipe. Ki i ti kapab ganny sa ganny fer pou fer sir ankor ki sa zanfan i o sant devlopman.

Mr Speaker, letan mon pe koz ankor lo a letid mon trouve ki i devret petet annan en letid pli avanse ki devret ganny fer.

Akoz la nou'n ariv 35an apre, e nou trouve poudir napa okenn letid ki'n ganny fer pou gete sirtou ki bann defi, ki bann reisit apre ki sa lenstitisyon in anmennen.

Sirtou mon pe demande se ki petet loter Mosyon i kapab met dan son rapor. Dan son rapor final, se ki nou kapab fer en letid operasyonnel pou nou kapab ganny plis detay lo bann program ki'n pase laba.

E sa letid i devret enkorpor osi bann zabitan, bann zanfan ki'n pas dan a lenstitisyon zot menm.

Bann zanfan ki'n pas atraver sa lenstitisyon dan diferan letap. Bann zanfan ki aktyelman dan sa lenstitisyon. E osi pou bann travayer ki'n travay dan sa lenstitisyon. E bann ki ankor pe travay dan sa lenstitisyon.

E mon santi Mr Speaker petet sa *findings* ouswa sa rezolisyon. Swa bann rekomandasyon ki pou vin avek, i kapab ed Sesel, ed Departman konsernen, revwar sa lenstitisyon dan son totalite.

Kot nou pou annan levidans e pou anmenn bann nouvo perspektiv pou sa lenstitisyon.

E la kot nou kapab petet avek sa bann devlopman, avek sa bann modalite avek sa bann

repons ki nou pou gannyen atraver sa letid, nou kapab fer bann nouvo Polisi. Nou kapab osi revwar bann Lalwa. E asir ki sa lenstitisyon i anmenn en nouvo souf, en nouvo souf.

E osi bann nouvo program ki kapab ganny devlope. Pou nou bann zanfan ki kapab ganny - ki nou konnen in ganny plonze dan sa sityasyon ki pa zot ki'n demande. Avek sa bann fleo sosyal.

E osi mon ti ava kontan osi ki sa letid avek sa bann devlopman Lalwa e lezot. I ava fer sir ki nou bann zanfan Seselwa i ava annan en nouvo vizyon dan zot lavi.

E anmenn tan fer zot rev vin vre. Mersi Mr Speaker. E mon pou osi siport sa Mosyon.

MR DEPUTY SPEAKER

Mersi Onorab Bistoquet. Lo lalis ki avek mwan setadir ti ganny pran par Speaker avan ler i ale. I reste zis 2 entervenans. Se le 2 *Leaders*. Mon pe get ler mon ti ava apresye si nou ti kapab *dispose of this Motion by 12.30*.

Ki en manner apre midi letan nou tournen i ava en *fresh Motion*. So savedir baze lo letan la - *15 minutes each*. Onorab Pillay.

HON SEBASTIEN PILLAY

Mersi Mr Speaker. Ou'n dir *dispose of the Motion*. So mwan ek Onorab Georges *plus* Onorab William. Ou krwar i pou ase 30 minit.

MR DEPUTY SPEAKER

Wi, li i 10 minit. Nou kapab ale ziska 40. Zis selman nou ti ava kontan *SBC* i lir zot bann mesaz lanmor a ler. Nou pa anvi retard zot. Mersi *proceed*.

HON SEBASTIEN PILLAY

Napa problem - *ok*. Premyerman mon le swet tou dimoun, i pe al lo midi so bonn apre midi.

E mon lentervansyon lo sa Mosyon mon'n sey fer *maximum* resers ki mon kapab pou regard tou bann provizyon legal ki egziste otour bann *Homes* e bann fwaye.

Zis pou mwan kapab ganny en, pou mon fer sir ki sa ki mon pe vin dir dan Lasanble mon pe ede pou ranforsi sa ki sa Mosyon pe demande. Me pa zis koz lo la dan en fason siperfisyel.

Bon premyerman annou etablir konteks. Konteks Sesel ozordi ki nou anba. Nou annan diferan lenstitisyon oubyen letablisman ki pe ganny servi pou si ou le eberz bann zanfan.

So nou konnen nou annan *President's Village*. Nou konnen nou annan kouvan Ste Elizabeth. Nou konnen nou annan *Foyer de la Solitude*. E byensir nou annan *Foyer de Nazareth*.

Ladan *President's Village* si ou le li i sa enn ki konekte avek Leta akoz i ganny en sibvansyon atraver Bidze. E osi i tonm anba parasol NCC.

E legalman Leta i annan en lobligasyon pou li kre letablisman sa bann lenstitisyon. E mon pou vin lo son kad legal.

Prezan sa bann fwaye i egziste dan en konteks legal ozordi Sesel, ki ti dekoul form Konstitisyon e ziska ou al Lalwa *Children Act*.

Me Lalwa *Children Act* bann lamannman ki'n ganny fer ladan, in pre, bann eleman predominant dan bann lamannman ki'n ganny fer in about proteksyon zanfan.

E si nou ava rapel byen an 2020, Lasanble ti pas en Lalwa ki ti *ban Corporal Punishment*. Savedir pou bat zanfan.

E nou ti osi met nou anliny avek Konvansyon Lae an relasyon avek drwa zanfan. So si nou get byen tou ban travay ki nou fer in baze lo drwa zanfan. Lo proteksyon zanfan.

Me form en perspektiv proteksyon kont labi.

Sa in toultan *focus* primordyal. E ler mon pe get Mosyon, Mosyon li i pe bouz *from* proteksyon *from* labi. E i pe bouz ver sa *care package* ki ganny donnen avek en zanfan, ki ava enkli son proteksyon *from* labi.

Me ki ava enkli lezot eleman ki ava fer ki ou devlop en zanfan dan en fason *holistic*, dan en fason antye. Kot sa zanfan i ganny en landrwa ki *safe* pou li grandi.

En lanvironnman ki ava enkli tou bann konponan ki antre dan devlopman en zanfan. Prezan si nou regard bann provizyon legal ki egziste kouraman. E nou regard Konstitisyon, nou pou bezwen pran bann bout sorti en pe partou pou nou kapab met li an perspektiv.

So nou pou komans, si nou komans avek Lartik 18. Nou vwar Lartik 18 i fer provizyon an relasyon avek lentansyon pou miner.

Lartik 19 i koz lo bann *core proceeding* i ava an piblik. E i koz lo, e Lartik 19. 19 (9) (a) i koz lo *welfare of person under the age of 18*.

Lartik 29, li i *highlight* devlopman lenportans '*promoting healthy development*

of children.' 29 (c) dan nou Konstitisyon Lartik 31 li i rekonnèt drwa zanfan pou ganny proteksyon spesyal aköz zot vilnerabilite.

E dernyen ki mon'n vwar se Lartik 33, e li i koz lo drwa paran pou swazir pou anvoy zot zanfan swa dan lekol Leta, swa dan lekol prive.

So i annan en konponan legal ki enkorpor proteksyon zanfan. Malgre ou bezwen al tir li en pe partou.

Prezan problem ki nou annan se ki sa bann konponan legal i mars avek lefe ki sa zanfan i ava annan en *guardian*, en paran pou asire i kapab pas dan sa parkour lavi.

Me ler i napa. Mon krwar se la kot Mosyon pe sitye li. Ler i napa i bezwen annan en lot lenstitisyon, en lot landrwa kot sa zanfan i bezwen ale.

Me kot nou vwar nou pou annan serten konsern prezan nou ler nou vin Sesel, nou diferan lenstitisyon in sey pran sa size pou sey regard li.

E si nou *go back to* dan Lasanble Nasyonal. E nou *go as far back as 1997*, sa size ti vin devan Lasanble atraver bann kestyon.

E a sa moman ti annan en kestyon pertinan ki ti ganny anmennen par Onorab De Commarmond.

E Onorab De Commarmond ti demann en kestyon, sa '97 mazin byen - kot i ti demande, i ti demann Minis pou mendev ek Zafer Sosyal pou enform Lasanble, ki plan Minister pou bann zenn par lao 18an e ki ankor pe reste dan Vilaz?

So nou ava note ki sa size in en size ki'n devan laport, ki'n lo latab Lasanble depi en bon pe letan. E a plizyer repriz bann Manm Lasanble in enterakte avek sa size.

Dezyenm fwa ki sa size in vin devan Lasanble ankor - pa dezyenm fwa me en lot fwa ki ou kapab note sa ti vin devan Lasanble, sete safwasi en kestyon par Onorab Ginette Gamatis. E la i ti koz lo plan ki Minister ti annan pou bann zanfan ki kit Vilaz e ki pa kapab retourn kot zot fanmir.

Nou pa ti pe koz zis zanfan 18an, me lezot zanfan. E ti annan plizyer dimoun ki ti demann kestyon lo sa size.

Ti annan ou menm ou Mr Speaker, kot ou kestyon ki ou ti demande ti an relasyon avek en kestyon ki ti ganny demande par Onorab Ramkalawan sa letan. Ki ti koz lo sa *care plan* ki sipoze an relasyon ek bann zanfan. E en pe pli devan Onorab Jenifer Vel sa letan ki

koz lo sa size *orphan and foster child*.

Ki anmenn nou lo sa pwen *foster child* e ladopsyon manner i ganny prevwar. E bann provizyon legal ki egziste ozordi pou ekoniz adopsyon.

So ki nou pe vwar, malgre ki diskisyon in tourn otour *care plan*, in toultan retonm lo labi. In toultan retonm lo proteksyon zanfan. E *not as much focus* mon - *I stand to be corrected* - pa'n ganny mete lo sa *care plan*. Lo ki manner i ganny *manage*. E ki manner i ganny sa.

Prezan si nou retourn dan Lalwa Zanfan e nou komans regard seksyon 99 - Seksyon 99 i koz lo '*the duty of Government to provide and maintain such residential and other establishment as may be required for the purposes of this Act.*'

Savedir seksyon 99 Lalwa i prevwar ki Leta i kapab met bann letablisman pou *purpose* sa Lalwa. Pou delivre lo sa ki sa Lalwa pe demande.

E si nou al anba Lartik 100 (1) *Children's Act*, i koz lo 2 eleman. E sa se *voluntary care*. Kot en zanfan i kapab ganny mete volonterman dan *care* Direkter Servis Sosyal.

Ki li i sa dimoun ki pran ka sa zanfan ler son pran pa pe kapab pran ka sa zanfan.

Oubyen ler napa en *guardian* pou sa zanfan.

E dezyenmman, i koz lo *compulsory care* ki lamannman ankor enn fwa ki nou ti fer ki Lasanble ti fer mon krwar an - mon pa konnen si an 2016, ti an relasyon ek kreasyon *Tribinal Lafanmir*. *I stand to be corrected*. Me ankor enn fwa sa ti pou ekoniz pou tir zanfan dan en lanvironnman kot zot pa *safe* pou anmenn li dan en lanvironnman pli *safe*.

So ki sa pe dir nou? I pe dir nou poudir sa kad legal i koz lo sa bann letablisman, sa lenstitisyon. Prezan si nou vin drwat lo Vilaz Prezidan., I pa'n al osi lwen petet pou kre en *schedule* anba sa Lalwa pou dir, la en letablisman ki Leta i bezwen annan, e la en letablisman ki Leta i bezwen *maintain*.

Malgre ki nou rekonnet son legzistans atraver Bidze. Sa Lalwa pa dir ou dan en fason kler net, si sa i en letablisman ki leta pou *maintain*.

E prezan kot nou vwar ki manner sityasyon i von en pti pe pli kompleks, se anba Lartik 100(1) menm Lalwa i koz lo Direkter e sa dimoun ki ansarz en letablisman '*for residential care of children*'.

Shall encourage and make all available facilities for

the parents or guardian of a child, resident in the establishment to keep in close touch with the child.'

Savedir i annan en lobligasyon lo en lenstitisyon Leta. E la mon pa pe koz lo *President's Village*, me lo Direkter Servis Sosyal.

E sa dimoun ki ansarz en lenstitisyon pou fer sa travay zisteman pou ede dan sa *care package* ki sa zanfan i gannyen.

E mon krwar se la kot nou koman Lasanble nou bezwen pozisyonn sa ki nou pe rode, se pou nou vwar ki manner nou kapab anrasi sa konponan dan Lalwa, si sa ki Lasanble i swete. Pou ki nou kapab fer ki i ava kre en lankadremen pli kler pou ki manner Vilaz Prezidan i ganny siporte.

Akoz serten problem ki egziste ek Vilaz Prezidan pa pou zanmen kit nou.

Premyerman ler zanfan i ganny 18an i pou bezwen sorti dan vilaz Prezidan. Me si ou get li *on the flip side*. Si nou pe dir Vilaz Prezidan i sipoze en fanmir pou en zanfan. Ler ou ariv 18an dan ou fanmir normal, ou pa ganny demande pou kit lakour ou paran. Nou konpran sa?

So se sa difikilte ki nou annan pou nou armoniz tou sa ki nou bezwen fer otour sa.

Se sa kot i enportan ki koman Mover Mosyon, la i annan en rekomandasyon ki mon pou met devan ou. Ki mon krwar i neser pou nou fer dan konteks aktyel.

Manner mon pe gete Gouvernman in kre 2 antite. Nou annan Minister pou Lafanmir e nou annan Minister pou Zafer Sosyal.

E dan milye prezan ou pou annan Vilaz Prezidan. Dan mon lopinyon, sa i mon lopinyon, i devret pli kler lekel ki pou annan responsabilite Vilaz Prezidan.

Akoz ler i mank en lenstitisyon ki annan sa responsabilite. E son *parent policy Ministry* pa kler, *then* ou kre en lanbigite dan Polisi.

E tou a ki nou pe demande pou pri. Akoz en Minister pou bezwen en direksyon, lot pou bezwen en direksyon.

Mon konnen Minis in reasir nou sa pa pou arive. be administrativman pou bann dimoun ki'n travay dan Gouvernman, nou tou nou pou dir ou poudir i pou difisil pou ou akonpli sa ki ou pe akonpli si ou pe kre Polisi dan 2 diferan landrwa.

Akoz si nou get en lot lenstitisyon ki egziste ozordi, e sa se *National Commission for Child Protection*, li i ganny

apwente par Minis Zafer Sosyal. E i tonm anba responsabilite Minis Zafer Sosyal.

So mon krwar mon en premye pwen ki nou bezwen koz lo la. se etabli klerman lekel ki pou *manage* m Polisi otour sa Vilaz.

Akoz sa i pou benefisyé lafason ki nou kre *the management structure for the village*. Napa problem si *NCC i act as* sa, i *act* dan en fason *supervisory* dan relasyon ek sa Vilaz.

Me lefe i reste ki sa bann zanfan ki pou ganny plase dan sa Vilaz i tonm anba responsabilite Direkter Zafer Sosyal anba Lalwa.

E anba Lalwa i dir ou Direkter Zafer Sosyal an relasyon ek zanfan, i an relasyon ek sa Minister ki annan responsabilite pou zanfan.

Me ozordi Sesel mon en pti pe, mon pe ganny difikilte pou mon konpran lekel Minister ki annan responsabilite pou zanfan. Eski i Minis Lafanmir? Oubyen eski i Minister Zafer Sosyal?

Sa lanbigite li menm dan konstriksyon Polisi nasyonal i fer ki nou pou annan serten konfizyon dan lafason ki lenplimantasyon i ganny fer.

E pa en keksoz ki difisil pou rektifye aköz mon krwar nou bezwen eklersi li pou ki zisteman sa care *package* ki bokou Manm Lasanble in koz lo la pandan plizyer lannen.

I ava vin pli kler lo ki mannyer nou pou kapab etabli li. E ki mannyer nou pou enplimant li. E pou ranforsi sa pwen ki mon pe fer, ler nou pran en zanfan ki *end up* dan Vilaz Prezidan, i swa en orfelen. E nou'n koz lo zanfan osi ki *semi-orphan*, anba Lazans Proteksyon Sosyal i deza annan en kad ki apel *semi-orphan benefit*. E li ankor enn fwa i ganny *manage* par Minister Zafer Sosyal.

So nou pe konpran ki son kad menm finansyel, menm sipor, i anba en Minister. Me son kad Polisi i tonm dan 2 Minister.

E sa dan li menm i kapab kre serten difikilte. Le pwen ki mon pe fer se ki si Lasanble i serye about sa Mosyon, nou bezwen demande ki i annan en kad kler ki ganny etabli.

Whether le 2 Minister i kre en Komite ansanm, sa i pou zot swa. *Or whether* nou annan en *body* ki responsab. E sa pou fer li pli fasil pou nou tou pou nou kapab konpran kote nou pe ale avek.

Prezan dezyenmman, sa i en pwen ki Onorab Cosgrow in tous lo la, ozordi lafason ki striktir e *management home* i ganny fer, mon pou difere avek Onorab Adelaide lo si nou pou kapab *run* Vilaz Prezidan koman en biznes, ki pa pou posib.

Mon konpran ki ou pe sey dir, me mon krwar si nou pran en bout dan sa ki ou pe dir e nou koz lo sa efikasite ki nou bezwen ganny dan son *Management* e nou kre en kad pou etabli sa efikasite.

E nou siport sa kad atraver en provizyon anba Lalwa, kot nou dir poudir sa i ava en lenstitisyon ki Leta i met a dispozisyon pou bann zanfan ki trouv zot dan sa sityasyon, *then* mon krwar nou ava pe *achieve* serten lobzektif.

Mon konnen bokou dimoun pa pou dakor avek sa ki mon pe dir aköz, e sa ki Onorab Arissol i ti dir osi i fer sans. Se ki ou, ou pa kapab fer ou zanfan - Mon konnen mon annan manm fanmir ki pou dir mwan sa taler.

Pou dir bann dimoun pa kapab fer son piti apre Leta ki pou sonnyen pou li. Me ou bezwen get li lot fason osi. Si ou, ou sa dimoun ki santi ozordi ou kapab sonny ou zanfan,

demen ou pa dan en pozisyon ou fer li.

Lalwa i dir, a en moman donnen ki en zanfan i dan en lakour, i dan en landrwa kot son *guardian* oubyen son paran pa kapab *cater*, pa kapab sonny li. pa kapab okip li, Leta ki bezwen pran sa responsabilite aköz Leta anba Konstitisyon i en lobligasyon pou pran sa responsabilite.

Se sa ki fer ou Mosyon enportan, aköz sa lobligasyon konstitisyonnèl ki Leta i annan ki i bezwen soutenir.

E ou Mosyon pe demann en kestyon fondamantal. Se eski Leta pe realiz sa responsabilite konstitisyonnèl ki i annan?

Se sa ki fer sa Mosyon relevan an relasyon avek kestyon ki i pe demande.

So Mr Speaker, dan mon lopinyon mon'n propoz serten *way forward*, ki mon krwar i ava ed nou *achieve* en rezilta. E ki petet nou ava vin sa Lasanble ki dan plas nou pe kontinyen repet menm size otour lannen e lannen, nou ava vin sa Lasanble ki'n *set* en lot standar an relasyon avek ki mannyer sa lenstitisyon i ganny zere, i ganny *managed*.

Nou pa pou kapab rezourd tou probleman. E mon bezwen fer kler ki i pou reste en difikilte

pou en zanfan ki sorti Vilaz Prezidan, re asimil konpletman fasilman dan sosyete si napa resours pou fer li.

Mon pa pe koz lo en pwennvi mantal. Lo en pwennvi akademik. Mon annan zanmi ki'n pas atraver Vilaz Prezidan ki'n sorti, ki'n travay, ki'n kontribye, ki'n avanse dan lavi.

Lo en pwennvi resours i pa pou fasil. Akoz si ou nap en baz pou komans lo la, ou bezwen al kre ou baz ou menm. I pli difisil.

Dezyenmman lo en pwennvi, e nou bezwen aksepte lo en pwennvi lafeksyon, lo en pwennvi sa devlopman sosyal. I pa vedir ki en zanfan ki grandi dan en bon fanmir i vin en pli bon zanfan. Non.

Me i annan lasyans ki prouv sa. So sa osi i en eleman ki nou bezwen zwe lo la.

E trwazyenm pwen i en eleman ki mon le fini lo la. E sa se ki mannyer nou le ki nou sosyete i ganny defini?

Nou en pti pei kot 90mil dimoun. E malgre nou'n adopte en kantite mers bann pei was. E dan bann pei Was bann *Homes* ki ganny servi pou eberz bann zanfan, bann zenn.

I pa neserman bann meyer landrwa pou sa bann zenn. Me mwan mon krwar

nou, nou kapab fer li diferan. Nou kapab fer li pli byen.

Nou kapab fer li pli byen akoz nou en pti pei, e la anndan tou dimoun i konn kanmarad, degre separasyon ant sak Seselwa mon krwar i menm en dimoun.

Dan en lot pi pli gran i swa 5 dimoun. Me ler mon koz degre separasyon, isi tou dimoun i konn kanmarad.

So, mon santi poudir nou kapasite pou nou kapab fer sa i pou bokou plis ki en pei ki bokou pli gran. E nou kapab adapte en model pou nou, ki satisfere nou konteks pou nou kapab akonpli sa ki nou pe fer.

So parey mon bann koleg lo lot kote latab in eksprimen. Sa Mosyon i en Mosyon ki pe koz lo en keksoz ki byen, ki pou ede avek e n konteks aktyel.

E fotespere prezan Gouvernman i *take onboard* sa ki Lasanble pe propoze. Mersi bokou.

MR DEPUTY SPEAKER

Mersi Onorab Pillay. Mon ava prezan envit *Leader of Government Business* Onorab Georges ou annan laparol.

HON BERNARD GEORGES

Mr Speaker bonn apre midi Mr Speaker. Bonn apre midi tou

bann Manm e tou dimoun ki pe ekout nou.

Mr Speaker bokou in ganny dir lo sa Mosyon. E mon la pou repet sa ki'n deza ganny dir. Mon ti a kontan zis aport en pti kontribisyon ki mon krwar pa'n ganny ase *focus* lo la.

I annan annefe 2 kategori zanfan ki bezwen al dan bann fwaye. Parey in ganny dir enn se bann *orphans* oubyen bann *semi-orphans*.

En lot se bann zanfan ki pa bann orfelen, me ki zot paran pa kapab pran swen avek zot e ki lasosyete i bezwen pran e met zot dan enn sa bann fwaye. Sa se 2 kategori zanfan ki pa neserman diferan. Me ki kapab annan en serten diferans dan lafason ki'n ganny *upbringing*.

Alor i enportan ler nou pe regard fwaye. Ler nou pe regard Lalwa pou pran an kont ki i annan sa 2 kategori zanfan vilnerab, ki lasosyete i annan en devwar pou proteze.

E ki lasosyete i annan en devwar pou *house* e pou fer sir ki zot grandi tel parey bann zanfan ki grandi dan bann fwaye normal.

E par lepase isi Sesel nou'n vwar ki avan bann fwaye in vin an plas, ti annan parey in ganny dir sa sistenm zanfan sonnyen. Kot en paran oubyen

en manm lasosyete i pran zanfan e i fer sa bann zanfan grandi, akoz swa li i napa zanfan. Oubyen swa son paran napa le mwayen pou fer sa bann zanfan grandi.

E sa ti en gran kontribisyon. E i en kontribisyon touzour dan nou sosyete ki nou bezwen selebre. Epi apre natirelman se bann legliz. Prensipalman legliz Katolik ki'n etabli bann fwaye parey in ganny mansyonnen par Manm ki'n koz avan mwan.

E zot in pran an swen par zot misyon pou anmenn soutyen dan kominote. Zot in pran swen bann zanfan. Sirtou bann orfelen ki pa ti annan en landrwa pou zot grandi konvenableman.

Epi nou in ariv sa ki nou apel ozordi Gouvernman. Me enn bann rezon ki mon'n pran laparol ozordi. Se pou dir ki annefe sete pa en linisyativ Gouvernman. Vilaz Prezidan ti en linisyativ en lorganizasyon Alman kim apel *SOS-Kinderdorf International*.

Rezon mon konn sa se ki sete mwan ki ti azir pou zot ler zot ti etabli zot lekor isi Sesel. Mon pa la ozordi pou pa donn remersiman bann ki merit remersiman. Me Vilaz Prezidan pa ti en linisyativ Gouvernman.

A sa lepok, sete Mrs Martha Rene ti ti'n fond NCC ki ti'n trouv sa lorganizasyon. E ki ti'n anmenn zot isi Sesel. E zot *in set up* sa ki ozordi nou apel *President's Village*.

Akoz ankor enn fwa Prezidan a sa moman pa ti anvi ki sa vilaz i ganny apel *The SOS Village*. E i ti santi ki i ti ava pli byen si sa vilaz ti apel Vilaz Prezidan.

Me sa se en lot keksoz. E nou pa bezwen antre ladan ozordi. En pe pli tar. In annan en kategori zanfan ki dan *Children Act* nou apel zanfan Prezidan.

Ankor enn fwa po menm filozofi. Me annou pa rod problemm kot problemm pa egziste. I enportan pou koz lo *SOS-Kinderdorf* Mr Speaker aköz zot annan en model ase spesyal.

E zot model se sa enn. E mon pe lir zot *mission statement* la devan mwan.

"We give children in need a family. We help them to shape their own future. We contribute to the development of their communities."

E zot annan 4 prensip. E sa 4 prensip. E sa 4 prensip nou vwar dan vilaz Prezidan. *SOS Village* i annan 4 prensip. Premyerman sak zanfan i bezwen en manman. E sak

zanfan i grandi dan en meyer fason ler i grandi avek lezot zanfan dan zot prop lakaz. dan en kominote vilaz.

E i normal ki sa vilaz in ganny mete dan milye en kominote, dan kominote Port Glaud. I pa'n ganny met an deor en kominote. In ganny met dan milye en kominote. Si zot realize zot ava vwar ki in konpoze dan plizyer lakaz.

E sak sa bann lakaz i annan en Manman. E sak sa bann manman i annan 4 ou 5 zanfan otour zot. ki zot pe fer grandi egzaktaman parey ti ava le ka dan en fwaye normal.

E se sa vizyon *SOS-Kinderdorf*. E mon krwar nou bezwen met sa en kote pou nou prezan eksplor lot model. E sa se model bann fwaye ki ganny zere par Legliz. Zot, zot annan en lot model. Aköz zot napa anfen zot bezwen, zot napa kekfwa le mwayen ki Gouvernman i annan.

Me zot model i pa parey. E la bann zanfan i grandi dan en fwaye. E non pa dan model *SOS* ki ou grandi koman en fanmir avek en manman ki okip ou.

E ki sak lakaz zot fer zot prop *shopping*. Zot fer zot prop meni. Zot kwi zot prop manz. E en lakaz i diferan avek zot.

Donk ou annan sa diferan model.

Sa ki sa Mosyon pe rode ozordi i lekel ki pou pli bon model isi Sesel? Ki striktir legal ki nou devret adopte pou nou pei, akoz toultan nou pou annan. Malgre ki nou dir ki ti ava swetab ki tou dimoun ti ava pran zot responsabilite, nou konnen zot pa pou pran.

Sesel pa inik dan sa konteks. Tou pei i annan zanfan ki napa paran. Oubyen ki paran pa kapab okip zot, alor Leta i bezwen pran zot an sarz. Anfen si i pa Leta, en lenstitisyon i bezwen pran zot an sarz.

Sa ki Mosyon pe rode ozordi se en striktir. Akoz ziska prezan Gouvernman Sesel pa'n fer naryen pou etabli sa striktir.

In les SOS fer. In les Lanmisyon fer. Gouvernman li menm pa'n *set up* en sistenm. E sa fodre nou konpran tre byen sa ki Onorab William pe demande ozordi.

Se ki Gouvernman i fer sa an traver en striktir legal, ek en striktir ki pou performan. I annan e mon pa bezwen repete. Bokou lenstitisyon isi Sesel.

Nou annan bann legliz zot menm. Nou annan *Management Vilaz Prezidan*. Nou annan *NCC*. Nou annan striktir sosyal. I annan Departman

Lafanmir. I annan plizyer striktir ki kapab pran sa an men.

Sa ki Onorab William pe rode se annan enn ki pou mars *across the board*. Kot nou pa pou bezwen les sakenn travay an izolasyon enn avek lot.

E la mon krwar ki i annan en lobligasyon lo Gouvernman pou Gouvernman fer li. Tel parey bann *Old People's Homes*.

Avan sa lete Lanmisyon ki ti pran sarz bann dimoun ki pa ti kapab, ki ti napa en paran pou *care* pou zot. Me apre Gouvernman in vini i *set up* in pran sa langazman. In *set up* bann *Homes* partou.

Ler nou regard lekol avan sa. Sete bann Lanmisyon Katolik e Anglikann ki ti run lekol isi Sesel. Me avek en serten letan Gouvernman in dir non, zot bezwen met sa dan en striktir etatik. E Gouvernman in pran plito parfwa mal, parfwa byen, in pran tou sa bann lekol pou zot met dan en striktir legal.

E se egzakteman sa ki Onorab William pe rode ozordi. Annou etabli en striktir pou en striktir nasyonal, kler, transparan avek en bann paramet pou *take care of* sa *batch* bann zanfan vilnerab.

Mr Speaker mon napa bokou letan mon pa oule depas

letan ki ou'n donn mwan, me mon bezwen ozordi dir ki in annan par lepase serten *attempt* pou fer sa.

E si mon regard seksyon 100 dan *Children Act* ki Manm ki'n koz avan mwan in mansyonnen, nou vwar ki Gouvernman ti'n *set up* dan sa *Act*, en seri letablisman ki zot ti swete fer.

En *Day Nursery*, la in fer en pe partou. En *Short Stay Children's Home*. En *Children's Home* pou *long-term care*. En *Juvenile Center*. En *residential training establishment*. En *attendant center*. En *Residentiary Orientation Center*. En *Youth Residential Treatment Center* eksetera.

Tousala in *set up*. Me malerezman apard *daycare* okenn lezot pa ganny enplimante. Sa ki Onorab William pe dir ozordi se si nou'n fer Lalwa e ki nou annan en Lalwa. Annou aplik li. Annou demann avek Gouvernman, be met sa Lalwa an aplikasyon, annou annan en striktir Nasyonal.

E an mezir ki nou pe fer sa Mr Speaker, mon pa pou kapab ozordi pa dir, pa remersye sa bann dimoun ki o fir tou sa bann lannen in fer telman pou pran swen avek nou bann zanfan vilnerab.

Tou sa bann lenstitisyon. SOS li menm. Lanmisyon sirtou. Akoz lanmisyon i la byen avan. SOS li i kontinyen touzour.

Bann *social workers* ki travay. Bann manman dan Vilaz Prezidan. Tou sa bann dimoun ki'n devoue zot letan. In devoue zot lekor pou pran swen avek nou bann zanfan.

E nou bezwen remersye zot. e nou bezwen dir zot, Gouvernman i ava vini prezan i ava fer son bout. I ava pran sa lasarz avek zot. E i ava ankadre li e fer sir ki tou sa bann zanfan pou tou bann rezon ki'n ganny dir ozordi, enkli bann rezon delenkans. Enkli bann rezon marmay ki al lo *bus stop* e ki pa al travay. Oubyen ki pa al lekòl. Enkli tousala. Gouvernman i pran zot ansarz e i met zot dan en striktir.

Mwan personnelman Mr Speaker, malgre ki mon kontan vwar tanzantan bann volonter ale penn bann fwaye, oubyen koup gazon, oubyen koup seve.

Oubyen sa bann keksoz ki nesese dan en kominote, mon pa krwar ki nou devret depann nesese man lo sa bann dimoun.

Sa i bezwen vin en *plus*. I bezwen vin en keksoz adisyonnèl. Labaz - labaz i en baz etatik. E Gouvernman, sa enn Gouvernman i bezwen, e

mon sir ki i pou fer li apre ki sa Mosyon in pase, restriktir sistenm *care* pou bann zanfan isi Sesel. E nou'n fer li dan Kod Sivil, Parey in ganny dir pli boner.

Restriktir sa sistenm care. Pou ki okenn bann zanfan dan sa 2 group ki vilnerab, pa vwar zot lekor annan en problemn dan le fitir. Lekel sa striktir ki pou ganny fer? Nou, nou en Lasanble nou kapab selman pas Mosyon e demann avek Gouvernman.

I annan sifizaman striktir parey mon fek mansyonnen ki deza egziste. Gouvernman pa bezwen re envant sa bann striktir. Sel keksoz ki Mosyon pe demande. Mon ava siport Onorab dan sa demann, se demann avek Gouvernman fer sa striktir Nasyonal.

Fer Lalwa vin pli performan dan en fason ki sa bann zanfan ava ganny ankadre parey zot devret. Mon remersye ou Mr Speaker.

MR DEPUTY SPEAKER

Mersi Onorab Georges pou sa lentervansyon. Avan ki mon pas laparol avek loter Mosyon, parski ti en Mosyon ki mon ti anvi entervenir lo la.

Akoz lot fwa letan ou ti termin ou Mosyon, ou ti pe demande ki mannyer prezan i al

kot Egzekitiv aköz sa kestyon *Motion binding*.

E en keksoz ki menm setyenm Lasanble pe zve avek. Mon ti pou propoze ki sa Mosyon bann *MNA* dan sa rezyon ki zot ti zwenn.

Zot deza annan en *working group* pou *team up* avek Komite ouswa *Caucus* Madanm. Aköz enn zot *term of reference* i dil ek zanfan, pou zot regard sa dosye. Aköz mon krwar Lasanble in pran en pozisyon. I annan en kantite komansman ki'n ganny fer.

I annan *kind of legal framework from Constitution*. From konvansyon zanfan ki'n ganny koz lo la. Sa ki Onorab George e *Leader* Lopozisyon osi in koz lo la.

Be solman apre *what is the way forward? How do we harmonize* tousala? Ki prezan Lasanble ti kapab prezant en Papye.

En pe parey ler nou ti fer avek *Air Seychelles*. I annan bann propozisyon konkret ki sorti isi ki al kot bann partner konsernen.

Probableman organiz enn ou de *meeting* avek tou bann dimoun ki nou ganny en keksoz tanzib *from The Seventh Assembly*.

Sa ki mon ti anvi propoze. Mon ava donn ou floor pou ou *summing-up*. Mersi.

HON WAVEN WILLIAM

Mersi Mr Speaker. Mr Speaker letan mon ekout 2 dernyen entervenan, Spesifikman Onorab *Leader* Zafer Gouvernman.

Mon santi poudir zot in fini fer mon *Wrapping-up* Mr Speaker. E ou ou'n met *the icing on the cake*, akoz enn se ki mon santi ki si sa propozisyon ki ou'n met devan Lasanble, nou kapab komans li o pli vit posib. Pou laplipar bann Mosyon - akoz ki arive se ki piblik deor la i demande.

Me Lasanble i pas bann Mosyon ki annan bann rezolisyon. I annan bann bon, bon rezolisyon ki bann Manm in refer sorti - E la mon ti ava kontan profite remerci tou bann Manm ki'n koze Mr Speaker. Akoz zot in anmenn devan bann bon kontribisyon.

E ki mon santi ki bann lotorite konsernen i devret pe pran li. Konsidere e vwar ki fason nou kapab bouz devan pou en meyer rezilta.

Mr Speaker zis pou met Lasanble en pti pe dan konteks osi ki pe arive la. Par egzanp ozordi la. Ou annan plizyer sa bann zanfan, i annan ki ganny

- Tou le semenn i annan apepre e 3 ki ganny sispann lekol.

Me dapre mon konpran la, i annan en desizyon ki si zanfan i ganny sispann zot pa pou kapab reste lo Vilaz Mr Speaker.

Be zot deza napa en landrwa pou ale. Si sa zanfan pe ganny dir sa. Ki lenpak i annan lo li? E ki lenpak sa pou annan lo lasosyete?

So zis pou, mon anvi fer zot konpran degre gravite. E rezon parmi enn bann rezon akoz nou pe anmenn devan sa Mosyon, pou nou vwar ansanm ki fason nou kapab pli byen fer keksoz.

Mr Speaker, de lot kote osi. Mon anvi osi lans en lapel avek *Management* Vilaz. Akoz dan tou sa bann komisyon. i annan bann travayer ki'n sey al devan pou sey rod rekour.

E mon demann e mon lapel senser se ki sa bann travayer pa ganny viktimize. E mon konnen poudir i annan en zafer Lalwa ki pe ganny diskite pou vin devan *whistle blower*.

Akoz rezon zot in al devan se pa pou ser ouswa kre diskord. Me zot ozordi zot pe rod solisyon parey nou Lasanble nou pe rod solisyon.

So, mon ava demande ki *Management* vilaz e NCC san ki nou pe, zot vwar nou pe kritik

zot. Zot pa viktimiz bann travayer ki osi pe rod solisyon.

Mr Speaker de lot kote mon rekomandasyon osi se ki i annan travayer ki'n fer bokou letan servis laba.

Zot napa sertifika, me zot annan leksperyans avek konesans. Mon demande ki zot ganny valorize zot osi. Akoz la ki pe arive nou pe rod bann nouvo dimoun ki'n ganny *train*. Mon ava demande ki sa legzersis *retraining* i ganny fer osi tou.

Me ki sa bann vye travayer ki annan leksperyans, zot osi ganny valorize akoz mon santi poudir zot travay i en travay ki'n raport serten fri. Menm si zot napa sertifika kot zot pe li avek devosyon.

So Mr Speaker, avek sa de pti mo mon pou aret la akoz ou'n fer pwen lesansyel. E mon vremen apresye. E nou pou *take* ou *on* lo la.

Nou pou pran sa *challenge* pou nou bouz devan avek sa Mosyon avek bann lezot Mosyon ki pou vini a lavenir.

Ankor enn fwa mon remerci tou bann Manm pou zot kontribisyon. E merci pou zot sipor. Merci Mr Speaker.

MR DEPUTY SPEAKER

Merci Onorab. E ler zot fer sa pti rankont pa bliye i annan

Onorab Roucou ki'n dir ou met li *onboard* sa bann zafer.

E osi Onorab Romain akoz i annan en Orfelina dan son distrik. Kekfwa li osi i ti ava enterese.

Donk in ariv ler aprezan pou nou pas lo vot pou Mosyon ki devan nou prezante par Onorab Waven William Manm Elekte pou Distrik Grand Anse Mahe.

Ki lir koumsa;

'Swivan bann problem ki bann sant orfelen pe fe fas avek par egzantp Vilaz Prezidan, Lasanble i demann Gouvernman pou revwar Polisi, stratezi, e pou amann Lalwa zanfan pou fasilite en swen konpreansiv dan pei.'

Mon ti ava demann tou bann Manm ki an faver pou endike silvouple?

Mersi. Okenn Manm ki kont? Mersi.

Donk Mosyon prezante par Onorab William. I annan 24 Manm ki'n vot an faver. Napa person ki'n vot kont. Napa person ki'n *abstain*. Alor sa Mosyon in pase par linanimite.

Mersi pou zot partisipasyon nou pou pran en break la ziska, 2er i ava *ok*? 2er en kar akoz i annan ABC, i annan Komite Defans ki'n al en vizit, sa ki mon konnen pe arive pandan *break*.

So 2er en kar nou zwenn.
Alor nou ava *adjourn* pou la.

(BREAK)

MR DEPUTY SPEAKER

Bonn apre midi tou dimoun.
byenveni pou sa apre midi
kontinyasyon nou travay pou
ozordi Merkredi. *Next* lo
program lo *Order Paper* se
Mosyon ki pe prezante par
Manm elekte pou distrik Grand
Anse Praslin Onorab Wavel
Woodcock.

Mon ti ava envit nou
prezant ou Mosyon. Nou ava
prezante avan ki ou fer ou
lentervansyon. Mersi.

HON WAVEL WOODCOCK

Mersi Mr Speaker. Mon Mosyon
i lir *comme* swivan;

Mon ava komanse par
premyerman dir bonn apre midi
tou zabitan Praslin. Tou Manm
e tou dimoun a lekout.

Anvi ki Praslin avek La
Digue i anmenn bokou atlet
talante dan konpetisyon atletik
enterskoler e lezot konpetisyon
Nasyonal, Lasanble i demann
Gouvernman pou met an plas
fasilite sportif nesaser pou
devlopman bann atlet Zil Pros.
Mersi.

MR DEPUTY SPEAKER

Mersi Onorab. Manm ki pe ...?
Onorab Doyace Porice pou
segonde.

HON DOYACE PORICE

Mersi Mr Speaker. Bonn apre
midi tou mon bann koleg *MNAs*.
E tou dimoun a lekout.

Mon segonn sa Mosyon e
permet mwan pou annan enn
de pti mo apre. Mersi.

MR DEPUTY SPEAKER

Mersi Onorab. Donk aprean
mon ava envit loter Mosyon pou
fer son prezantasyon silvouple.
Mersi.

HON WAVEN WOODCOCK

Mersi Mr Speaker. Mr Speaker
Praslin ek La Digue i prodwir
bokou atlet talante. Bann atlet
kosto, konpetan, e kapab.

E i annan bokou potansyel
lo sa 2 zil. Dan lepase e menm
resaman nou'n prodwir bokou
bann atlet *track and field*.

Nou'n prodwir bokou
bann Judoka ki pe perform
onivo enternasyonal. Mon pe
mazin zisteman *on top on my
head* la, mon mazin Kalix ek
Brigitte Cesar.

Mon mazin osi Dominic
Dugasse, en veteran dan *judo*.
Ki annefe i annan en
konpetisyon i pe ale la tre
byento. Lo kote bann lezot atlet
la Digue lo *field*, lo *track*, mon

mazin Natasha Bibi ki sorti La Digue e lezot ankor.

Bokser nou'n prodwir bann bokser ekselan. Mon pe mazin Adrien Volcere ki sorti Grand Anse Praslin dan mon distrik, ki ti ganny meyer bokser an 2017.

Lo kote *watersport* osi nou'n prodwir plizyer bann bon atlet. La mon pe mazin Bertrand Lablache, Jean-Marc Gardette, Jacquelin Languilla.

I osi annan bann nouvo zenn osi ki pe monte ozordi, bann elit, bann atlet elit lo nivo enternasyonal osi.

Mr Speaker, mon pa pou bliy osi bann sport lekip parey *volleyball*, *basketball* e futbol, kot Praslin ek La Digue in prodwir bokou atlet ki ozordi zot dan Tim Nasyonal. Zis pou mansyonn enn, de, lo kote *volleyball* i annan Angelique Adeline. Futbol nou annan bann fouter parey Collin Esther, Dan Fanchette. Dan ek Brandon Fanchette.

La Digue, Ricko Julius. Mon mazin osi Elton Monnaie, Shaun Barbe ki'n zwe Praslin e in osi zwe dan La Passe La Digue.

Mon mazin Volleyball Fanny Athanase. Jania Stravens. *Volleyball* zonn Rick Capricieuse. E plizyer lezot

atlet ki nou'n prodwir - ki sa 2 zil in prodwi.

E zisteman pa bokou letan pase nou fek dan Sanpyonna Atletik parey nou tou nou'n vwar Praslin in fer vreman, vreman, vreman byen. Nivo ki zot in performen. E nou'n vwar kot Praslin in anmenn bokou lakoup enkli La Digue osi. Praslin in anmenn 7 lakoup. 7 lakoup e La Digue osi in anmenn 8 lakoup.

E nou'n fer vreman byen a tou nivo. O nivo Primer, o nivo segonder. Onivo primer lekol Grand Anse Praslin Primer in sorti koman meyer lekol.

E kote segonder se lekol La Digue. Plis meday lor in al parey mon dir lo sa 2 zil Praslin avek La Digue. E nou pe vreman perform lo en nivo, lo en standar ki ase elve. Menm si i annan en mank fasilite.

Menm si lo Praslin nou napa tartan *track*. Nou napa *track* sentetik. Ouswa bann fasilite neser lo standar, lo norm enternasyonal. *Still* bann atlet in fer vreman byen e non selman parey mon'n dir dan atletik lo kote bann levennman *track and field*. Me nou osi fer byen lo bann lezot, dan bann lezot domenn sportif.

E mon bezwen komanse par koz en pti pe lo sa stad Amitie. E sa stad Amitie i sipoze

en stad konplet avek fasilite *track and field*.

Ler i ti ganny fer ti sipoze en stad ki konplet avek tou bann fasilite neser, pou deservi tou bann atlet. Non selman pou futbol me osi parey mon'n dir bann lezot atlet *track and field*.

E osi bann lezot fasilite ki ti pou benefisye bann *sportsmen* ek bann *sportswomen* lo Praslin.

Me malerezman ki sa pa'n materyalize. E i vreman sagrinan ki apre ki nou'n war sa later kot sa stad ki ti sipoze ganny servi otour sa stad pou fer sa bann fasilite.

Ki enkli parey mon'n dir sa *tartan track*, ti ganny vann avek en biznesmenn lokal. E ler ti annan en proze komersyal ki ti pou al ganny fer lo sa later, ti annan en petisyon par bann atlet e lantrener zabitan Praslin kont sa proze.

Kont sa proze komersyal ki mwan osi mon ti siporte. Mr Speaker i enportan note ki sa petisyon i pa ti en petisyon kont en devlopman Gouvernman ki pou benefisye nou zabitan.

I ti en petisyon kont en proz komersyal lo en later ki ti'n ganny dezinyen pou fer bann proze ki ti pou benefisye bann atlet lo Praslin.

E i enportan fer note ki Prezidan ti ekout nou. Ti ekout bann atlet, ti ekout bann *coach*. Ti ekout lavwa lotorite distrik Praslin.

E sa later i ganny rebran. Gouvernman in negosye avek propriyeter sa later. E Gouvernman in rebran sa later, e dan le fitir nou lespwar se ki sa bann fasilite ki nou bezwen ki pou benefisye nou bann atlet pou ganny fer lo sa propriyete.

Mr Speaker, e mon konnen i lentansyon Gouvernman pou met an plas parey mon dir sa *track* sentetik lo sa laplenn. E osi lezot sa bann fasilite pou bann atlet parey i ti merit ete depi ler sa proze ti sipoze ganny fer.

Mr Speaker, mon bezwen fer note ki mon pe swiv sa tre pres, akoz mon santi poudir sa i enn bann proze priyoriter ki nou bezwen si nou anvi war nou bann atlet avans pli devan.

Annan sa bann fasilite pou zot devlopman. I enportan ki en tel - nou bezwen sa *track* sentetik.

E zisteman sanmdi pase nou ti annan en *meeting* ki osi prezan ti annan tou bann *MNA* ki baze lo Praslin. Mwan menm, Onorab Gill e Onorab Porice obor mwan.

Pou nou diskit lo proze Kato Nwar. E osi nou ti koz lo

devlopman Ile Eve. E sa *meeting* ki ganny organize par Biro Prezidan.

E Onorab Gill ti al pli lwen pou met en *advert* osi lo televizyon. Nou apresye sa e dimoun ti desann an gran nonm.

E nou tou nou'n diskit en pe lo konsep lo sa proze ki osi enkli plan *sports complex*. E mon bezwen fer resorti Mr Speaker ki dan sizyenm Lasanble aneife mon pou donn dat presi.

Le 2 septanm 2017 ti annan en vizit ki ti ganny organize par Minister *Sport* sa letan Minis Mitcy Larue ki ti Minis pou *Sport* sa letan.

I ti desann Praslin avek en delegasyon e osi *CEO* sa letan ti akonpany li. Avek bann lezot zofisye dan Departman *Sport*.

E mon rapel sa ti lo medya osi apre sa vizit ti annan en bann *fan fair*. Proze ti ganny prezante devan medya ti annan en plan ki ti ganny drafte ti ganny prezante avek mwan. Onorab Gill ti la, nou ti war sa plan.

E malerezman Mr Speaker, i en plan ki pa'n zanmen materyalize. sa *sports complex* Ile Eve pa'n zanmen ganny fer.

E fodre note ki sa *sport complex* ti osi enkli *indoor court*, *Indoor gymnasium* pou *basketball* pou *volleyball* - En keksoz ki nou vreman bezwen.

Akoz ozordi parey nou okouran, i malere ki ozordi tou bann klib Praslin pou bann konpetisyon nasyonal, ouswa bann pou partisip dan lig ou bezwen pey en fre, en kou pou zot al Mahe pou partisipe.

Akoz nou napa bann kort ki lo standar. Nou napa okenn *indoor court* ouswa *indoor gymnasium*, ki fer ki sa osi dan en serten sans i afekte osi devlopman nou bann atlet.

Sa *sports complex* ti sipoze osi enkli lezot *indoor sports* parey *table tennis*, *badminton*, *squash*, *fitness trail* e osi ti pou enkli en *fitness trail* ti pou ganny enkorpoze dan sa proze dapre sa plan.

E in toultan annan bann konversasyon, bann koze, bann prezantasyon lo sa proze. Plizyer diskisyon dan Lasanble ki mon menm a plizyer repriz mon'n demann kestyon lo la dan sizyenm Lasanble.

Me i malere ki sa bann keksoz i pa'n zanmen materyalize. En letan Gouvernman ti menm dir ki ti pou annan, zot ti pe fer demars *sponsor*. Ki se Gouvernman Lasin ki ti pou *sponsor* sa proze.

Me malerezman i pa'n zanmen materyalize. I sagrinan pou dir, me selman i le ka ki sirtou ler eleksyon pe aprozé, sa plan i ganny tire dan *Cabinet* zot tap lapousyer lo la.

Zot fer bann *advert* lo la zot dir proze pe al ganny fer. Me i *sad* Mr Speaker ki i pa'n zanmen materyalize.

E 18 septanm 2018 mon ti anmenn en kestyon devan sa Lasanble. E sa kestyon ti pou - parey mon'n dir Minis Larue ki ti responsab pou sport sa letan. Mon ava lir kestyon ki mon ti demande. E sa kestyon i *comme* swivan: -

Eski Minis i kapab dir sa Lasanble, kan ki proze *sports complex* Ile Eve Baie Ste Anne Praslin pou komanse e eski tou fasilite sportif lo sa plan pou ganny enkli?

Parey mon'n dir despite tou sa bann letan 2017/2081, en pkoze ki ti'n ganny promet depi menm avan mon antre mon Lasanble, malerezman sa proze pa'n zanmen, zanmen materyalize.

Me Mr Speaker mon annan lespwar. E enn bann rezon aköz mon pe anmenn sa Mosyon, se pou demann Gouvernman pou fer ki nou ganny sa koze.

Pou fer ki finalman sa *sports complex* i kapab ganny

fer. petet pa lo sa lanpler ki zot ti pe anvizaze. me selman lo en lanpler ki nou kapab annan serten bann fasilite sportif ki pou benefisyé nou bann atlet lo Praslin.

E parey mon'n dir sa *meeting* ti ganny organize Sanmdi pase par Biro Prezidan. Gouvernman ti promet pou fer - e annefe menm avan sa *meeting* ti ganny fer, dan bann previous visit ki nou ti fer kot sa *passenger terminal*, e bann later otour sa *passenger* terminal enkli bann vizit ki nou'n fer dan lepase, nou ti ganny dir par Minister konsernen, Minis Devika e menm Prezidan.

Ki zot pou fer en *meeting* piblik pou nou vin ansanm, pou nou diskite lo konsepsyon. Pou diskite bann plan devlopman lo Zil Kato Nwar e osi lo Ile Eve - bann fasilite ki osi enkli parey mon'n dir sa *sports complex*.

An plis ki sa apart ki sa *sports complex* ki nou ti diskite dan sa *meeting*, ki pou enkli nesessite pou konble ankor en pti bout pou *fit* sa *sports complex* ladan, nou ti osi tous en pti pe lo sa, lo *fitness trail*.

Annefe Mr Speaker, mon pou bezwen ozordi felisit mon ser ki la obor mon Onorab Doyace Porice.

Menm si i en Mann proporsyonnel, mon apresye

linisyativ ki menm si Gouvernman avan pa'n fer, bann Minis avan pa'n fer, Onorab Porice in pouse. Ti son linisyativ ansanm avek son bann volonter ki'n met ansanm. E in tap laport plizyer bann biznes lo Praslin enkli bann lezot Minister.

Enkli NSC, li osi ki'n ed li. Ki zot in nobou kapab ozordi fer en *fitness trail* Praslin ki enkli tou bann lekipman.

Bann lekipman *outdoor gym*, ki pou ede dan devlopman bann atlet lo Praslin. E mon dir li ki zabitan Praslin i apresye pou sa proze ki ou'n inisyé, ki ozordi in konplete Marie Jeanne Estate Baie Ste Anne.

(APPLAUSE)

HON WAVEN WOODCOCK

E Mr Speaker, mon bezwen dir ki mwan osi mon pe swiv en pe dan son lepa. E mon'n fer demann ofisyel avek *CEO* Jean Larue pou ganny lekipman pou fer osi en *outdoor gym* pou lannen prosenn.

E dapre sa ki in dir mon se ki i annan 2 distrik ki'n fer demann ofisyel pou ganny bann lekipman pou fer *outdoor gym*. E mwan mon fer sa ofisyel. E nou'n fini idantifye landrwa kot nou pou fer sa.

E Mr Speaker, mon osi bezwen dir ki Praslin ozordi koman bann zabitan ki sorti Praslin, nou rekonnèt zefor ki bann atlet lekol primer e segonder Praslin in mete.

Nou rekonnèt zot lakonplisman. E tou Pralinwa, *well* Sesel an zeneral nou bezwen rekonnèt e donn sipor sa bann atlet ki sorti Praslin.

Ki menm avek resours limite. Avek tou bann defayans, zot pe toultan prodwir bann rezilta ki anmenn loner pou nou pei.

E zisteman pou onor nou bann atlet Praslin ki'n fer vreman byen dan dernyen Sanpyonna Atletik Enter skoler, sa *weekend* ki la Dimans i annan en aktivite *Le Duc de Praslin*.

En seremoni, en dezennen, kot nou pou onor tou sa bann atlet Grand Anse Primer, Baie Ste Anne Primer e osi bann atlet Praslin Segonder, pou remersye zot e pou felisit zot pou zot *achievement*, pou sa bon rezilta ki zot in anmennen pou nou zil Praslin.

E mon profit sa lokazyon pou mon remersye Mr Robert Payet, Lucas D'Offay, Farida Camille, e lezot ankor ki'n dan en fason ou en lot ede pou fer en tel aktivite, pou nou onor

nou bann atlet ki sorti lo Praslin.

E Mr Speaker i enportan osi pou nou rekonnet bann *PE Teachers*. E la mon pe mazin ban teachers ki depi ler mon i lekol zot ankor la.

Parey i annan *Sir James Barra*, ki osi en lantrener foutbol. *Sir Benjamin* ki menm si in pran son retret ozordi, i ti *still* donn e koudmen bann atlet segonder ki ti al partisip dan Sanpyonna Atletik Mahe.

Mon mazin Rick Capricieuse, Mis Sylvette. E zisteman nou bezwen rekonnet. Tou bann Manm i enportan pou nou osi rekonnet bann *PE Teachers*.

Pa zis nou bann atlet me nou bann *PE Teachers*. E lo Praslin nou'n fer sa. Mon'n menm mon organize pou donn zot en pti token pou zot bon rezilta ki zot anmennen lo nou zil.

Mon fer pou nivo primer e byento nou pou osi fer e pti keksoz pou bann *PE Teachers* segonder.

Mr Speaker, nou bezwen siport e ankouraz nou bann atlet. E zisteman apre ki nou bann atlet ti retourn Praslin apre zot bon rezilta Mahe, nou ti organiz en pti motorcade pou zot, pou ankouraz zot. La Digue

mon kar zot ti fer *motorcade* dan *pick up*, dan *buggy*.

E mon pa pou bliy sa portre ki ti pe sirkile, Onorab Uranie pa kapab gete. Meday ti'n tro lour san son likou pres pou li tonbe.

Mr Speaker, e nou tou nou'n apresye. Nou'n kontan rezilta ki nou bann zenn in anmennen. E mon osi ankor profit sa lokazyon pou remersye *SPTC*.

Sirtou Mr Joubert pou ed nou *provide* bis pou nou kapab fer en pti *motorcade*. Ki nou ti fer en letour Praslin. Nou'n pas en pe partou ziska dan leo Mont Plaisir nou'n arive.

Akoz nou'n vreman, vreman apresye rezilta ki nou bann atlet Praslin ti anmennen.

Nou bezwen osi investir plis dan devlopman nou bann atlet Zil Pros. E lafason ki nou pou fer sa bann lenvestisman, se met an plas bann fasilite.

Bann nouvo fasilite ki lo standar apropiye, lo bann standar enternasyonal. Pa bann fasilite ki 2 zour apre ki in fini ganny fer, ou war li pe degrengole. Me bann fasilite standar.

E i enportan pou nou osi fer amenazman e renovasyon lo bann vye fasilite sportif. Akoz sa i en gro konsern nasyonal ki ozordi bokou bann fasilite ki'n

ganny batir ozordi dan bann nivo, bann leta deplorab.

Ki Gouvernman pou bezwen depans plizyer milyon pou *renovate*, pou re aranz sa bann fasilite. Zisteman ler mon pe koz lo fasilite, bann vye fasilite ki'n la pou plizyer lannen, mon al lo La Digue *sports complex*. En legzanp tipik.

E pa bokou letan pase mon ti prezant en rapor devan Lasanble Nasyonal apre vizit ki Komite Medya, Lazenés, Spor, ek kiltir ti fer lo Praslin avek La Digue.

E nou'n war leta enn de bann lenfrastruktir laba e nou ti war leta ki sa, malerezman sa *sports complex* La Digue i ladan.

E apre ki nou ti fer vizit sa *sports complex* - annefe si mon pou al en pti pe an detay lo sa *sports complex*, nou a rapel bann ki ti mont anler, nou ti bezwen fer atansyon. Ti dir nou fer atansyon kot nou marse akoz nou kapab sorti anler desann dan plafon, tonm anba.

Tol ti mon krwar ti'n ariv lo kort *volleyball* ki pa tro bokou letan in ganny fer. Me selman ki li osi son leta ti'n deteryore.

E tousala i bann landrwa kot nou santi i bezwen annan lenvestisman. Akoz annefe sa *sports complex* i pa neseserman *conducive*.

Son grander, bann fasilite - i pa ase pou deservi tou bann atlet ki annan La Digue. E apre nou vizit nou komite, mon apel nou ti zwenn avek *CEO NSC* sa letan kot i ti dir pou met alokasyon.

Ou konnen alokasyon dan Bidze pou adres en pe sa bann konsern. E pou *sports complex* La Digue i annan en alokasyon R1.75 milyon, pou fer serten travay lo sa *sports complex*.

Me nou tou nou konnen poudir i pa en gran alokasyon. Me selman an prenon kont ki nou fek sorti dan en kriz ekonomik, anmezir ki pei pe refer, reveni pe antre, nou pou bezwen met o plis kapital pou nou fer en pe travay renovasyon lo sa fasilite.

Mr Speaker, mon pou dir ki avan mon anmenn sa Mosyon devan Lasanble Nasyonal, mon'n koz avek plizyer zabitan La Digue.

Annefe mon annan en group ki mon ladan ki annan plizyer, en group La Digue ki mon ladan. E mon annan dyalog avek zot ase souvan.

E mon'n osi annan en konversasyon avek *liaison officer* Mr Loncy Micoock. E ler mon'n koz avek sa bann zabitan L Digue enkli Mr Micoock, zot in koz en pe lo zot laspirasyon pou sport La Digue. E Mr Micoock

deza in dir mwan i pe koz avek Gouvernman.

E en keksoz ki in fer sir ti se ki ler sa *sports complex* La Digue ti ganny fer, ti sipoze enkli en *fitness trail* otour sa *sports complex*.

Sa ti dan plan orizinal pou sa *sports complex*. E ti osi enkli lezot fasilite. Ti pou annan basen naze, ek lezot keksoz ankor.

E zabitan La Digue ozordi zot pe demande, zot pe demann sa *fitness trail*. E annefe sa ki Mr Micoock osi in dir mwan. Se ki bann zenn osi zot anvi vwar en *skateboard halfpipe*, pou *skateboard* e osi pou *roller blade*. E menm en *BMX trail*. Ou konnen baze lo ozordi zot en pe inovativ. Zot anvi war bann *sport* ki petet nou pa tro neserman familye avek Sesel.

Ouswa ki pa lo sa nivo parey i ete dan bann lezot pei, me petet avek sa bann fasilite, i kapab ankouraz plis zenn pou antreprann e antre dan sa bann kalite *sport*.

E i annan osi demars pou en *outdoor gym*. Sa ki Mr Micoock in koz avek mwan, e zot pe osi demann en *indoor gym*.

En *indoor gymnasium* ki kapab *accommodate basketball, volleyball*, pou *accommodate* ban lekip La Digue. E sa i pa neserman zis pou La Digue. E

Praslin osi nou tou nou konnen poudir. E sa en demann ki plizyer bann atlet sirtou bann klib sportif parey *basketball, volleyball* in fer, se pou annan en *indoor gymnasium* kot bann atlet i kapab servi.

Akoz parey mon'n dir konpetisyon malerezman nou bann atlet i bezwen depans en kou. I annan serten sonm larzan zot bezwen depanse preske tou le semenn pandan ki sezon i *on*, pou zot al Mahe.

E bann lekip Mahe pa pe kapab vin Praslin, aköz parey mon'n dir nou napa en *indoor court*. Ouswa en *indoor gymnasium*, kot sa bann lekip Mahe i kapab vin fer partisip dan bann *match* lo Praslin e osi lo La Digue.

Mr Speaker, en lot keksoz ki zot in propoze se lenportans pou annan bann dortwar, ki bann atlet ki sorti Mahe zot kapab servi.

Akoz ozordi parey mon dir, La Digue menm, e menm lo Praslin nou annan bann atlet, pa zis futbol. Me osi *volleyball* ki zot desann Praslin, pou zot vin fer bann konpetisyon.

E landrwa reste i en konsern. E petet en dortwar ki ganny *run* par atlet petet an kolaborasyon avek NSC, i kapab en fason pou nou *accommodate*

nou bann frer nou bann lezot atlet ki sorti lo Mahe.

Petet sa i en fason osi ki nou kapab fer en pti pe reveni. Lwe sa dortwar avek bann lezot group petet ki vin La Digue pou zot kapab ganny en landrwa reste.

E ankor Mr Micoock in an konsiltasyon avek bann Digwaz, in osi fer enn de propozisyon. E in dir ki dan plas fer *swimming* pool petet zot ti kapab konsider fer en *tidal pool*.

E landrwa ki i pe ganny propoze se bor lanmer obor *Helipad*. An de sandan pou al dan *gate* Linyon. Kot vye simityer Linyon i ete.

E dan sa menm *area* i annan serten propozisyon pou fer *beach football* e *beach volleyball*.

Petet parey mon dir sa i en keksoz ki Gouvernman zot kapab antre an negosyasyon avek parey nou dir *PPP - Public Partnership* avek bann biznes La Digue pou investir dan sa bann tel proze. Sa i bann keksoz ki definitivman i kapab ganny konsidere.

E La Digue osi i enterese pou antre san *kite surfing*. Parey lo Praslin nou war ozordi ki i en *sport* ki pe vreman evolue lo Praslin.

E zisteman sa osi i anmenn mon lo size *watersport*. E Grand Ane Praslin nou annan nou on *watersport centre*. En *water sport centre* ki ti'n fermen, ki sizyenm Lasanble mon rapel ler mon ti antre, dan *canoe* pye koko pe pouse dan *canoe*.

Ti'n vreman dan en leta deplorab e ansanm *sphere* Michael Jean-Louis ki *DA* ozordi, Bertrand e lezot dimoun, nou ti met lanfaz. E nou'n reviv sa *watersport center*.

E mon rapel mon ti negosye avek *CEO NSC* sa letan pou donn en saler en dimoun a plen tan, pou travay avek sa *watersport centre*.

Ki ozordi sa *watersport center despite* mankman lekipman, i pe fer tre byen e zot pe prodwir bann atlet. Bann zenn atlet 12an a 13an ki ozordi pe fer lakours *windsurfing* *Mahe/Praslin*.

Mr Speaker Praslin en zil ki prodwir bokou bann atlet. Bann atlet lo delo parey mon'n dir bann atlet ki fer *kitesurfing*. Bann atlet ki fer *windsurfing*.

E bann atlet osi ozordi i annan ki pe fer *weight foil* ki'n ganny entrodwir Sesel. ki deza pe *generate* bokou latansyon.

E pa bokou letan pase - *In fact, weekend* pase, semenn

pase, *weekend* pase mon krwar ki nou'n ganny n bon rezilta sorti *the Mauritius Attitude Challenge*. Kot where *windsurfing* Sesel in sorti premye. *Kitesurfing* nou'n sorti dezyenm ek katriyenm.

E zisteman ler mon pe koz lo *kitesurfing* mon mazin enn nou bann atlet Alex Simon. E son madanm fek donn nesans son pti fiy yer - Avery. E mon *congratulate* zot.

E Praslin nou pe develop bokou bann atlet lo delo. Ozordi lanfaz pe ganny met lo *sports tourism*. Ki i kapab anmenn en reveni adisyonnèl pou nou pei. E mwan mon santi ki sa i en area ki nou kapab tap laport. Ankouraz bann lezot biznes pou vini pou investir ladan.

E pa bokou letan pase Mr Speaker, ti annan en vizit ki nou ti fer avek en *potential investors*. En investiser enternasyonal.

Mon pa konnen si i pou materyalize, me selman i ti pe montre serten lenterè. E *why not* osi bann investiser lokal? Zot kapab osi *venture* dan *sports tourism* ki i kapab generate larzan pou nou.

E regard an sa *watersport centre* Mr Speaker mon bezwen fer resorti parey mo dir oparavan i annan en nesésite - I mank nou lekipman, lavwal e

i mank bann *board windsurfing*, e lezot lekipman nesésiter pou nou ede sa *sport* evolve.

Malerezman en serten letan nou pa ti kapab pran bann atlet fir kot sa *watersport centre*. Me mon kontan pou aprann ki plan ki'n ganny soumet avek NSC. E osi avek Departman *Sport*. Zot in agree pou fer en *toilet* separe.

Akoz nou ti annan toilet zis pou garson. Alor nou pa ti kapab pran bann fiy. La byento *watersport centre* nou pou osi kapab pran bann fir ki enterese pou fer *windsurfing* e bann lezot sport lo lanmer.

Mr Speaker, bann fasilite *sport* dan Sesel parey mon dir oparavan, i enn bann pli gro konsèrn ki nou annan. Sa i pa en problem parey mon dir Praslin. La Digue. I en problem Nasyonal.

E zisteman pa bokou letan pase ti annan en *High Level meeting, visits* ki ti ganny fer avek Minis Finans e osi avek Minis sport.

Kot nou ti vizit bann fasilite lo Mahe. E nou ti war vremen ki bokou bann fasilite in vremen deteryore.

E nou konpran nesésite pou nou annan depans en zoli sonm larzan. Ki mon mazin en i pou devan sa Lasanble

Nasyonal pou laprouvasyon. E osi petet mon mazine ki nou Gouvernman pe osi konsider tap laport bann pei zanmi pou nou ganny serten lasistans.

E *why not* menm *FIFA* lo kote pou renovasyon nou stad ki nou Stad Linite ki nou konnen li i osi pa dan en bon letan ozordi.

Kot i konsern laplenn Grand Anse Praslin Mr Speaker, *pre-COVID* ti annan en Bidze. Ti annan en Bidze pou renovasyon sa laplenn.

Annefe sa laplenn ti ganny andomaze, akoz ti annan bann *heavy equipment, containers, machinery* ki ti mont lo sa laplenn pou repare pou en levennman.

Annefe ti nou, en levennman Nasyonal ki ti andomaz sa laplenn, ti en alokasyon bidzeter *pre-COVID*.

Me selman apre ler *COVID* in tape sa Bidze ti ganny *re appropriated*.

Alor sa en demann se ki Gouvernman i osi konsider pou re amenaz sa laplenn. Re aranz sa laplenn parey ti'n ganny bidzete dan lepase.

Sa *building* obor lapenn Mr Speaker, i en *building* ki'n ganny fer depi letan kolonyal. E napa preski okenn renovasyon ki'n ganny fer lo sa *building*. E i bezwen renovasyon irzan.

Dan sa menm *building* obor laplenn Grand Anse Praslin i annan en bout ki laboks ti ganny fer.

En lot bout kot ti annan vye *library* avan, se bann *judoka* ki pe servi sa landrwa. Ki i en pti lespas i pa se pou sa kantite marmay ki nou annan. plis ki 40 marmay - adilt ek zanfann ki pe fer judo. E ozordi Sesel Mr Speaker, nou annan bokou bann *judoka* lo Praslin. Bokou bann atlet, gran e pti ki fer *judo*.

E mon bezwen osi profit sa lokazyon pou remersye Cristian Philoe e Mervin Joubert. Lo kote Baie Ste Anne mon pou remersye Calix Cesar ek son madanm Brigitte Cesar, pou zot zefor zot devosyon anver sa *sport*. Ki ozordi Praslin nou annan nou anviron en santenn atlet gran ek pti ki pe fer *judoka*. *Despite* lespas.

Baie Ste Anne pe fer *judo* pe ganny fer kot vye Karnegi Baie Ste Anne. Parey mon dir Grand Anse pe fer dan en vye *Library*.

E nou bezwen *proper judo dojo* lo Praslin. Nou napa sa. E anna tan dan ki nou pe esper sa vin an realite. Nou bezwen definitivman lekipman.

Nou bezwen lenz, nou bezwen mat. E deza nou pe tap laport bann Konsil Onorer. E

zisteman mon pe osi fer lapel avek bann biznesmenn Pralinwa osi donn en koudmen. Ou donn en koudmen *sponsor*, non selman *judo* me tou bann atlet, bann lekip lo Praslin, zot bezwen sa sipor.

Akoz nou tou nou konnen poudir Bidze i limite. Sa ki Bidze ki Gouvernman i donnen pou spor i pa neserman ase.

E nou tou ansanm. Gouvernman i fer son bout. E fodre nou tou nou donn enn koudmen. Non selman bann biznes lo Zil Pros. Me nou tou koman bann Pralinwa annou vin devan.

Annou donn en sipor bann diferan klib, bann diferan spor. I annan plizyer biznes Praslin. lekonomi pe refer. Bokou bann biznes zot in relanse, zot pe fer ase byen.

Konsider *sponsor* en lekip, en klib lo Praslin, e atlet lo Praslin. Kantmenm en atlet ou sponsor ou donn li en sipor, *it goes a long way*.

Alor Mr Speaker avek sa de mo - parey mon dir, mon santi poudir nou kapab fer plis. E mon pe demann tou sipor bann Manm dan sa Lasanble pou nou siport sa Mosyon.

Kot nou kapab ganny bann fasilite ki nou bezwen devlopman bann atlet e *sport* lo Praslin, lo La Digue, lo Zil Pros.

Avek sa 2 mo mon dir ou mersi Mr Speaker.

MR DEPUTY SPEAKER

Mersi Onorab. Aprezan mon pas laparol avek Onorab Porice ki ti segonn Mosyon.

HON DOYACE PORICE

Mersi Mr Speaker. sa Mosyon anmennen par Onorab Woodcock in vin dan en moman kot yer mon ti anmenn kestyon pou Minis Spor kot i konsern bann lenfrastruktir sportif.

Me pandan mon labsans Onorab Bistoquet ki ti prezant mon kestyon. E pou sa mon remerci li.

Sa konsern i osi sorti par serten zabitan Baie Ste Anne dan sa *meeting* piblik organize par Prezidan Wavel Ramkalawan ek son Gouvernman lo size devlopman proze Kato Nwar lo nou zil *weekend* pase.

Mr Speaker, sa size i vremen konsern mwan menm. E osi bann atlet lo Praslin. Se sa ki ler mon ti zwenn serten bann *sportsmen* lo Praslin boner 2021, nou ti diskit fortman lo sa size. Kot nou war ki bann landrwa sportif in ganny vremen negligez. E pa'n fer okenn renovasyon pandan en ta letan.

Alor pou nou get nou atlet nou bann *sportsmen*, nou ti zwenn ansanm pou organiz en Komite Sport lo Praslin. Apre ki nou ti'n fer detrwa *meeting* dan Sant Kominoter Grand Anse Praslin, La Wason Joubert ti ganny elekte koman *Chairman*. E lezot Manm Komite sorti dan Distrik Grand Anse e Baie Ste Anne.

Sa komite pe travay lo zot dokiman konsernen apre zot pou zwenn ek tou *sportsmen* lo sa zil pou met an mars aktivite sportif. Get dan bann problemn *sportsmen* ek lenfrastruktir eksetera.

Mr Speaker, mon'n osi zwenn avek responsab spor lo Praslin, kot in met diferan keksoz devan mwan. E la keksoz ki ti enteres mwan ti sa *fitness trail*.

E ti annan en dokiman ki ti an plas ki ti'n fini aprouve. Me i ti kout en kantite larzan. Pou en komansman aktivite pou atlet ou nenport zabitan Praslin ki enterese pou fer *fitness*, mwan ek mon tim volontarya ti komans sa travay asiste par NSC, serten *sponsors* ki ti pare pou ed nou.

Mr Speaker, le 09 Zilyet 2022 nou ti kapab fer louvertir sa Marie-Jeanne *Estate Bay Family Fitness Park*. Nou'n apel li sa non aköz i dan en labe. I

annan lezot aktivite ki pou ganny deroule apard ki dan trail ek *outdoor gym*.

Me Mr Speaker nou pou osi annan serten lekipman byento pou zanfan ki pou ganny mete ladan, pou anmenn lafanmir ansanm. Alor nou pe demann Gouvernman, bann biznessmenn ou nenport endividi, pou vin devan pou ede refer nou bann lenfrastruktir sportif lo Praslin e Zil Pros.

Akoz nou rekonnet ki Gouvernman pou lemoman pa pou kapab fer tou. I pou pran bokou letan. Me nou atlet e *sportsmen* pe espere.

Nou annan serten spor parey *judo*, zot in bezwen re netway sa vye Karnegi ki mon ti lekol ladan, re penn li pou zot kapab ganny landrwa pou *train*.

Bann karateka pe bezwen train dan sant kominoter, e parfwa lwe lasal zot *Vijay International School*.

Ler nou get *volleyball* lekip pou bezwen *train* fodre napa lapli aköz i *open air* e i glise. E parfwa sa kort i vremen en danze pou nou atlet. Pou bann zanfan zenn ki fer atletik, zot servi laplenn ki napa en *track*. E ouswa lo semen me parfwa lo lans.

Swimming kot *swimming pool* zot annan en problemn zot osi. Lo boulon in fware. Laponp

fodre repare. E la problemm lo zil i annan menm.

Parey nou konnen ki Praslin Segonder, Grand Anse e Baie Ste Anne Primer in sorti vremen byen pou sa katriyenm sanpyonna atletik enter skoler, ki ti fer le 18 zen. E nou ankore felisit zot. I montre nou ki sa bann atlet i ankouraze alor nou bezwen siport zot pou, pou zot pou kontinyasyon.

Ti annan dan lepase parey mon koleg Onorab Woodcock in dir en plan *indoor sports complex*. Ki ti, pou fer lo en plot later PR5155 Ile Eve.

Plan ti'n fini fer, e rev bann *sportsmen* ti pou vin vre lo Praslin. Me ziska la naryen pa'n ganny materyalize. Se sa ki sa Mosyon in vini devan nou ozordi, akoz pe annan kantite lezot devlopman lezot keksoz.

Me nou ava osi kontan annan en devlopman pou lenfrastruktir sportif lo nou zil.

Mr Speaker, mon lentera pou spor se akoz mon ti deza en atlet. E mon'n partisip dan plizyer *sport* lekip. E mon ankore form par lekip zofisye pou *volleyball* lo nivo Nasyonal.

Se sa ki mon anvi war spor devlop plis. E war plis zenn partisipe pou tir zit dan bann lenfliyans negativ. Sa *Bay Family Fitness Park* in en komansman dan son laspe.

Mon pou pouse pou vwar plis ankore pou benefis nou bann atlet e *sportsmen* lo nou zil.

Mr Speaker dan menm laliny mon pou osi demann Gouvernman pou get lo nivo depasman nou bann atlet, ki vin dan konpetisyon lo nivo Nasyonal Mahe.

La kot i konsern bato ouswa avyon. Sa osi i kout en ta larzan pou nou bann lekip. Ouswa endividyel. Nou annan bann *coach* ki vremen kapab. Zot kalib dan tou laspe. Alor ankouraz zot pou ganny loportinite pou reprezant avek atlet, ler zot ganny bann konpetisyon enternasyonal. Non pa zi bann lo Mahe ki ganny sa sans.

Pou fer resorti nou annan atlet ki pe vye, parey Miss Brigitte in dir.

E lontan zot dan sport. Alor fer zot rev vin vre. Pou war sa *sports complex* lo nou 2 zil. La pou bann konpetisyon ki annan, nou pe annan atlet ki pe al *Commonwealth Game*. E sa se Dominic Dugasse.

Nou annan Volleyball anba 21an ki pe al *La Reunion*. Sa ki mwan mon konnen Baie Ste Anne i annan Fania Athanase, Jania Stravens, Joey, Federico e Daryl. La kot nou war Praslin e Zil Pros i

annan talan. E pou sa nou felisit zot.

Avek sa 2 mo mon pou, dan fon mon leker mon pou siport sa Mosyon anmennen par Onorab Woodcock. E mon demann tou mon bann koleg Onorab pou siport nou demann. Mersi.

MR DEPUTY SPEAKER

Mersi Onorab Porice mon pas laparol aprezan avek Onorab Churchill Gill.

HON CHURCHILL GILL

Mersi Mr Speaker. Bonn apre midi Mr Speaker. Bon apre midi tou Manm e tou dimoun ki pe ekoute.

Mr Speaker, bokou lesplikasyon in ganny donnen. Me selman sa k enportan ladan, tou lede Onorab in fer konpran ki ti annan plan ki ti la.

Plan ti la pou *sports complex*, ki mwan mon ti vwar ansanm ek Onorab Woodcock. Nou'n ti dan sizyenm Lasanble.

E *fitness trail* osi ki'n ganny koz lo la. Sa osi plan ti'n fer. lekipman, sa lekipman ki lo sa *fitness trail*, sa osi ti'n fini vini depi sizyenm Lasanble.

E apre tou sa bann lezot keksoz, kontrakter ti'n fini ganny *award* kotasyon pou fer sa *fitness trail* pou fini.

Me selman realite i vre ki i pa ti ganny fer. E la in ganny fer, mon krwar nou bezwen aksepte sa realite. Me selman i enportan dimoun i konnen ki tou sa bann keksoz ti'n fini ganny fer e zot ti la.

Akoz ler sa *fitness trail* in rebran travay nou ti dan *pandemic*. E nou konnen dan *pandemic* napa okenn lekipman ki'n ganny *order*. So i kler ki sa bann keksoz ti la.

Me selman Mosyon osi i kler ki fasilite lo Praslin definitivman i en problem. E par egzanp Praslin nou annan nou 3 laplenn futbol. Me selman dan sa 3 laplenn futbol i annan zis enn ki lo standar enternasyonal. I annan 2 i pa lo standar.

E an menm tan zot napa *track*. E prezan tou atlet ki baze Praslin, i en *challenge* pou zot *practice*. La mon pe koz enkli bann atlet ki fer bann spor indoor.

Akoz bann fasilite ki zot pe servi ozordi parey nou konnen i bann fasilite ki bokou lannen i la e i pa adekwat ozordi dan sa letan ki nou ladan pou sa bann kalite spor bann pratik dan sa bann landrwa.

Alors sa nesesite pou annan fasilite lo Praslin i *genuine*. E mon krwar nou devret al pli lwen ki sa Mosyon.

Akoz nou konnen poudir Mosyon i pa *binding*.

E petet nou bezwen bouz lo aksyon. Annou mazine nou komans rankontre sa bann Lotorite konsernen.

E nou fer sa deswit. Nou ganny en nide an term bidzeter, Kwa ki zot annan ozordi kwa ki zot pou kapab fer lannen prosenn. E deswit sa i ganny ankadre dan fason ki bann *process* i komanse pou nou komans war sa ki posibil pou fer.

Nou konnen poudir tou sa ki'n ganny koz lo la i pa en keksoz ki kapab ganny fer la konmela. Me selman sa ki posibil, nou bezwen bouz lo la konmela.

Rezon ki mon met li koumsa, aköz nou tou nou'n vwar rezilta atletik. La Digue in prouv son lekor pa zis la dernyen konpetisyon. In prouv son lekor dan plizyer konpetisyon.

Praslin osi in prouv son lekor dan plizyer konpetisyon. Savedir tou lede zil in fini fer son *case as far* ki zot fasilite i konsernen.

E zot in fer sa lo nivo nasyonal. I napa en pli gro *arena* kot zot kapab met zot bouz lo aksyon *case* Sesel se ler zot *compete* lo nivo nasyonal.

E zot in fer sa. E rezilta ki zot in fer dan sa ban

konpetisyon i koz pou li menm. Alors se sa ki mon dir nou bezwen bouz lo aksyon. I pa devret annan okenn dout pou dir napa atlet Praslin oubyen La Digue aköz nou'n war rezilta in koz pou li menm.

E an menm tan lo La Digue parey in ganny dir ler bann vizit ki'n ganny fer lo leta fasilite. Menm si i annan en *track* avek *track and field facility*. Me selman ozordi ler nou pe koze i annan bokou keksoz ki'n devlope.

E i kler ki i bezwen ganny *upgrade*. Mon pa konnen si sa bann *upgrade* i tarde aköz sa rezilta i montre ki kantite abilite. E prezan dan latet kekfwa si i *upgrade then* i pou en pli gro roten pou ganny servi. Me selman mon krwar nou fini fer nou *case* sa 2 zil. E nou bezwen bouz lo aksyon prezan.

E an menm pe ganny fer tan pou lemoman ki nou napa sa bann fasilite. Minister osi mon krwar ler nou zwenn sa bann Lotorite konsernen, nou bezwen demann Minister sa bann *challenge* ki sa bann atlet i gannyen avek zot *coach* pou zot *train*.

Si napa dan labsans bann bon fasilite. Si napa lot fason sipor ki zot kapab gannyen. Aköz zot pou bezwen mouvman pou zot al servi

diferan fasilite, diferan landrwa lo zil.

E si napa en sipor adisyonnèl ki sa bann atlet i kapab gannyan pou fasilite zot *training*. E i enportan pou note ki apard ki *judo, volleyball, football* me osi bokse, ki nou pe fer tre byen e *coach* osi i sorti Praslin. So i montre ki en kantite keksoz pe ganny fer avek mwens. Me selman nou osi nou *deserve* pou nou ganny lekipman ki alaoter.

Pou nou kapab en zour parey deza pe ganny arive, serten atlet sorti Praslin pe reprezant Sesel. E mon krwar nou demann i devret ganny tande.

An menm tan nou annan bann lezot sport ki ozordi pa popiler Praslin. E mon krwar ki nou bezwen pouse osi ki donner lakantite atlet ki annan nou bezwen annan bann lezot spor parey koman tennis ki napa Praslin.

Akoz *tennis court* i annan zis kot Lemuria apre kot 2 lotel Cote D'Or. Me selman pou piblik i napa *court* kot marmay i kapab, ban zenn i kapab fer *tennis*. Ki en spor tre enportan. E parey nou tou nou konnen ou kapab ariv nivo profesyonnel. E i kapab vin en karyer pou ou.

An menm tan lo kote *swimming pool* mon krwar La

Digue i deserve pou li ganny en *swimming pool*. Akoz nou 2 zil nou antoure ek delo.

E mon asire dan natasyon nou kapab fer bokou, bokou pli byen. Alors nou bezwen pouse osi ki La Digue en gannyan son *swimming pool*. Apard ki en *upgrade* lo son bann lenfrastruktir ki parey nou konnen i *dated* en pe letan pase.

Mr Speaker sa i montre ki menm si nou'n anmenn sa Mosyon - e la nou pe koz pou nou bouz pli lwen apard ki esper Egzekitiv pran en desizyon lo Mosyon. Mon krwar i ava ed nou zil e nou'n plis ki zistifye nou *case* pou fasilite. Alors mon espekte ki ansanm avek mon koleg lot kote latab pou Grand Anse Praslin, nou a kapab zwenn sa bann Lotorite ansanm ek Onorab La Digue, pou nou kapab bouze lo sa bann keksoz.

E fotespere lannen prosenn marmay ava kapab ganny en landrwa pou zot fer en *proper training*, ki ava ede pou anmenn pli bon rezilta pou nou 2 zil ankor. Mersi Mr Speaker.

MR DEPUTY SPEAKER

Mersi Onorab Gill. Avan nou kontinyen nou pe fer byen lo letan. E anfet i annan zis 8 manm ki'n endike ki zot le koze.

So nou kapab ale 15, 15 minit sak. Savedir la prosen manm i ava pran ziske 3 edmi letan pou nou *break*. Apre letan nou retournen i ava annan 4 manm avek, ki ava ...

Konmsi nou ava fini a ler. Nou ava fini avek sa Mosyon ozordi. Prosen Manm lo mon lalis se Onorab Naddy Zialor.

HON NADDY ZIALOR

Vwala. Mersi Mr Speaker. Bonn apre midi tou mon bann koleg. Mon pa pou kapab fer zistis si mon pa apre midi aport mon sipor pou mon 3 koleg ki'n koze avan mwan.

An ski konsern leta sityasyon sportif Zil Pros. Annefe koman en Manm MYCC tar lannen pase nou ti ganny sa privez pou nou fer vizit dan bann diferan fasilite sportif lo zil Praslin egalman La Digue.

E zisteman bann konsern ki'n ganny leve apre midi i bann konsern ki nou koman bann Manm MYCC a sa letan.

Ti osi ganny mete a nou latansyon. E nou ti vwar ki i annan sa nesesite. I annan sa nesesite pou ki vremen lanfaz i ganny mete pou ki vremen nou elev standar bann , ki annan an plas a ler aktyel lo sa 2 zil.

Sepandan Mr Speaker mon ava profit sa lokazyon pou mwan felisit bann atlet Praslin,

La Digue pou en rezilta formidab ki zot in anmennen dan sa dernyen sanpyonna sportif ki'n fer nasyonal.

En moman pou nou reviv sa lespri sportif ki anmenn si ou le dimoun ansanm dan lespri linite.

Egalman, mon ti ava kontan felisit osi bann atlet Mahe ki'n montre zot determinasyon pou sa levennman resaman.

Konpetisyon, sirtou lo kote atletik. Be letan nou pe koz fasilite. E Onorab, atraver ou M Speaker Loter Mosyon in koz bokou lo la. Onorab Porice egalman e byensir Onorab Gill. Mon pe fer serten refleksyon. E mon ti ava kontan nou osi partaz sa refleksyon ansanm.

NSC pandan bann lannen ki'n pase in donn serten komitman anver pei. E letan nou ekout Zil Pros. I osi bann konsern.

La mon anv i etal en pti git diskisyon. E bann konsern ki egalman dan bann zil. Dan bann distrik si ou le lo Mahe, nou osi pe fer fas avek sa bann sityasyon fasilite.

Alors dan lespri la partaz mon swete ki nou mazin lo kote resours pou ki letan ki nou pe pran bann desizyon. Letan ki nou pe revwar sirtou mon'n tann koz bokou lo sa bann

regional *sport facilities, sports complex*.

E la dan mon latet mon mazin *the famous sports complex* Grand Anse Mahe. Ki date plizyer lannen ki pa'n materyalize. Nou annan *sports complex* Anse Royale ki zisteman resaman ti annan kestyon ti ti'n ganny table devan nou Lasanble.

I annan *sports complex* Mont Fleuri dan distrik Onorab Roucou. Ki li osi i demann port serten koudey lo la. Alors atraver sa Mosyon mon anvi sezi loportinite pou donn zot sipor koman bann zilwa, koman bann kanmaradri.

Me osi pou fer en pledwari pou ki vremen letan nou regard lo kote resours, nou fer sir ki bann resours an ski konsern fasilite *sport* i osi ganny partaze dan en fason egal e ekitab.

Mon krwar sa i enportan parske letan Onorab Gill pe koz konpetisyon, nou bezwen fer sir ki Praslin pa lo *5 star* e Mahe i ankor lo *2 star*. So nou bezwen fer li egal.

E mwan mon pe lans en lapel avek *NSC*, avek bann Lotorite sportif pou fer sir ki, nou fer sir ki bann keksoz i ganny fer ekitab e egal.

Sepandan - sepandan nou pou donn sipor parske i annan e nesesite pou vwar pou

vremen donn Praslin e La Digue en *fair deal*. Donn zot sa *push*, sa resours dan en fason egal ankor.

Ki zot bezwen pou ki vremen nou annan la relev. Nou annan la relev dan sa kad. Tou an rekonesan diferan sipor ki nou bann atlet ki swa i lo zil pros ki swa i lo Mahe, i pe kontinyelman resevwar.

E byensir mon swete ki nou get sport bokou pli lwen ki nou ti gete yer. E bokou pli lwen ki nou pe regard li ozordi.

Alors avek sa de pti mo Mr Speaker atraver ou mon anvi dir avek Onorab Woodcock loter Mosyon, e Onorab Doyace.

Egalman Onorab Gill ki zot kapab kont lo mon sipor pou mwan fer sir ki vremen Praslin i ganny regarde dan en fason egal. Mersi Mr Speaker.

MR DEPUTY SPEAKER

Mersi Onorab. I reste nou ankor detrwa minit avan edmi. Prosen lo mon lalis se Onorab Ernesta.

HON PAUL ERNESTA

Mersi Mr Speaker. Mr Speaker, koleg Onorab e tou dimoun a lekout bonn apre midi.

Mr Speaker mwan osi mon oule zwenn avek bann koleg *Inner Island* pou aport mon sipor dan 2 konteks;- enn

koman en zanfan ki annan en pye lo zil sa se La Digue, lot se koman en ansyen atlet. Mon konpran, mon konnen tou sa bann konsern ki sa bann atlet i pas atraver.

E apre mon'n mank en trwazyenm ki mon osi koman en Manm Komite *Media, Youth, Sports and Culture*. Onorab i demann mwan ki mon ti fer apre Onorab ou a konnen ki mon ti fer. Mr Speaker letan nou get devlopman sport lo sa 2 zil i date *way, way* lontan. Si nou mazin en Albert Marie, Albert Marie sa lepok ti pe fer ta *havoc* lo kote *long distance* dan atletik, mwan mon ti ankor en pti zanfan, ankor manrmay.

Me atraver li in devlop diferan atlet ki nou'n vwar *long distance*, in sorti bann atlet *middle distance* e apre nou'n vwar bann dan *track and field* e apre bann osi ki'n spesyaliz dan sprint osi. Sa 2 zil *all along*, ankor mon pe dir *all along* zot in toultan, zot in toultan kontribye, zot in toultan fer byen, zot pa'n zis fer byen yer.

Bokou fwa mon rapel bann le 29 Zen letan mon ti ankor manrmay *Inner Island La Digue* sirtou, zot ti pe pran tou lakoup zot ti pe mont avek lo zil.

E sa Mosyon ki Onorab in anmennen, i pe dir nou ki la *it's about time*. Annou donn sipor

nou bann atlet. Annou donn zot plis sipor pou zot kapab fer pli byen. Wi Onorab Churchill Gill mon krwar sa i ekstrememan enportan, nou bezwen tire sa *mindset*, nou bezwen bar zot pou anpes zot devlope.

Mazinen sa Gouvernman ozordi zot annan en lentansyon pou kapab, en lanbisyon pou anmenn meday Olenpik.

Tousala i komans ek preparasyon. Kote preparasyon i komanse? 1) son fasilite. 2) apre ou bezwen kapab annan atlet doue e 3 ou bezwen annan son lantrener.

Mon'n ekout Onorab *mover* Mosyon letan in koze in donn nou en zoli portre, en portre ki fer nou reve, nou ti a kontan, ti a swete vwar devlopman *sport* - bann fasilite *sport* lo son zil.

Me egalman Onorab sa kalite rev, i en kalite rev ki nou tou nou annan. Nou parti nou Gouvernman tyer in kre fondasyon e ozordi zot ki la zot bezwen kapab pran sa fondasyon ki'n fini ganny etabli, annou bouz lo en lot letap.

Letan mon ti en atlet, mon ti fer atletik mon konnen tou bann kontrent ki bann atlet ti fer fas avek. I pa non selman son fasilite sportif me i osi

bezwen bann fasilite *training* apropiye.

Vizibleman mon vwar sa 2 zil ki mon'n vizite, mon konn tre byen zot bann laplenn parey Onorab in koze, *right* i napa en fasilite *track and field* pou bann dimoun kapab *train*. Sa kondisyon laplenn ki mannyer i ete i kapab anmenn *injury* pou en atlet.

Akoz son bann sirfas - *uneven* i pa drwat, akoz sa atlet i bezwen sa, lanmenm ler nou perdi en atlet sitan zenn. Zot komanse apre zot fini. I tousala bann keksoz ki nou bezwen kapab pran kont letan nou pe koz dan sa Mosyon.

Wi nou'n koz bann atlet in fer sikse lo zil, sa i enkli Mahe tou le 29 Zen, la nou vwar in sanz dat in vin le 18. Tou sa bann letan presedan atlet in ganny kree li atlet in ganny dekouver. Me keksoz ki manke avek sa kontinite!

Mon a dir zot en keksoz la kote zot, malerezman i pa la, sa ki travay avek Speaker - *bodyguard* Speaker en atlet, en tayer, me apre ki nou'n vwar nou bann atlet i perdi akoz i mank sa kontinite.

Mwan mon krwar letan tou sa bann keksoz ki letan nou pe koz bann fasilite, nou bezwen mazin lo la ki mannyer nou fer pou nou kapab asire ki

nou annan atlet kontinyen. Atlet in anmenn rezilta li, nou annan en rezilta lo tou kote nivo, me sa bann atlet yer.

La mon mazin enn mon kouzen Eugene Ernesta en zanfan La Digue, i ti ganny dekouver dan bann konpetisyon le 29 Zen in fer rikord dan *high jump*, par son lanmour pou sa *sport* pou li kapab kontinyen in vin Mahe, pou li kapab kontinyen avek son *sport*. Ozordi si mon pa tronpe in regrete e mon vwar li pe *train* bann manrmay. I en *PE Teacher* i pe kontinyen, e sa bann keksoz ki nou bezwen kapab ankouraze.

La lo sa pwen mon koz *coaching*. Wi nou kapab annan pli bon fasilite. Wi nou a kapab annan pli zoli fasilite *top modern*, me si nou napa *coach* ki prepare? Mon krwar Onorab pli boner in koze, Onorab Gill in dir kot ou vwar sa tim ki zot annan zot bezwen partaze.

Sak disiplin i bezwen son *coach* spesyalize dan son domenn, kot nou bezwen kapab ganny zot pou fer sir zot anmenn kontribisyon neser pou devlop sa atlet.

All in all i tou sa bann keksoz ki nou pe koze - annou koz lo lot keksoz, ozordi lo zil egalman sa sityasyon pe arive Mahe osi permet mwan Mr

Speaker pou debord en pti git lo kote Mahe. Yer Minis malerezman son konsern ti lo zil, in bezwen respekte sa pangar Speaker ti pou vedir mwan mon *out of* konteks kestyon i lo zil.

Lo sa laspe *management*, nou vwar nou dan en sityasyon ozordi atlet lo laplenn futbol *training* i *ongoing*, atlet pe *train*. Be sa kondisyon pa akseptab pou en atlet, e bann keksoz bann *hazard* ki anmenn risk pou sa atlet parey mon'n koze pli boner. Boul letan atlet pe taye boul i kapab tonm lo laplenn lo *field*, lo *track* e letan i tonm lo *track* atlet pe taye i kapab kre en domaz.

Tousala nou bezwen fer sir ki letan futbol i *on either training or* son *match* li menm, atlet i bezwen pa la pou fer son *warm up* fer son *training*. Konmsi nou bezwen kapab diskite, akoz a lafen nou tou nou pe koz devlopman *sport*, nou pe koz pou anmenn Sesel lo sa lot nivo – *ok?*

Mon'n koz *management, sport* ki nou bezwen annan en *proper management*, mon'n koz lo fasilite *sport*, mon'n koz osi lo fasilite *training* pou bann atlet, mon'n koz lo *coaching, staff*, bann atlet, i tou sa bann keksoz Mr Speaker ki nou bezwen met ansanm pou nou kapab fer sir

ki rev Onorab nou 2 zil i kapab ganny akonplir.

I annan en propozisyon ki Onorab Churchill Gill i dir in fer, i dir nou bezwen prezan *move* lo aksyon. Petet mon pe propoze ki nou kapab vwar koman en Komite *Media, Youth, Sports and Culture*, ki nou kapab etablir Onorab Porice osi in dir ki zot in bezwen etablir en komite lo zil e petet ki nou'n vwar ki mannyer nou kapab travay ansanm.

Sa 2 komite pou kapab akoz zot tousel zot pa pou debout lo zot tousel e zot bezwen plis sa sipor, kot nou kapab anmennen e sey vwar ki mannyer nou kapab travay ansanm. *Yes, business man* lo kote Legzekitiv zot pa pou neserman kapab akonplir tousala, akoz tou sa bann keksoz ki zot pe koze, i bann gro rev ki bezwen Bidze, son laspe bidzeter i ekskremman, letan ou get li i ekskremman o.

So ki mannyer nou kapab vwar anmenn bann partner bann *business partners* ansanm pou kapab anmenn devlopman, non selman lo nou 2 zil, me osi Mahe, akoz Mahe osi i annan bann atlet ki vremen devoue pou zot kapab fer zot spor.

So avek sa 2 pti mo Mr Speaker wi mon pou anmenn

mon sipor pou sa Mosyon, akòz mon krwar moman i apropriye pou nou kapab bouz *sport* lo en lot nivo dan sa pei. Mersi Mr Speaker.

MR DEPUTY SPEAKER

Mersi Onorab. In ariv en moman pou nou pran en poz e nou ava rebran 4er.

(BREAK)

MR DEPUTY SPEAKER

Welcome back. Nou pou kontinyen avek nou deba lo Mosyon table par Onorab Wavel Woodcock. E prosennman lo mon lalis se Onorab Andy Labonte.

HON ANDY LABONTE

Mersi Mr Speaker. Bonn apre midi Mr Speaker. Bonn apre midi tou Manm koleg Onorab, tou dimoun ki a lekout e tou bann *sportsmen* ki annan dan Sesel. E Mr Speaker mon pa ni en Pralinwa ni en Digwa, me selman mon gran pye i sorti Praslin.

Me pa akòz mon gran pye i sorti Praslin, ki mon pe donn mon sipor sa Mosyon. Rezon ki mon pe donn mon sipor sa Mosyon, se akòz pou plizyer lannen mon'n travay Praslin e pou mwan mon annan en gran

lanmour pou Praslin li menm li e bann Pralinwaz.

E en lot rezon akòz ki mon pou donn mon sipor sa Mosyon, se akòz mon santi ki sa Mosyon i annan son merit e dan nou Manifesto Eleksyon 2020 paz 34 ek 35 i koz lo spor e en prodwi ban sanpyon. Les mwan zis lir, lo paz 34 pou tit *comme SPORT* i dir ou,

Producing Champions,

“Sport is much more than game to enjoy. It is a vital part of national life. Contributing to personal development and bringing people together. It is an important factor in nation building and a bridge to other nations.”

E lo paz 35 paragaf 5,

Sport for all

“A program to make sports a physical activity available in all our communities will contribute to a more healthy lifestyle for our young people. Our government with upgrade available sporting facilities, ensure regular maintenance and expand facilities.”

Mr Speaker mon ti a zis kontan met lo rikord pour nou LDS nou Manifesto i vivan e nou pa travay ver li e nou pou swiv li. E la atraver ou mon ti a kontan dir avek Onorab Gill, in dir poudir plan ti la - wi Onorab Gill me plan ti la me selman zot

pa'n aksyon lo la. Me nou ler nou'n vini nou'n vin aksyon lo la e se sa ki nou, nou pe vin fer e nou pou kontinyen fer sa. Mersi.

E la Mr Speaker permet mwan pou pran sa lokazyon pou felisit tou bann atlet ki ti partisip dan konpetisyon Atletik enter skoler, sa i enkli bann atlet Praslin ensi byen ki la Digue. Me espesyalman permet mwan vi ki mon annan laparol pou mwan felisit lekol Larivyè Anglez ki ti sorti avek 2 meday lor, 5 meday larzan, 12 meday bronz, e garson anba 14an ti sorti dan dezyenm pozisyon e garson 18an ti sorti dan trwazyenm pozisyon, alor mon pou dir bravo lekol Larivyè Anglez.

Mr Speaker pou retourn *back* lo sa Mosyon, mon osi krwar ki Praslin e La Digue koman 2 lezot zil i annan zabitan ki abit lo la, i merit ganny menm loportinite parey Mahe. Me parey Onorab Zialor in dir i bezwen balans. Nou pa kapab pou donn tou priyorite pou Praslin ou La Digue, me par kont nou bezwen devlop tou parey Praslin, la Digue ensi byen ki Mahe. Alors se pour se la rezon ki mwan mon pou siport sa Mosyon.

Mr speaker mon pou dir mersi nou Gouvernman, ki'n

war nesesite pou konstrir en gran, nouvo, zoli lopital lo la Digue e ankor enn fwa i pe konstrir. E ankor enn fwa en plan ki zot ti'n met la e zot pa ti pe aksyonn lo la e nou, nou Gouvernman nou pe aksyonn lo la.

Alor i pou zisteman fer lazistis anver sa Mosyon si bann fasilite spor neseser pou devlopman bann atlet lo Zil Pros, i osi ganny pran an konsiderasyon espesyalman akoz nou bezwen et fran e rekonnet parey loter Mosyon in dir, Praslin ek la Digue ek bann Zil Pros in form bokou bann bon atlet e nou bezwen et fyer pou sa. E in fer nou paviyon mont vreman o, lo nivo rezyonal e osi lo nivo enternasyonal.

Alor mon konvenki ki avek en tel fasilite *why not* nou rev pou anmenn nou premye meday lor *Olympic* Sesel atraver atlet Zil Pros petet i a sorti laba - nou pa konnen *why not* Mr Speaker?

Mr Speaker mon pa pou long. Pou terminen mon pou dir vi ki Zwe De Zil pa lwen avek nou, e en tel fasilite pou zot ede ki nou annan atlet ki sorti lo Zil Pros pa pou bezwen desann Mahe pou vin *train*, me plito zot ava annan bann fasilite laba lanm pou zot kapab *train*. Alors Mr Speaker avek sa 2 mo, mon

pou dir mon pou donn mon sipor sa Mosyon. Mersi.

MR DEPUTY SPEAKER

Mersi Onorab Labonte. Prosen entervenans se Onorab Wallace Cosgrow.

HON WALLACE COSGROW

Mersi Mr Speaker, bonn apre midi tou Manm Onorab, bonn apre midi tou Seselwa ki pe ekoute, tou *sportsmen* ki pe ekout nou la apre midi. Mr Speaker si i annan en keksoz dab lemond e Sesel pa en leksepsyon ki anmenn en sans inifikasyon, ki inifye nou, se *sport*.

Ozordi menm pandan sa bann letan ki Sanpyonna Mondyal Atletik pe deroule kantite nou menm si i pas en ler ki pa neserman dezirab me en kantite dimoun i asize devan zot televizyon, e zot swiv sanpyonna, me dayer mon war pe sirkile lo rezo sosyal enn nou prop Seselwa Ned Azemia ki pe osi partisip dan sanpyonna mondyal.

E la mon ti a kontan dir ki ozordi pou en zenn atlet parey Ned Azemia ariv dan sanpyonna mondyal, i pa'n en azar byensir son devlopman son devosyon anver son *sport*, me in pa'n en azar. E bokou bann lezot atlet *sportsmen* ki'n osi *exel* o nivo

enternasyonal, i pa'n en azar sa - i parske Gouvernman ki'n la oparavan, in en Gouvernman ki'n investir.

E ki'n met latansyon en lentera dan *sport* Sesel kot bokou - parey mon'n dir sa bann zenn bann atlet dayer in ganny nonm detrwa non avan, zot in nobou pratik zot bann disiplin sportif. Zot in *excel* baze lo bann fasilite ki'n ganny met a zot dispozisyon dan bann resours ki'n met a zot dispozisyon e ozordi nou vwar rezilta.

Eski nou kapab fer bokou pli byen dan le fitir? Byensir wi Mr Speaker byensir nou kapab fer bokou pli byen e nou devret fer bokou pli byen.

Mr Speaker Mosyon ki devan nou Lasanble ozordi. E lapant diskisyon koze ozordi par bann Onorab ki'n koz avan mwan, i montre i enn ki annan potansyel pou manm koz lo en nivo parey, e fer serten kontribisyon valab san okenn nesosite fer okenn politik ki separ nou *or* ki diviz nou.

Dayer *sport* i enn bann size ki nou'n koz lo la tou kou, e ki nou'n touzour annan preski dir menm pwennvi, malgre parfwa nou difere lo ki mannyer nou fer keksoz e ki lapros ki nou pran.

Par kont Mr Speaker mwan mon en pti pe dezapwente la pre midi, sirtou apre serten komanter ki'n ganny fer me sirtou avek lentrodiksyon loter Mosyon.

E dan son lentrodiksyon dan serten komanter negativ ki mon krwar mon bezwen fer resorti, ki ti pou annan potansyel petet diviz nou lopinyon dan Lasanble Nasyonal la apre midi, dan plas inifye nou parey spor i fer parey mon'n dir oparavan.

Mon santi ki i annan serten, mwan mon apel sa *pettiness* ki nou ti kapab *avoid*, ki i ti kapab *avoid* dan son lentrodiksyon, ki pa ti neserman bezwen ganny fer referans avek.

Akoz sa i *sport* sa. Sa i *sport* mon'n dir dayer pou dir i annan en kantite lenvestisman ki'n ganny fer e en kantite atlet, *sportsmen* ki'n pran sa bann loportinite e mon krwar parey mon'n dir i annan loportinite pou fer bokou plis ankor.

Mon ganny difikilte konpran aköz dan en *setting* koumsa, en bon *setting*, Onorab i war potansyel pou *slot* in enn de bann pti *sarcasm* negativite pou gat en pti pe *mood* Mosyon apre midi.

Me mwan Mr Speaker an dizon sa mon pou bouz dan en

fason pozitiv dan sa Mosyon. Dabor parey nou'n fer avan mwan, mon oule felisit bann atlet ki'n partisip dan Sanpyonna Atletik le 29 Zen be to bann atlet an zeneral pou zot bann bon performans dan zot bann disiplin sportif.

Sirtou nou konnen poudir pandan en letan *COVID* en kantite zot pa'n kapab pratik zot *sport* e la nou rekomanse, e *still* i annan en kantite lentere. E zot lentere dan *sport* premyerman koman en opsyon pozitiv e pou pa antre dan bann lenfliyans negativ, ki parfwa nou war bokou bann zenn i tonm ladan, e zot war zot an aryer dan lavi.

Me zot, mon felisit zot pou pran sa opsyon e pou kontinyen pouse. E pou kwa pa parey mon dir en zour zot ava *achieve* sa bi ki zot anvi *achieve*, byensir avek led pei lasosyete Gouvernman an zeneral.

Pou sa arive Mr Speaker nou koman en sosyete nou bezwen a tou fason posib promot e donn tou loportinite pour ki nou sitwayen sirtou nou bann zenn i kapab *exel* o pli o nivo.

E la Mosyon i pe koz plizoumwèn koz Zil Pros menn si mon rekonnet i annan nesosite pou annan pli bon fasilite sportif lo Zil Pros an

adisyon avek sa ki deza annan.

Me mon krwar i enportan ki nou koz osi lo annan pli bon fasilite sportif nasyonalman, e pou annan en zefor nasyonal pou revwar posibilite ki egziste dan tou ban distrik e tou bann rezyon.

Yer dabor ti annan en kestyon anmennen par Onorab Lemiel, ki ti pe demann Minis an sa ki konsern devlopman fasilite spor dan distrik Anse Royale.

Me mon krwar i annan en posibilite pou nou vwar e revwar dan diferan rezyon, posibilite pou nou devlop bann fasilite sportif pour ki zenn i anba ganny akse ek sa bann fasilite i ava pli pros avek zot dan zot kominote e i a pi fasil pou zot pratik zot bann disiplin, ki zot favorize.

Parey mon'n dir boner Mr Speaker, mwan mon krwar e mon konnen en kantite Seselwa osi i krwar poudir, i annan en kantite fasilite ki'n ganny met an dispozisyon. E dayer pou nou kapab *achieve* sa bann keksoz ki ou'n *achieve* en kantite dimoun in koz lo en kantite – en manm apre midi in koz lo en kantite bann dimoun ki'n *exel*, zot in nonm en kantite non.

Parey mon'n dir zot in *exel* akoz in annan sa bann

loportinite, i annan sa bann fasilite, me nou pa devret aret la. I bezwen annan en zefor nasyonal e get lo nesesite *maintenance* sa bann fasilite sportif.

Nou bezwen petet *think* en pti pe *outside the box*, akoz tou le lannen Minister *Sport NSC* i vin devan nou i koz lo Bidze e nou diskite, nou debat nou konplent Bidze pa ase, Bidze sa ki nou anvi fer nou *postponed* ouswa nou ariv 3, 4 mwan avan lafen lannen program pa ankor fer, *tender* pa ankor fer.

Petet i annan en nesesite pou nou *think* en pti pe *outside the box* e vwar petet nouvo metod. Nouvo fason finansman *sport* Sesel finansman fasilite *sport* e finansman bann Federasyon *Sport* avek bann lasosyasyon.

E la Mr Speaker mon mazin enn bann loportinite ki ti annan atraver *CSR Tax*, ki bann lasosyasyon avek bann Federasyon ti depan lo la, *well* pa ti depan lo la. Me selman zot ti en posibilite en loportinite pou zot ganny serten finansman pou zot kapab bouz zot *sport* devan.

Me malerezman parey nou konnen sa *tax* in ganny retire, e prezan sakenn i sey rod son fason, ris isi ris laba pou kapab

ganny finansman pou kapab pratik zot *sport*.

So petet nou konman en Lasanble enn bann keksoz ki petet nou devret pe koz lo la se ki mannyer nou *involve* plis la kominote sekter prive dan devlopman *sport* Sesel? Akoz i pa zis en responsabilite Gouvernman ,ler en atlet i fer nou fyer ler nou get nou televizyon, Lanmerik *Oregon*, nou war en Ned Azemia pe debout pe al taye, pa zis Gouvernman ki fyer, pa zis Lasanble ki fyer, Sesel antye i fyer.

So Sesel antye i bezwen investir dan spor. I bezwen investir dan fasilite *sport* i bezwen investir dan nou zenn, si ou anvi war sa bann diferan negativite ki nou koz lo la souvandfwa dan Lasanble - bomaten nou mon'n koz en pe lo la, nou anvi war sa disparet, nou bezwen kontinyen investir dan keksoz pozitiv. E *sport* i en bann landrwa pozitiv kot nou devret pe kapab met larzan e fer keksoz marse.

E ler mon pe dir sa Mr Speaker, mon anvi koz en pti pe lo mentenans bann fasilite *sport* e la mon anvi konsantre lo rezyon en pti pe santral kot par egzantp distrik Plaisance, Les Mamelles, Roche Caiman, Mont Fleuri nou kapab benefisye.

Bann zenn i kapab benefisye avek bann fasilite sportif ki zot kapab *practice* zot *sport*. Dan sa bann distrik osi i an en kantite zenn potansyel, i annan en kantite zenn ki osi anmenn meday, en kantite zenn ki annan abilite pou zot al pli devan. E nou bezwen kapab fer sir nou donn zot bann fasilite ki pou permet zot lavansman dan *sport*.

E la mon pe mazin bann fasilite Roche Caiman - wi nou konstrir, nou'n konstrir kantite fasilite. I annan bann laplenn i annan bann *court*, i annan *swimming pool*, i annan diferan fasilite sportif, me i enportan ki nou *maintain* li ki nou aranz li e ki bann zenn osi i ganny akse avek sa bann fasilite.

I pa kapab zis pour en Federasyon en serten letan apre zenn ki pa dan Lasosyasyon Federasyon pa kapab akse avek sa bann fasilite.

So i enportan ki en lizye spesyal, la mon pe koz pou sa bann rezyon santral kot mwan, mon pe reste kot bokou bann *MNA* la i reste i pe servi bann fasilite, ki nou met en latansyon spesyal lo sa bann fasilite ki deza egziste, *upgrade* li lo en nivo ki pou kapab fer nou zenn *practice* zot *sport* e pou zot *excel* dan zot *sport*.

An dizan sa, avek sa Mr Speaker mon krwar, mon konvenki ki poudir *sport* i lakle, *sport* i linite, *sport* i annan en kantite potansyel pou devlopman nou sosyete. E mon krwar nou devret fer tou fer maksimonm posibil, rod nouvo fason fer, enkli sekter prive, anmenn nouvo partner - si fodre nou anmenn osi tranze pou ed nou ki annan larzan dan fasilite anmennen.

E annou fer *sport* bouze Sesel annou amelyor nou fasilite e mon krwar koman en sosyete nou pou sorti byen e nou tou nou pou *happy*. Mersi Mr Speaker.

MR DEPUTY SPEAKER

Mersi Onorab. Prosen entervenans lo lalis Onorab Loizeau.

HON NORBERT LOIZEAU

Mersi Mr Speaker. Bonzour tou dimoun. Mr Speaker mersi pou donn mwan en sans bomaten mon pa'n gannyen, Pou siport sa Mosyon anmennen par Onorab Woodcock.

Mr Speaker Mosyon i en Mosyon ki i enteresan. Vi ki mon en dimoun ki kontan *sport* e mon ankor dan *sport*, mon pou fer sir ki mon pou siport sa Mosyon.

E la avan komanse Mr Speaker mon anvi felisit tou bann atlet ki'n ganny meday lor, meday bronz, meday larzan dan sa dernyen Sanpyonna Atletik ki'n ganny fer e mon rapel mon ti la Mr Speaker nou ti pe asize bann Onorab, nou ti pe asiz mwan Onorab Aglae, Onorab Lemiel kot ti annan en leksitasyon terib Mr Speaker, sirtou ler Anse Royale ti ganny en meday.

Dernyenrer mon ti bezwen sorti kot mon ti pe asize aköz Onorab Lemiel ti pou kas mon linet, mannyer i ti pe selebre e mon ti pe siport li osi tou aköz mwan lekol Bel Eau Mr Speaker, nou ti annan zis 6 partisipan. E dan sa 6 partisipan Mr Speaker mon ti admir kouraz sa bann manrmay, sirtou bann pri manrmay en pti lekol Bel Eau pou sa 6 partisipan nou ti ganny 2 meday Mr Speaker. 2 meday.

E pti zanfan Onorab Bastienne ti parmi. E mon anvi dir zot mon bann manrmay kot lekol Bel Eau, mon ler mon ti lekol Bel Eau nou lekol ti ptipti, mon rapel ki ti annan en fwa dan Sanpyonna Atletik ti zis nou de Jean Vardin avek paviyon pe anmenn e nou pa ti ganny naryen Mr Speaker. Me ozordi, sa letan nou ti annan 2

la nou annan 6 dimoun ganny 2 meday. E mon asire lannen prosenn nou pou annan plis nou pou ganny 3 ou 4 meday Mr Speaker.

Mr Speaker mon pou troun lo Mosyon aprezan. Mosyon pe dir vi ki la Digue/Praslin zot in raport meday dan konpetisyon Nasyonal lot, demande ki Gouvernman pou met an plas plis fasilite sportif neserer pou devlopman bann atlet Zil Pros.

Mr Speaker mon siport sa, me selman Mr Speaker mon demande oli tou sa bann atlet ki'n ganny meday sorti Praslin ek La Digue oli zot?

Tou-le-z-an, nou war zot vini, zot pran meday, zot pran tou lakoup zot ale, apre bann lannen ki swiv nou pa war enn. Eksepte Mr Speaker, bann ki annan en sans pou in lekòl Mahe, zot ganny en sans ganny sa bann fasilite ki nou annan Mahe, zwenn en klib ki nou annan Mahe. E la nou tann nonm zot, apard sa larestan zis i mor koumsanmenm. Akoz?

Enn, pei mon pa konnen si mon pou dir Gouvernman avan zot pou dir mon pe fer politik, me selman Gouvernman avan ki ti la Mr Speaker, in napa sa swivi lo sa bann manmay meday lor Olenpik, lontan nou merit

gannyen nou Mr Speaker kontan, sa ta letan ki nou pe fer sa Sanpyonna Atletik - sa ta atletik ki pe fer byen ki apre zis i disparet, i annan en bon pe zot mon asire ki a kapab anmenn en meday.

Me selman in napa sa lankadremman, ou a dir zis sa levennman le 29 la, ti fer le 29 avan la i le 18, zis ti fer zis en levennman pou krwar nou pe fer sa pou lekòl! Apre ler nou fini i fini laba nou esper lannen prosen ankor. Nou fer enn gran lakoup pran meday welele - fini laba Mr Speaker.

E la nou, nou Gouvernman mon panse ki Minis pe ekoute la avek bann dimoun kot NSC la, pa asize zis les sa bann dimoun perdi dan drog, dan lalkol - nou pa war zot. Leve, prepar keksoz, annan en striktir an plas, pran sa bann manmay anmenn zot, pous zot pli devan.

Pas par fer zot lo zot lekòl pos- segonder ler zot vini, pou zot ganny en sans pou zot soz, si zot pa gannyen bann ki en pti pe mwen akademik bon zot, zot perdi. Sa en lapel ki mon anvi fer avek nou Gouvernman. Annou pa fer parey bann ki fer avan. Annou anmas sa bann manmay la konmela menm e pous zot devan.

E ozordi mon kontan. Mwan osi mon pe swiv sa levennman atletik ki pe fer Lanmerik, mon'n war Ned kot pe taye Mr Speaker - pa move, bougla si nou donn li ankor en pe sipor, mon krwar i pou fer byen - e mon pa krwar i pou fer byen! Akoz zi i in ariv Lanmerik ozordi mon krwar i pou kapab al pli lwen ki sa. E ozordi mon tann dir *track and field* nou bezwen fer sir ki nou soz *track and field* i bon.

Mr Speaker be mwan ler mon get sa Mosyon, tou sa bann keksoz lenfrastriktir ki Onorab Woodcock pe demande, aktyelman i ti merit la ozordi! Tousala ti merit annan! Ozordi, yer Praslin/La Digue pe pran meday? Be zot pa ti war bann la pe pran meday? Nou kontinyen fer zot tay lo *track* disab, apre nou vin dan Lasanble pou dir annou kouyonnen annou soz? Be aksyon lontan ti merit fer, lontan bann le ti merit tay lo *track and field*.

Mon asire si ti annan sentetik - si depi lontan nou ti'n met sentetik lo sa bann lenfrastriktir, ozordi ti pou annan bokou plis rikord ti pou ganny kase par sa bann atlet sorti Praslin ek la Digue. Mon asir ou? Me ozordi ki nou pe fer

pou nou bann dimoun *High Level Sports*.

Dan sa konpetisyon mon ti ekspekte war Liza Labiche pe sot *high jump* mwan, oli Liza, ki nou'n fer ek Liza? Liza pe fer *PE* Mont Fleuri? Liza i sipoze deor pe *train*, Liza ti en *asset*, Liza ti en meday lor pou Sesel. Me nou pa war Liza.

Ki nou'n fer pou anmas sa bann dimoun lo *High Level*? Si en keksoz ki la mon anvi enplor mon Gouvernman, pa zete sa bann dimoun! Fer sir nou pa fer menm fot ek avan.

Pa zis ler sa bann dimoun in vin ek en meday nou vini ek en gro bouke fler ek soz! Koumsa nou ti ete - Minis i vini, riye plise, tou sa pli zoli *lipstick* zot ki'n mete vin donner, apre byen, *bye, bye so long*, sa bann manrmay i *struggle*. Mon anvi dir ek Minis Zialor pa fer sa fot, okip byen sa bann marmay.

E la Mr Speaker ler mon pe koz lo lenfrastriktir, mon rapel lo Praslin sirtou - mon rapel dan katriyenm Lasanble zot pa ti la zot Onorab William, ti ankor lot kote, Mrs Onorab Mitcy Larue ti vin ek bann Mosyon 2008.

Akoz lo Praslin *judo* ti pe evolye zot, zot pe fer byen zot ti pe fwet nou bann dimoun Mahe ater fermal menm. Nou ti pe ganny bate menm nou Mahe ek

zot. Akoz sa Onorab ti trouv li neserer pou li demann son Gouvernman pou fer en *dojo* avek en dormitwar ki apre ler mon ti amann son Mosyon mon ti dir li, be pa ‘dormitwar’ – ‘dortwar.’

I ti vin avek sa Mr Speaker e mwan koman en dimoun ki dan *sports* sa bann letan mon ti ankor dan *sport*, mon ti *basketball* e ler mon mont Praslin nou al zwe lo *court*, nou bezwen demann pardon fey bodanmyen, fey fiyapen - ti annan en gro pye fiyapen ou bezwen demann pardon pou ou kapab zwe *basketball* dan sa gro soley.

Prezan mon ti dir ok bezwen amann Mosyon. Prezan mon ti dir *ok* annou pa demann en dortwar, annou pa demann en *dojo* annou demande pou Gouvernman - sa letan ti annan larzan pou nou fer en *multipurpose gym* kot ladan Mr Speaker nou tou pou zwe *volleyball*, nou tou pou zwe *basketball*, nou ti pou zwe *handball* menm foutbol *indoor* nou ti pou zwe.

Nou i pou met mat ater nou ti pou fer *judo*, karate nou ti pou fer e anba son graden Onorab Georges i rapel byen ek Onorab Arissol Mr Speaker ou rapel byen, nou ti diskite sa dan nou *Caucus*, ki anba son

graden nou ava fer sa bann dortwar pour ki le annan lekip i monte, zot a ganny landrwa pou zot reste.

Onorab Larue ti ankoler, mon ti pres pou sorti ale, taye mannyer i ti ankoler. I ti dir non mon pe *hijack* son Mosyon, pa pou kapab lide son *dojo*. Mr Speaker in ariv depi 2008 ozordi nou 2022 ni en lili dan dormitwar napa, ni en *dojo* ni naryen pa’n gannyen, pourtan later ti annan Ile Eve, Onorab Woodcock i a koriz mwan, later ti annan *Ile Eve*, larzan ti annan sa letan.

Sa letan ler Mosyon ti vini pa ti ankor annan reform ekonomik mon krwar, nou ti pe al ladan, me selman larzan ti annan pou nou fer sa, me sa bann keksoz pa ti ganny fer.

Me ozordi mon kontan Onorab Woodcock in vin ek sa Mosyon, ki demande nou Gouvernman - nou Gouvernman, nou Prezidan ki swadizan ti pou vin o pouvwar’ 2000 Zanmen’ nou pou demann li pou li ekout lavwa nou Manm. Pa fer parey avan kot i pa i ekoute.

Ekout lavwa nou Manm, donn zil pros sa ki zot merite, donn zot.

Ozordi mon apresye - malgre ti an en plan ki ti anba latab en bonpe lannen pou fer

sa *fitness trail*, Onorab Doyace ti ale ti al tir sa plan, E mon anvi felisit Onorab Doyace Porice pou sa lanvi ki i annan pou fer Praslin bouze lo kote sportif, menm si zot pa'n tro, tro *acknowledge* li lo televizyon. Me selman Onorab Porice sa ki ou'n fer si ou ek ou Bondye in war napa problemm.

Mr Speaker be la ler nou pe koz lo fer sa ban lenfrastriktir dan sa bann moman difisil, pa fasil. Ozordi nou annan bann lenfrastriktir ki ankor lo Mahe, Praslin, La Digue nou annan sa bann lenfrastriktir ki date 20an. I annan en kote Stad Linite pa kapab asize lo la dapre konpran, i pou grennen i pou touy nou.

E la ler nou pe koz fer lenfrastriktir, annou pa koz zis fer lenfrastriktir, ler nou fer lenfrastriktir nou bezwen fer sir nou annan en plan mentenans lo lenfrastriktir. Nou bezwen fer sir, aköz i pou kit nou parey sa bann ki nou annan lo Mahe pe kit nou.

E si nou ti byen *maintain* sa bann lo Mahe, ozordi nou ti kapab pran sa larzan ki nou pe fer sa gro *maintenance* fer en *indoor gym* Praslin. I pa enn dan en gran splander, lo kote lakantite popilasyon ki nou

annan me enn ki pou *suit* Praslin ek la Digue.

Ou konnen Mr Speaker mon pa tro, tro anvi politik, me selman ler ou balanse sa politik vini Mr Speaker. I vini. Ozordi nou annan *Freedom Square*. *Freedom Square* i enn premye lenfrastriktir *sport* dan Sesel.

Freedom Square i ankor parey, ni en *changing room*, ni en *toilet* pou bann fiy ki vin zwe foutbol kapab servi, napa. Sa bann fiy i bezwen vin demann kot *gym* anba prete ouswa i annan i al deryer Mr Speaker, ki i pa zoli. Lalimyer napa pou bann tim ki baze anvil, St Louis, Bel Air pou zot kapab *train* ziska en pe pli tar napa. Pourtan i premye lenfrastriktir ki egziste dan Viktoria, zis in negligez.

Pourtan Mr Speaker zot pe nom non en boug laba. Menm dimoun ki'n la dan bann letan e la mon anvi dir ek zot sa bann menm dimoun kot *NSC* la, sakouy zot, annan en plan pou *sport*, li pa zis pran sa bann *post for the sake of ganny sa post*, ganny en pey zis pour vi ou'n ganny en tit, bouze vin ek bann program, montre lazenez ki nou anvi fer!

Se sa ki nou anvi dan sa nouvo Sesel! Sa bann zafer zis asize pa fer naryen in fini sa. Si nou pa kapab bouze tir nou

lekor, donn en lot ki kapab vin fer i a vin fer Mr Speaker. Akoz i annan bokou trenn lipye. Si ou trou nou *sport* ozordi pa pe avanse i annan bokou trenn lipye.

Ozordi nou annan problem ek bann Federasyon, problem ek bann asosyasyon, be nou *as sa body* ki ansarz *sport* ki i fer li, i asize i gete? zis i asize i gete i pa fer naryen, apre i vini i akont ou en zistwar.

Me ler i antre ladan, akoz i fer nou onte ler nou tann sa bann kalite keksoz ki sa bann lorganizasyon, bann federasyon pe drwa sepa konbyen milyon, me selman NSC pa'n dir pou peye, selman dimoun in vini sorti deor i vin partisip dan konpetisyon, selman apre ler pou peye problem.

Mr Speaker mon pa pou al lwen, mwan kot i konsernan *sport* mon pou siport nenport ki, ki vin avek. Eskiz mwan si mon'n fer en pou pe politik, me selman i enportan, i enportan ki nou konnen ki i sa bann keksoz ti merit annan aktyelman, ti merit annan akoz Pa fer premye fwa ki ou pe ganny meday. pa fer premye fwa ki bann atlet Praslin, La Digue pe fer byen dan bann levennman sportif.

I annan lannen an plis ki 20an, 30an be nou pa'n war sa, nou pa ti war? Ozordi ki nou'n

war? 2an ki *LDS* i dan Gouvernman prezan ki nou war nou bezwen aksyon, pe demande pou pran seksyon? Aksyon lontan i merit ganny pran.

Ozordi Sesel ti merit lwen. Nou ti merit annan en basen naze la Digue. ilannan nazer la Digue, napa enn ki'n *compete* dan konpetisyon naze.

Eksepte Felicite, akoz i pe reste Mahe, i vin Mahe i pe ganny sa sans pou ganny dan sa gran pool, Sansan sa enn ki annan sa talan Mr Speaker ki li i napa sa mwayen i pa kapab deplase i en pti pe feb petet akademikman, li i pri, li i reste anba dan fon i pri li, nou merit fer sir ki Gouvernman nou, nou pa fer sa fot.

Nou konnen nou pa pou fer li deswit me dousman, dousman pou nou fer li dousman enn par enn - o fir e anmezir Mr Speaker. Mon panse ki sa parol ki mon pe dir i pa *bullshit* lotrozour zot ti dir mon ti pe koz *bullshit* sa enn la i bon non - sa parol?

MR DEPUTY SPEAKER

Non. Onorab la ou bezwen *retract*.

HON NORBERT LOIZEAU

Mr Speaker mon *retract*. Selman lotrozour i ti dir mwan,

mon ti fer sa. Wi Onorab Loze ti dir mwan mon ti pe koz sa kalite parol, selman la mon'n pran en bon parol pou li. Eskiz mwan Mr Speaker i pe siport mwan selman - pa problem.

Mr Speaker avek sa 2 mo, mon anvi dir avek Onorab Woodcock mon pou siport sa Mosyon akoz sa Mosyon i byen. Sa Mosyon i pou fer ki i pou lev nivo lo Praslin ek la Digue. Akoz lo Praslin ek la Digue Mr Speaker mon konn en ta zanmi laba i annan en ta potansyel laba.

I annan dimoun ki'n apros mwan ki anvi fer bann Lakademi mon konnen ou pe get ler - mon a tous sa non dernyen, zot pa kapab fer akoz zot napa sa bann lenfrastruktir.

Be nou, nou Gouvernman nou bezwen fer sir ki nou met a dispozisyon sa bann enfrastruktir. Alor Onorab Woodcock mon pou siport sa Mosyon e mon pou donn li mon *full* sipor. Mersi.

MR DEPUTY SPEAKER

Mersi Onorab. Dernyen entervenans lo lalis Onorab Arissol avan ki nou ganny *summing-up*.

HON SANDY ARISSOL

Mersi Mr Speaker. Mon krwar in en Mosyon enteresan. Ou

konnen dan break nou ti pe fer riye an relasyon avek sa Mosyon nou ti pe dir lalis ki Pralinwa ki Onorab Woodcock, Onorab Gill, Onorab Doyace ti pe demande nou ti pe dir be si nou donn zot sa lalis ki zot pe rekomande Takamaka pa pou ganny naryen.

So nou ti pe dir be nou a sey negosye pou nou balanse poudir parey in ganny dir, letan Praslin i ganny pou li zot pa ariv 75poursan e nou Mahe nou reste lo 2poursan. So nou ava balanse pou asire ki lapartaz i vin egal avek pti resours ki nou annan, me selman nou po siport nou 2 zil, parske zot form parti nou teritwar e nou bann dimoun ki nou kontan zot menm zot bann Zilwa parey nou dir.

Mr Speaker i 2 size ki dan Lasanble toultan in egziste, se ki i annan sipor tou bann Manm se zize *sport* e osi lakaz. E mon asire se pour sa rezon tou bann Manm pe koz an faver an relasyon avek bann fasilite sportif ki egziste, e pou donn sipor nou bann manm lo sa 2 zil prensipal ki nou annan, sa se La Digue avek Praslin.

An menm tan nou osi bezwen rekonnèt bann atlet e nou bezwen felisit tou bann lekol an zeneral lo Mahe, Praslin ek la Digue ki pa'n

ganny sans dir en pti parol, felisit zot pou sa levennman ki nou tou nou ti al donn en sipor, felisit tou bann lekol depi lekol primer ziska lekol pos-segonder.

Felisit tou bann atlet ki ti la avek en pti delegasyon avek bann atlet ki ti la avek pli gran delegasyon. Mon krwar zot tou zot in fer Sesel fyer, zot in fer zot lekol fyer, zot in fer zot paran fyer e zour sa nou bezwen aplodir zot, e dir ek zot felisitasyon e kontinyen fer bann keksoz pozitiv an relasyon letan nou pe koz *sport*.

Mr Speaker i annan en keksoz ki'n en pe fatig mwan letan Minis *Sport* in vin dan Lasanble yer, pe reponn keston Onorab Philip Arissol.

An relasyon avek bann Federasyon. E bann konversasyon ki'n sorti avek bann delegasyon ki ti la se ozordi nou annan difikilte avek bann Federasyon. Bann mo ki'n ganny servi ki mon ti note dan bann Federasyon i annan bann labi pouvwar, i annan viktimizasyon, i annan move zasyon zot kont, i annan menm ki pe ganny *strike off* lo bann lalis Federasyon. E nou'n menn ganny dir poudir i annan ki zot annan *case* Ankour.

So mon krwar nou en pti pei parey Sesel letan nou koz lo

sport, parey letan mon pe get tou sa bann tit la labi pouvwar souvandfwa ganny asosye avek politisyen, bann politisyen ki kontan pouvwar zot labi pouvwar, viktimizasyon. Tousala in ganny asosye ek politisyen ki viktimiz dimoun, pous li dan son move travay.

So ozordi sa bann move parol in ganny dir lo kote *sport* e pou en pti pei parey nou, nou pa kapab annan sa bann move parol lo *sport*. Parske *sport* li i ganny konsider koman sa levennman pozitiv, parey in ganny dir par Onorab Wallace poudir i anmenn tou dimoun ansanm dan en fason prodiktiv e pozitiv.

So letan ou tann en kalite lanons koumsa i pa fer byen pou nou koman en pei e i pa fer byen pou nou bann zenn ki pe ekoute. Parske sa ki nou bezwen konsyans e ki ozordi si nou annan bann *best sportsmen of the year*, *best sportswomen of the year* dan nou pei i bezwen komans en landrwa. E souvandfwa i komans dan bann lekol.

Tou bann atlet ki ganny formen i ganny form enn dan bann lekol e letan nou lo sa Mosyon an relasyon avek bann sport fasilite lo Praslin, ki mon asire zot bezwen, nou bezwen osi pran kont bann ansennyan

ledikasyon fizik ki donn sa bann atlet sa sipor, sa lankourazman pou li kapab fer byen parey nou tou nou'n koz lo la.

Nou bezwen osi rode lekel bann *PE Teachers* ki nou annan, nou apel zot bann *PE Teachers*. Lekel nou bann ansennyan ledikasyon fizik? kote zot ete? Ki lankadremman zot gannnen? ki sipor an plis ki nou koman en pei nou donn zot? Par egzanzp, ki dernyen fwa zot in ganny en bon *training* koman zot menm zot koman bann ansennyan ledikasyon fizik?

Ki dernyen fwa nou'n don zot en lesanz ant bann lezot pei pou zot kapab *improve* zot performans, pou zot kapab *improve* performans nou bann zanfan, pour ki nou bann zanfan i kontinyen fer byen le 18 Zen, pour ki nou tou koman bann Manm Lasanble pou nou vini felisit nou zanfan?

Sa osi i en pwen ki mon krwar petet letan nou pe koz lo sa Mosyon, i pou enportan pou Gouvernman regarde - nou bann ansennyan ledikasyon fizik. E letan mwan mon mazin ledikasyon fizik ozordi mon annan Shiela Desire, Shiela Desire i en vye *PE Teacher* depi lekip St Jean Bosco, ozordi i

ankor pe fer *PE* avek bann zanfan.

Mon annan Bernard Dorasamy en atlet ki'n fer fyer Sesel pandan plizyer lannen, ozordi i ankor pe fer *PE*. Dan vakans letan mon vwar Mis Doreen Mirabeau avek bann zanfan Bel Ombre Primer, pe fer aktivite lo laplenn dan en gro ker soley Bel Ombre, be bann zanfan i byen motive parske Mis Doreen pe pous zot.

Mon krwar i enportan ler nou pe met tou sa bann zafer dan sa perspektiv, pou nou osi kalkil rode siport nou bann ansennyan ledikasyon fizik Mr Speaker. I pou Praslin, La Digue osi mon asire nou bezwen fer egzaktman menm zafer.

Mon rapel byen letan ti annan en kestasyon an relasyon avek La Digue, mwan mon ti dir poudir La Digue i enn bann zil ki fer byen enkli Praslin lo nivo ekonomik. Sa 2 zil Praslin ek La Digue zot kontribye en kantite dan devlopman nou pei zot. Letan ti annan *COVID* sete sa 2 zil ki ti ofer Seselwa bann *package* pou vin en wikenn, vin 2 zour, pou vin 1 mwan, mannyer oule. Letan lemondn ti pe refiz nou, parske kondisyon lasante ki lemondn ti pe fer fas avek.

E toultan mon'n siporte, mon ti dir la Digue ozordi zot fer

sitan byen ek Praslin alor sa kontribisyon ki zot fer dan lekonomi nou pei, nou bezwen siport zot. Nou bezwen rode mwayen pou nou kapab asiste zot avek bann keksoz initil, ki ed zot dan sa demars pou zot 2 zil kapab progrese. E toultan mwan mon fer sir mon'n donn sipor Praslin ek La Digue e mon koz an byen lo zot a tout moman.

Mr Speaker letan nou pe koz lo bann atlet ki'n fer byen lo Praslin ek La Digue, mon kontan bann non ki'n ganny mansyonnen se bann endividi. Be selman par egzantp lo Praslin ler mon mazin *Light Star* en lepok sa tim foutbol ki ti apel *Light Star* en lekip ki ti fer byen lo nivo nasyonal e mon rapel Hughes Jeanne ki ti *the best scorer* sa bann letan, e ti fer Praslin fyer.

Alor pou nou kapab kontinyen avek bann zenn ki fer byen, nou pou bezwen regard bann lenfrastriktir ki i egziste dan tou distrik enkli Mahe, Praslin avek la Digue. Nou pou osi bezwen rekonnet Mr Speaker, poudir i annan en kantite lenfrastriktir ki'n ganny fer dan Sesel.

Nou bezwen rekonnet e aksepte sa. I annan en kantite lenfrastriktir ki'n ganny fer. Me nou osi bezwen kapab rekonnet

e aksepte poudir i annan en kantite lenfrastriktir, ki'n zis ganny desinen lo papye e in ganny met dan en tirwar. Nou bezwen osi aksepte e rekonnet poudir i annan en kantite lenfrastriktir ki pa ganny *maintain* dan nou pei, zis in la. Bel Ombre dan mon distrik i en legzanp.

Nou annan nou laplenn foutbol, nou annan nou kort *basketball* ki son baro in tonbe, lalimyer in epize, fil in fini dekonpoze, nou annan en zoli fasilite lo laplenn ex Khashoggi Beau Belle ki zis la, ki pa ganny *maintain* prezan tou dimoun i demande be ou ki sipoze koup zwe, ou ki sipoze penn, ou ki sipoze fer sa.

Mon krwar tou sa letan nou'n pe koz lo sa Mosyon, i pou enportan pou mon Gouvernman ki la ozordi pou nou kapab kordinen byen, parske parfwa i annan tro bokou leskiz an sa ki konsern *maintenance*. Ler ou al kot *Local Government* in dir ek ou *NSC*, *NSC* i dir ek ou i pa'n ganny larzan i bezwen ganny avek lot Minister, e lenfrastriktir i kontinyen vin deplorab.

Alor lo Mosyon ki pe ganny anmennen nou pe don *full* sipor, nou pe siporte be an menm tan letan nou pe siporte nou pe anvoy en mesaz avek

Gouvernman. Nou pe anvoy en mesaz avek Minis *Sport*. Nou pe anvoy en mesaz avek sa ki ansarz *NSC*, *CEO* pou zot konpran ekoute poudir i an en leokri deor an sa ki konsern bann lenfrastriktir sportif dan nou pei ozordi Mr Speaker.

E mon kontan letan par egzant Onorab Lemiel son non in ganny mansyonnen taler an relasyon avek en *Regional Sports Complex*, me kekfw sa osi i a vin en posibilite pou ki bann rezyon zot annan en zoli fasilite. Avek mwayen ki nou annan ozordi dan pei ki par fer ki tou distrik pou ganny sa ki i pou demande.

Be kekfw ti a bon nou komans avek enn rezyonal. Sa ti a fer ki nou bann zanf an i ganny titre dan bann move lenfliyan e kot *sport* i vin sa enn priyorite pou li kapab bouz lavan, e osi ed nou.

Me letan mon pe koz lo Praslin an relasyon avek zot bann fasilite mon krwar zot annan en kantite abilite sportif Praslin ek La Digue.

E mon krwar i enportan pou Gouvernman get zot, selman pa kriy tro for parske pa i aköz Prezidan i sorti Praslin, alor zot pe profite zot pep anvoy en gran lalis pli gran ki pou Mahe. Pa aköz *Attorney Zeneral*

i sorti laba, alors zot anvi nou drafte en Lalwa zis pou zot.

Pa aköz Komisyoner Lapolis i laba, ler zot anvi en pli gro Kordgard Baie Ste Anne ki pou Mahe Santral, non. Nou a bezwen fer li byen depandan nou resours, depandan mwayen ki nou annan, pou asire ki Praslin ek La Digue zot osi zot ganny par dan sa gato ki nou, nou tou nou ava vote dan Bidze koman bann Manm Lasanble, pou asire ki nou de zil i kontinyen bouze.

E zot kontinyen reste pre avek Mahe pou asire ki, en zour nou pa tann zot anmenn en Mosyon pou rod zot prop Larepiblik e zot anvi annan zot liberte avek Mahe aköz zot in sitan devlope e zot in vin sitan en pti bizou dan Losean Endyen.

Me par kont Mr Speaker mon ti a kontan dir avek le 3 Onorab enkli Onorab Rocky Uranie ki pa dan Lasanble Nasyonal pou rezon medikal. Nou anvi dir ek zot poudir nou pou siport zot, zot Mosyon e nou pou siporte, nou pou apiye pour ki Gouvernman i donn zot en zorey, i ekout zot ki parey nou'n ganny dir bann lenfrastriktir ki i annan.

Parey Mosyon ti pe demann pou Praslin avek La Digue, e pou osi Gouvernman

regard osi tou lenfrastriktir lo Mahe, parske i annan en leokri an relasyon avek bann lenfrastriktir sportif ki annan dan tou bann distrik.

E avek sa Mr Speaker mon ava rann ou lanmenn e mon ti a kontan remersye tou bann dimoun ki'n ekout nou e mon ti a kontan dir en sipor spesyal pou nou bann zil enkli nou ban MNA ki sorti lo sa ban zil. Avek sa mon ava dir ek ou mersi bokou Mr Speaker.

MR DEPUTY SPEAKER

Mersi Onorab. *Leader* Lopoziyon pou dir mwan ou ti'n lev ou lanmen? Mon pa ti'n war ou, *ok* solman mon ava fer leksepsyon. Mon ava donn ou 8minit. 5er pou loter Mosyon fer son *wrap-up*. Pa pe mont Praslin ozordi ou? Solman *still* mon a donn ou ziska 5er. *Proceed*.

HON SEBASTIEN PILLAY

Ou pe donn mwan ziska 5er?

MR DEPUTY SPEAKER

Yes, 8 minit.

HON SEBASTIEN PILLAY

Ok. Mon riske pran en pti pe plis ki 8 minit. Mersi bokou Mr Speaker e bonswar tou dimoun. Bonswar tou zabitan lo zil ki pe ekout nou. Mersi e bonswar tou

bann atlet e tou dimoun in *involve* avek *sport*.

Mon krwar si loter Mosyon kot i ti komanse mon war li in sorti dan Lasanble mon pa konnen si in ale, in ekout entervenans ki'n fek koze avan mwan, e sa se byen sir Onorab Sandy Arissol Manm Elekte pou distrik Bel Ombre, i pa zis en entervenans me i en Manm elekte pou distrik Bel Ombre, i ava realize ki konteks sport i sipoze anmenn nou koman Lasanble ansanm.

Bomaten ler nou'n koz lo Mosyon ki Onorab William in anmenn, nou'n vwar ki nou kapab vin ansanm lo bann size ki konsern Seselwa e ki annan lenpak Seselwa e ki annan lenpak nou kapab avans bann nide e bann keksoz ki benefisyè bokou dimoun.

Me i osi relevan e tre enportan ki nou, ki mon anmenn Lasanble pou pran konstans sityasyon ki nou ladan ozordi.

Mon dir sa aköz mon anvi bann Manm i reflekte lo la fason ki, mon konnen i zot Gouvernman, me zis pou en moman konsider zot lekor koman bann Manm Lasanble e konsider sa bann dimoun ki la bann dimoun ki dan Legzekitiv e ki mannyer zot vini pou vin

reponn nou lo bann size ki vin devan Lasanble.

E pou bann ki'n la dan plizyer Lasanble oparavan, e mon asire ou men ou Mr Speaker, akoz atraver sa kestyon ki ou ti demande yer i kler ki ou santi ou ganase parfwa, ler ou tann bann menm kalite keksoz ganny dir avek ou, ki ti ganny dir avan, pe ganny dir konmela.

E se sa ki devret anmenn nou fer en refleksyon lo la, akoz par egzanp yer ler mon ti *press* Minis pou donn nou en *timeframe* an sa ki konsern fasilite sportif la Digue, ni li, ni son *CEO NSC* pa'n oule donn nou en *timeframe*.

Oubyen, mon a, re fraze, pa'n kapab donn nou en *timeframe*. Malgre ki zot in fitir nou zot in fer vizit, malgre zot in koz lo *tender* zot pa'n kapab fer li.

E mon krwar se sa pwen ki Onorab Arissol pe fer resorti. E se sa malez ki Onorab Loizeau in koz lo la, akoz pou devlop sport ou bezwen bann dimoun ki pe *manage sport* annan sa volonte pou realiz sa bann plan ki i ganny met devan zot. Me si zot napa volonte zot menm, Gouvernman pou kapab met kantite larzan ki i anvi, be sa bann keksoz pa pou ganny fer.

E la si nou oule fer politik zot a dakor ek mwan poudir si zot, mon aksepte tou sa ki'n mal fer zot pou bezwen aksepte osi ki mon bezwen pran tou sa ki'n byen fer. Be i annan en kantite keksoz ki pe byen fer pou *sport* dan sa pei. Kantite. So eski alors prezan nou pou zwe pran rann oubyen fer mal fer oubyen nou pou bouz devan?

E se sa ki mon oule envit *mover* Mosyon pou konsidere pou nou bouz devan. Ler mon'n ekout li e mon ekout sa *gam* demann ki i pe fer, petet ki mon ti ava demande akoz nou bann manm lo nou kote latab nou'n eksprim sipor pou en tel Mosyon, akoz lekel ki pa pou sipor *sport*?

Eski ou kapab sible bann keksoz ki la, la konmela i vin bann irzans ki nou krwar nou bezwen pou fasilite *sport* lo nou bann zil, pou fasilite devlopman nou bann atlet. Dan plas ki nou poz lo sa in ganny plan pa'n ganny fer, sa in ganny pa'n ganny fer.

Ler mon pou ekout la kantite be finalman Gouvernman pou bezwen aret fer tou proze lo Mahe al fer tou proze zis lo bann zil. Nou bezwen koz dan en fason ki sa Mosyon parey nou'n dir taler, lefe ki Lasanble i paret nou pou

ganny sipor tou dimoun ozordi e si nou, nou pe partisip dan e Mosyon nou pou oule ki nou kapab anmenn en rezilta tanzib atraver sa Mosyon.

Annefe tou bann Mosyon ki'n pas devan lasanble ti riske ganny *approval* Lasanble an antye si ti napa bann de rapaz dan bann deba ki ti'n ganny kree par bann largiman ki ti neserer. Alor mon krwar se la kot nou bezwen sibler sa ki nou pe fer, e ki pe arive ozordi.

Mon tann atraver ou Mr Speaker Onorab Loizeau mansyonn Liza, me, bokou bann atlet *former High Level* atlet pe ganny bokou difikilte avek konteks *management sport* ozordi. Nou koz lo *coaching* par egzantp Clementina Agricole pe resevwar pake problem an relasyon ek sityasyon ki i ti ladan.

E ler ou pou kestonnen ou ganny difikilte, e se pour sa rezon ki mon bezwen demann avek zot e la pa pran mwan mal, pa ganny gro lavwa e gro lebra zis ler zot annan Mosyon e zot Legzekitiv pa la, annan sa kouraz osi ler zot Legzekitiv i vin dan Lasanble pou *challenge* zot Legzekitiv akoz se sa ki pe arive.

Mwan mon santi poudir mo pe war sa ki mon'n deza war arive, en Legzekitiv ki pe vin tro

konfortab dan sa ki in gannyen, e ki prezan pa pe realize ki i annan lobligasyon pou li delivre. E dan pals ekout sa bann manm ki'n ed sa Legzekitiv ariv la sa Legzekitiv pe deside *bypass* sa ki ti sa bann Manm i dir e pa fer sa ki sa bann Manm i demande.

Pa pran mwan mal mon pa pe atak person la, be mon pe koz lo realite akoz mon koman Lasanble nou annan en devwar pou kit *the Executive accountable*.

Nou pa kapab plan pe ganny fer depi komansman Zanvy e la nou pe ariv finisyon lannen e nou pe al koz lo *third quarter midyear review* proze pa ankor komanse. E sel leskiz prezan ki bann Manm Lasanble e zot pe fer zot louvraz byen koman politisyen, mon bezwen dir zot pe fer sa ki politisyen i bezwen fer se ki zot bezwen al dan lepase blanm sa enn ki ti la avan.

Me la realite sanmenm sa en ki ti la avan i nepli la. I se ki se ou Gouvernman ki le Gouvernman i bezwen delivre e ler nou koz zot Gouvernman se zot parti ki pouvwar e menm ler Onorab Labonte i lir son Manifesto mon krwar fodre ou fer a Minis osi lir ou Manifesto.

Mon ti a kontan nou sible byen sa bann largiman akoz si koman Lasanble kan *US* dan Lasanble pou siport en linisyativ sa Lasanble, nou anvi war en rezilta. Pe enport si dan plas in napa rezilta, nou pe koz ozordi kot nou ete nou bezwen kapab war en rezilta.

Otherwise nou *fitness trail* ki mon pou rode Baie Ste Anne nou pou tann koz lo plan, nou pou tann koz lo komite e i pa pou realize. E pou bann Manm ki'n dan Lasanble avan mwan e mon konnen ou konpran ki mon pe dir Mr Speaker, akoz mon langaz in sanze la. Mon langaz mon pe regard *delivery* Gouvernman. Malerezman nou pa pe vwar en Gouvernman ki pare pou ekoute pou li delivre, *I'm sorry* pa pran mon mal *but that is the case* ozordi!

E dan plas delivre nou lager ek Manm Lasanble. Ler sa Mosyon i vin devan mwan e mon regard sa Mosyon mon mazin *sports complex* lo La Digue, mon konnen in annan vizit be sa bann keksoz ler mon'n koz ek Onorab Uranie, mon koz ek bann dimoun otour sa vizit mon fer sir mon'n fer en pti pe resers, be lafason ki zot ti pe koze tou keksoz pou ganny fer dan 2 ou 3 semenn.

E mon asire Onorab Woodcock i konn tre byen

lafason ki ler ki in fer vizit in ganny koz avek pou ganny fer la deswit, deswit. Petet i pa pou oule admet me i koumsa zot in donn li lenpresyon ki sa bann keksoz i realizab dan en *timeframe* ase kourt. Me apre ki nou pe vwar, nou pe vwar e kantite letan i pran.

So sa Mosyon ozordi in permet nou pou adres 3 size fondamantal premyerman sa fasilite. Dezyenmman sipor pou atlet e trwazyenmman anmenn atlet lo en nivo *High Level*. Lo en nivo *High Level* Onorab Arissol avan mwan mon koz lo e pwen ozordi ki relevan ki ou annan e ou en lasosyasyon siprenm ki *manage sport* lo nivo nasyonal mon pe dir ou Federasyon pe fer gro lebra me selman li *NSC* ek Minister *Sport*, i oule ki atlet i ganny meday lor.

Be si ou pa kapab dil ek Federasyon i asire ki sa atlet I ganny bon tretman, ki mannyer sa atlet pou kapab *train* si i ganny en *coach* ki po permet li ariv sa nivo? Ou oule i servi en *coach* ki pli ba nivo ki sa ki pou anmenn li lo sa lot nivo.

I annan en *allowance* ki bann atlet ki lo *High Level* i sipoze ganny mon pa konnen si zot okouran, i annan atlet in bezwen lager pou gannyen. So mwan mon pa pe koz lo, mon pa pe fer okenn latak lo okenn

dimoun, okenn Minis mwan, mon pe koz lo en realite ozordi ki anmenn mwan koman en Manm Lasanble pou dir Legzekitiv i bezwen pas a laksyon e delivre.

E *without* sa proteksyon e mon pa dir sa dan en fason derogatwar me san sa proteksyon ki zot ganny aborde par sa mazorite ki dan Lasanble, bokou sa bann Minis ti pou *fail* dan sa bann kestyon ki zot pe reponn dan sa Lasanble. E se pour sa rezon ki nou koman Lasanble nou bezwen fer en legzanmen konsyans.

Sipor atlet *High Level* i bezwen kler i bezwen net. Ou pa kapab annan en Federasyon i fer lavi bann atlet ki lo *High Level* difisil apre ekspekte sa atlet performen. E si a plizyer repriz, mwan mon'n vwar lesanz *email* a plizyer repriz atlet pe ekrire, pe ekrire NSC pe demande, be i bezwen annan en moman kot nou pas a laksyon kot nou dil ek sa sityasyon.

Dezyenman an sa ki konsern idantifikasyon atlet, tou dimoun in war lekel bann atlet ki ganny meday lor, mon konnen Praslin mon travay avek sir Bara, letan mon ti pe *teach* Praslin mon'n travay avek Menmen, *Sir Benjamin*, mon krwar Onorab Woodcock in pas

dan mon lanmen li osi konmsi si mon pa tronpe. *Ok.*

Kekfwa aköz sanmenm i koumsa petet – I pa en keksoz derogatwar sa, me nou tou nou konnen lekel sa bann atlet lo Praslin. E nou tou nou kapab servi sa bann talan pou devlop zot. Be eski *NSC* ozordi i an en *talent identification program* ki i *sustain*, ki i pouse?

Nou tou nou konnen lekel sa nanm atlet lo La Digue. Menm sa 4 atlet ki Bel Eau nou konnen lekel zot. Me eski nou pe pouse pou nou siport sa bann atlet, siport sa bann lekol? anefe konbyen nou la ki konn tre byen poudir konbyen lekol ki'n vin kot nou *MNAs* pou rod *sponsors*, pou ed zot avek partisipasyon dan aktivite enter skoler? Nou tou nou konnen in arive ek nou.

Be si nou *MNAs* nou kapab donn sa sipor ek sa resours ki nou gannyen ki bokou dimoun i rode ki nou fer avek. Be eski pa i devret annan en keksoz ki sa *body* ki ganny mandate pou fer li osi i fer? Mon asire ou menm ou Mr Speaker ou siport lekol bann lekol dan ou rezyon.

MR DEPUTY SPEAKER

La Rosiere ek Belonie.

HON SEBASTIEN PILLAY

Egzakteman. Zis parey Onorab Lemiel in siport lekòl Anse Royale Onorab Baie Ste Anne ek Grand Anse Praslin Onorab Churchill Gill osi. *Ok.* Wi Onorab Loizeau ou siport lekòl Bel Eau.

So se sa, si zis nou analiz sa koman *MNA* nou, nou an deor konpletman konteks *sport* me nou'n pou kapab antre pou fer li kwa ki anpes *NSC* ki li i dan konteks *sport* pou fer li? Kwa ki anpes Minister *Sport* pou devlopman en program pou dir be *ok* lala ki mannyer sa konpetisyon in pase sa lannen, e nou pas a laksyon lo sa lot tou lannen prosenn?

So sa i tous mon dezyenm pwen, ki mannyer nou pou ed ou si pou ganny sa fasilite pou annan sa bann atlet, ki pou *train* dan sa bann fasilite. Prezan trwazyenm pwen lo sa bann fasilite, nou annan de kategori fasilite, fasilite ki la ki pa'n ganny *maintain* e fasilite ki pa ankor ganny fer.

In regards to maintenance bann fasilite fransman, mon pa ganny en konpran. Mwan men mwan mon vwar dan plizyer Bidze mon dan Lasanble pandan plizyer lannen larzan i ganny ete pou renovasyon frazilite ki mannyer i pa kapab ganny fer, mon pa ganny en konpran.

E la nou pe koz lo fer nouvo fasilite mon espere ki i annan en swivi ki ler sa bann fasilite i ganny fer, pou asire ki zot ganny byen mentenir ki zot ganny byen servi. So, an konklizyon, an konklizyon sa Mosyon pa devret *about* sa ki pa'n ganny fer me plito *about* kote nou oule ale ozordi.

Ler nou regard performans tou sa bann atlet nou regard performans bann *PE Teachers*, mon'n travay ek Mis Shiela Desir Belinie, *Sir* Augustin Glacis ek son pri group etidyan ki i annan ki'n nobou fer lekòl Glacis pran en lakoup premye fwa dan son listwar Onorab Esparon pa vre.

En bon pe Lannen nou pa'n anmenn pran en lakoup, sa lakoup bi *transcend* tou divizyon politik, kot tou dimoun Glacis i santi en *sense of pride* enkrwayab pou *achievement* en pti lekòl parey Glacis. Konmsi se sa ki nou bezwen rode. Koman *MNA* nou bezwen rod sa konverzans dan lopinyon, san ki nou diviz nou lo en size ki devret anmenn nou ansanm.

E si apre midi la, *mover* Mosyon i annan en loportinite dan son konklizyon pou anmenn nou koman en Lasanble ansanm, koman en lafors kolektiv pou anmenn

Egzekitiv pou pas a laksyon, mon ava dir nou'n *achieve* nou lobzektif pou sa apre midi. Annou gete si nou kapab *rise to the occasion*. Mersi Mr Speaker.

MR DEPUTY SPEAKER

Mersi Onorab. Mon ava don laparol loter Mosyon pou son *summing-up*. Onorab Woodcock.

HON WAVEL WOODCOCK

Mersi Mr Speaker. Mr Speaker mon pou komans mon konklizyon lo sa Mosyon par dir ki mon byen apresye bann entervansyon ki sorti lo tou lede kote latab pou sa Mosyon.

Mon remerci zot pou zot sipor pour ki nou bann atlet lo Zil Pros i kapab ganny asiste avek plis sipor, an term bann fasilite nesese, finansman e osi ban lekipman, bann bagaz ki zot bezwen pou zot kapab devlope ariv lo sa nivo ki nou ti a voudre vwar nou bann atlet Zil Pros Praslin la Digue i arive.

Mr Speaker mwan koman en manm ki sorti lo Zil Pros, lo Praslin, enn bann rezondet akoz ki mon anmenn sa Mosyon ozordi se akoz lenspirasyon ki ek Pralinwa ek Digwaz. Ou konnen mon bezwen dir ki nou bezwen admet ki pou plizyer lannen zabitan Praslin ek La Digue, nou santi ki i napa ase

ki'n ganny fer pou nou bann atlet lo zil.

E par konsekan i fer ki bokou nou bann atlet ki ti annan potansyel pou zot al pli devan ki'n men ariv lo bann nivo enternasyonal e *why not win* en meday Olenpik, zot pa'n neserman ganny sa loportinite. E nou santi poudir sa moman in arive pou nou pouse, pou nou demande e pou nou angaz plis Gouvernman pou nou kapab ganny sa bann fasilite e sa bann sipor nesese ki nou merite.

Aprè tou pou plizyer lannen, lannen i ale lannen in vini, menm si dan bann lannen, bann dernyen lannen nou pa'n nobou kapab fer nou bann konpetisyon lo nivo ki nou ti a kontan menm konpetisyon enter skoler, dernyen konpetisyon in *still* montre nou poudir Praslin ek la Digue *still* nou annan bokou potansyel kot i konsern atletik.

Nou ankor pe fer bann perse, non, selman o nivo atletik, *track and field*, me nou war nou ankor pe anmenn bann bon rezilta dan bann lezot *sport* parey *volleyball* e menn dan *wate sport* parey wikenn nou'n aprann ki mannyer nou bann atlet lo delo i fer vreman byen dan en konpetisyon Moris.

Mr Speaker i enportan Onorab *Leader* Lopozisyon in dir en keksoz, ou konnen nou, mon pa pe ekspekte ki ozordi pou demen ki demen e bomaten mon pou leve mon pou war en *Sports Complex* in ganny fer Praslin.

Akoz mon konn tre byen poudir e nou tou isi si nou et rezonnab nou konnen ki sityasyon ekonomik nou pei in fer fas avek resaman kriz ekonomik, kriz lasante e nou ankor dan *recovery mode*.

E mon konn poudir Gouvernman i bezwen priyoritiz sa ki pli enportan dan devlopman *sport*, e osi i annan bann lezot sekter ki zot bezwen osi investir ladan. Me sa ki nou pe demande se ki avek sa resours linite ki nou annan, fodre nou fer lespas pou nou osi ede dan devlopman nou bann atlet.

I malere me nou bezwen admet poudir dan lepase, resours ki nou ti annan dan bann letan ki nou pa ti dan kriz ekonomik, i pa'n ganny *manage* dan en fason ki byen. Petet nou ti kapab fer pli byen an term lenvestisman dan bann lenfrastriktir sportif, e osi an term pou *maintenance* pou plizyer fasilite ki nou atlet ozordi malerezman pa pe kapab servi li lo sa nivo ki zot ti anvi

servi li, akoz i annan serten degradasyon lo sa fasilite.

Ozordi la kot nou ete. Me nou bezwen annan en vizyon, en rev, en laspirasyon pou fitir nou dimoun. Mon laspirasyon i pa zis pou Praslin La Digue mon ti a kontan osi vwar devlopman bann *sport* o nivo tou bann lezot distrik ki annan lo Mahe osi.

Me selman koman en Manm ki sorti Praslin ki'n aport mon zorey mon'n ekout sa ki mon zabitan in dir, sa ki zabitan nou zil Praslin in dir, e osi sa ki bann zabitan La Digue in dir, i mon devwar e mon responsabilite pou mon vin devan e fer tande zot lavwa dan nou Lasanble Nasyonal, avek lespwar ki nou Gouvernman i tande i ekout nou laspirasyon e zot komans aksyonn lo la.

Onorab Porice in adres en size vremen enportan, in dir ki si nou investir dan bann fasilite sportif lo en standar enternasyonal nou pa pou bezwen - ler nou pe koz lenfrastriktir sportif nou pe koz lenfrastriktir lo Zil Pros, lo Praslin ek la Digue, nou pa pou bezwen depans gro sonm pou anvoy nou bann atlet *training* Mahe.

I pou koup lo depans, zot pou kapab *train* lo Praslin e ki nou'n war dan lepase Mr Speaker parey serten Manm in

dir mon krwar Onorab Loizeau in tous en pti pe lo la li osi, bokou atlet avek potansyel Praslin ek La Digue, in ganny *overlook* dan lepase, pou bann gro konpetisyon aletranze ouswa pou zot form par Tim Nasyonal, akoz kou ki asosye avek fer monte an atlet sorti Praslin, La Digue pou vin *train* Mahe i en depans, i annan en depans ki vin avek.

E parfwa i fer ki bann lasosyasyon bann diferan klib sirtou bann Tim Nasyonal, pa'n envestir, pa'n met larzan *available* ase, pou zot fer ki bann atlet ki annan potansyel lo Praslin la Digue pou vin Mahe pou *train*, pou zot kapab al *compete* dan bann konpetisyon enternasyonal.

E si nou met an plas sa bann fasilite lo Praslin, sa i pou fer ki pa pou bezwen nesedit sa sonm larzan pou sa deplasman, kan zot kapab ganny sa *training*, zot kapab ganny devlope lo Praslin ek La Digue.

E akoz sa i en dezavantaz pou plizyer bann atlet Praslin la Digue. En lot keksoz ankor ki enportan note, se ki i enportan pou nou osi, pou Gouvernman osi devlop bann ankadrer, bann *coach* ki sorti lo Zil Pros.

I enportan pou nou donn *training* bann *coaches*, bann ankadrer ki baze lo Praslin ek

La Digue pou zot ganny bann kalifikasyon enternasyonal, pou *upgrade* nou bann *coach* Lo Zil Pros ki zot kapab *train* nou bann atlet lo Praslin, menm bann atlet ki *High Level*.

Sa osi i pou ede koup en pe kou, ki pou ede ki lo bann *coach* lo Praslin ki annan sa konpetans, sa nivo kapasite pou zot *train* e ekip bann e *build* bann atlet ki baze lo Praslin avek la Digue.

Onorab Gill letan in koze in dir en keksoz. In dir ki poudir letan koze in fini, e nou'n ariv letan aksyon e fodre nou pran aksyon pou pa kapab kontinyen koze zanmen ale, zanmen fini e nou bezwen pran aksyon. Fodre nou pran aksyon e nou pa kapab kontinyen koze, zanmen i ale, zanmen fini e zanmen pran aksyon.

Me ankor enn fwa i enportan pou note ki ti annan en kantite, plan in annan, non tande koze lo plan, nou'n tande koze lo plan nou'n ganny prezante, nou war lo medya in annan en kantite plan, en kantite Polisi kot i konsern *sport*.

Parey mon'n dir ti annan *Sports Complex*, in annan plan *fitness trail* e pa zis dan sport in bann plizyer pa'n, le problem se ki dan lepase nou'n fer tro

bokou plan ki nou pa'n akt lo la, nou pa'n azir lo la.

E zisteman Onorab Gill ek mwan nou konnen nou'n dan sizyenm Lasanble, nou'n form par plizyer Komite e mon rapel ti annan en Komite enportan ki nou ti lo la, Praslin *Fisheries Development Committee* e ankor nou'n war ti napa bann proze ki'n materyalize pandan sa bann lannen.

La volonte ti la. la volonte nou ti anvi war keksoz bouze. Mwan Onorab Gill nou bann DAs nou bann diferan *stakeholders* bann biznes nou'n anvi war plizyer keksoz materyalize dan nou distrik, lo zil, me i pa'n vin en realite. In arive anba Gouvernman avan, me eski nou anvi war menm keksoz kontinyen? Non, la i sa letan parey nou'n dir pou nou aksyon lo sa bann plan. Parey dan lepase, ti annan plan parey en Manm in koz lo la, plan pou fer lopital, plan proze lapes.

Me sa ki enteresan se ki menm si nou'n fer fas avek en kriz ekonomik, menm si nou'n fer fas avek plizyer defi, kriz lasante, kriz ekonomik, nou'n war pandan sa dernyen 2an, serten bann proze enportan in materyalize dan nou distrik.

Nou'n war lo kote Baie Ste Anne zisteman apre ki nouvo

Gouvernman in antre deswit proze lapes in komanse - lo Grand Anse lo Baie Ste Anne.

Lopital in komanse La Digue, *passenger terminal* proze in komanse *despite* tou defi, *despite* ki nou annan resours pli limite ki avan, nou Gouvernman pe travay pe met lanfaz avek sa ptigit ki nou annan.

Zis mazine ki si nou Gouvernman ti annan sa bann resours ki Gouvernman avan ti annan, dan en letan kot nou pa ti dan en kriz ekonomik an 2019, kot *arrival tourism* Sesel ti'n kas rikord, larzan ti pe tonm mon pa pou servi sa mo, larzan ki ti pe tonn an abondans, nou pa ti pe kapab met an plas sa bann proze avek tou sa bann zoli, zoli plan ki nou ti annan.

E la nou war poudir keksoz pe bouze. Nou'n war devlopman lo Zil Ile Oeuvres. Sanmdi nou'n zwenn en *meeting* konsep in ganny prezante ki enkli devlopman nou *Sports Complex* Ile Eve ki parey mon'n dir in dan *limbo* pou plizyer lannen.

E Prezidan li menm ti fer en lanons ki i annan en komite ki pou ganny etablir e sa komite se en Praslin *Development Committee* kot nou bann Onorab nou'n ganny demande pou fer serten nominasyon;-

donn non enn de bann dimoun ki nou santi i merit lo sa komite pou ede bouz bann proze Praslin pli devan.

E lo sa komite i pou enkli non selman mon koman Onorab, Onorab Gill, me i pou osi enkli Onorab Porice, ki menm si i lo baz proporsyonnel avek bann lezot Lotorite Distrik e bann lezot *stakeholders* dan sekter prive pou nou ede pou bouz keksoz devan.

E ler sa komite in ganny etablir nou kapab pouse ansanm pou sa *multipurpose sports complex* ki nou ti a voudre war Praslin, e osi bann lezot fasilite sportif. Mon konpran tre byen poudir koman Sesel tou distrik i annan son, i anvi war serten devlopman serten proze.

Me nou tou nou bezwen vin devan La Digue vin devan, Praslin vin devan takamaka vin devan, St Louis vin devan, Bel Air vin devan, demande, koze annou pa ezite. Apre tou nou bann, nou louvraz, se pour nou prezant laspirasyon nou pep e rev nou pep devan Gouvernman.

Onorab Zialor in dir taler poudir fotespere ki ler bann proze pe ganny fer, fodre nou pran konsiderasyon osi poudir plizyer lezot rezyon osi in demann *Sports Complex*. In koz

lo Grand Anse Mahe ki en proze ki ti'n ganny promet pou plizyer lannen, in koz lo Anse Royale, in koz lo Mont Fleuri, in dir ki ler nou pe fer devlopman Praslin fer sir ki nou pa kit Mahe deryer, Mahe i a reste dan 2 *star* nou, nou a reste lo 5 *star*.

Mwan mon dir annou annan en plan konpreansiv pou Sesel antye. Mwan koman Onorab Elekte pou Grand Anse Praslin mon pe demande pou zabitan Praslin Grand Anse, Baie Ste Anne avek sipor mon 2 koleg Onorab Gill e osi Onorab Porice.

E zisteman pandan *break* la Onorab Uranie osi in *call* mwan nou ti pe koz vizit ki nou pe al fer *hostel* demen, e nou tou nou annan sa rev, nou annan sa laspirasyon pou war nou zil bouz pli devan. Sa i nou rev, sa ki nou ti a kontan vwar Mr Speaker.

Onorab Ernesta in dir en keksoz vreman enportan e mon 100poursan dakor avek li, i dir in demann bann ansyen atlet anefe in koz lo bann ansyen atlet ki zot bezwen ed dan devlopman bann zenn atlet. Nou annan bokou bann atlet dan lepase ki'n fer sitan bokou ki'n anmenn loner pou nou Sesel.

E petet sa bann ansyen atlet zot kapab vin bann *mentor*

pou sa bann zenn atlet. E si posib Gouvernman i kapab get dan posibilite. E *why not* pa zis Gouvernman e petet bann endividi dan biznes i kapab donn en soutyen en serten reminerasyon sa bann ansyen atlet pou zot *mentor* nou bann zenn atlet.

Pou zot osi progrese lo en nivo ki nou ti a voudre zot arive, ki zot a anmenn bann meday lo bann nivo enternasyonal pou nou pei. Keksoz prensipal ki la mazorite bann Manm in koz lo la se *maintenance*, Onorab Loizeau in koz lo la, Onorab Arissol, Onorab pou Bel Ombre in koz lo la, se nesesite pou met lanfaz lo *maintenance* bann fasilite.

Fodre nou Gouvernman pa fer parey Gouvernman presedan. Fodre i annan en plan *maintenance*. Ou konnen Gouvernman avan mon pou bezwen admet, zot in fer, zot in met an plas plizyer bann fasilite enportan. Roche Caiman *Sports Complex* wi in ganny fer anba Gouvernman avan.

Me le problem ki nou'n war mon bann frer ek ser ki in napa en *proper maintenance plan* pou sa bann fasilite. E sa in fer ki sa bann fasilite in deteryore. Si nou ozordi koman en Lasanble tou lede kote latab, nou dir ki nou ki annan sa

watch lo Gouvernman, nou osi nou bezwen gete e veye e fer sir ki *from now on* anba sa Gouvernman, ki zot pa fer menm fot ki'n arive dan leparse.

Ki i annan en plan *maintenance* pou tou bann lenfrastruktir e ler mon pe koz lenfrastruktir i pa neseserman zis pou *sport*, me bann enfrastruktir an zeneral.

Akoz nou tou nou konnen a lonterm i pou kot nou en kantite larzan parey zisteman sa *High Level visit* ki nou'n fer Roche Caiman, nou'n vwar ki i pou kout Gouvernman en kantite larzan. E Gouvernman ozordi i zisteman Onorab *Leader* Lopozisyon in koz lo a se ki Gouvernman pa neseserman dir ki bann proze ki zot in fer, ki zot plan isi laba.

Me selman ler mon ti al sa vizit koman *Chairman* pou MYSACC ki li osi i responsab pou *sport*, en keksoz ki Minis Finans ki li osi Minis Zialor in fer sorti se ki zot osi pe fer en *assessment* lo tou bann fasilite ki annan Mahe, Praslin ek La Digue, pou zot vin avek en plan konpreansiv pou renovasyon lo tou sa bann fasilite.

E i pa en keksoz ki ou fer ozordi pou demen sa. E parey mon'n dir Gouvernman pandan pres 2an, i pa'n kapab fer gran keksoz aköz ti napa sa

finansman pou fer sa bann keksoz. E la ki nou pei pe refer larzan pe antre, i pe anmas plis reveni, sa letan in arive pou nou pran konsider e met en pe plis lanfaz lo renovasyon lo plizyer sa bann fasilite.

Konmsi en Manm in dir firamezir, ou konnen ou pa kapab fer keksoz en sel kou me an mezir ki pei i refer, annou investir e met larzan kot i priyoriter e kot i nesese.

Apard fasilite i enportan pou osi investir dan bann lekipman o nivo pou bann ankadrer, pou bann *coaches* lo Zil Pros, pou zot kapab devlop bann atlet Praslin. Sirtou bann atlet *High Level* ki reprezant Sesel lo nivo enternasyonal. Si nou kapab ganny sa bann nivo sa bann lekipman o nivo i pou ede, i pou ed nou bann atlet lo Zil Pros Mr Speaker.

Ozordi nou pe koz lo meday Olenpik, nou oule Sesel i al lo en lot nivo. Alor nou bezwen al pli lwen. Bann atlet Zil Pros ki reprezant pei o nivo enternasyonal i enportan ki zot bann *coaches* osi zot bann ankadrer lo Zil Pros i akonpany sa bann atlet dan ban konpetisyon enternasyonal, pou osi non selman lev nivo sa bann atlet, me osi lev nivo sa bann *coaches*.

Pou konklir Mr Speaker en propozisyon in sorti, sorti kot Onorab Ernesta, mon krwar ki'n dir sa se pou nou swiv Komite *MYS*CC pou nou fer swivi lo sa komite ki responsab *sport* lo Praslin. E zisteman nou fek amann ou *term of reference* pour enkli *sport*, e mwan mon din langazman ki nou komite pou fer sa travay.

Annefe dernyen vizit nou ti fer li Praslin la Digue nou ti fer sa lan pase, e la ki *sport* in ganny enkli dan nou komite nou annan lentansyon pou nou fer en vizit lo Praslin pou nou swivi pou gete ki zistans sa bann proze pe ale, kalite investisman ki nou Gouvernman in fer pou devlop *sport* lo nivo distrik.

Mr Speaker mon konnen ki letan i limite, i annan en kantite keksoz ki mon ti kapab dir ankor.

Me selman mon remersye tou bann Manm pou zot soutyen ek zot sipor lo sa Mosyon ki mon'n anmennen ozordi, e fotespere ki sa nivo ki nou anvi bann atlet lo Zil Pros i arive zot ariv lo sa nivo, ki bann fasilite ki nou bezwen lo Praslin ek la Digue, ki dan le fitir nou ganny sa bann fasilite ki pou ed dan devlopman nou bann atlet lo Praslin avek La Digue. Avek

sa 2 mo, mon dir ou mersi Mr Speaker.

(ADJOURNMENT)

MR DEPUTY SPEAKER

Mersi Onorab. Ou bann koleg ti pe konte konbyen paz ou annan. In ler aprezan pou nou pran en vot lo Mosyon prezante par Onorab Wavel Woodcock, Manm Elekte pou distrik Grand Anse Praslin ki lir koumsa;

An vi ki Praslin avek La Digue i anmenn bokou atlet talante dan Konpetisyon Atletik Enter Skoler e lezot Konpetisyon Nasyonal, Lasanble i demann Gouvernman pou met an plas fasilite sportif neserer pou devlopman bann atlet Zil Pros.

Bann Manm ki an faver sa Mosyon endike silvouple. Mersi. Okenn Manm ki kont? Mersi.

Alor Mosyon prezante par Onorab Woodcock rezilta i koumsa, 26 Manm in vot an faver, okenn Manm pa'n vot kont e okenn Manm pa'n abstenir i fer ki sa Mosyon in pase par linanimite.

E mon krwar ki ozordi nou'n byen travay preski 2 Mosyon in pas par linanimite. Mon ava remersi zot pou zot prezans ozordi nou pou *adjourn* la e nou pe repran travay Mardi prosen 9er bomaten. Bonswar zot tou.